

中國方志叢書·第二一四號

據清光緒十年補刊本影印

廣東省

豐順縣志

(二)

214/10
成文出版社印行



10101592

中華民國五十六年十二月臺一版

豐順縣志

全二冊

定價：新台幣七二〇元整

發行人：黃成助

臺北郵政信箱二二六〇五號


出版者：成文出版社

臺北郵政信箱二二六〇五號
電話：九二二〇一〇號

印刷者：正大印製廠

三重市長生街二號之一

內政部登記證內版臺業字第一一四七號



版權所有

新華書局
PDG

豐順縣志卷之六

知豐順縣事禹航葛曙生洲父纂

人物志

賢品 孝義 耆壽 節烈 寓賢

王彥方化及鄉人陳太邱居名德里邑有人物表而出之豈徒不没人善哉風化所關正表宅田樹風聲之義也採攬之下大懼文獻無徵見聞固陋然寧詳毋缺寧核毋濫惟核足以取信於後惟詳足以觀感於人故其人或顯績或潛脩以迄歲山遺老暗室孤

婆必訪諸輿論徵其實行以爲作忠教孝訓俗型方
之具他如名賢遊歷山川增色景行所存流風可仰
亦並載焉有志於善者可以知所自處矣作人物志

一賢品

明黃勳字守勳藍田上陽人讀書鄙章句有志聖賢之學平居無戲言雖盛暑必衣冠危坐舉成化鄉試丁未授新淦教諭以崇尚正學爲己任諸生具贊俱不受其貧者周之或疑其矯勳曰矯廉其可也吾豈以顯晦大小易揜耶六年遷柳州教授見郡守長揖而已歲餘謝歸龍山教子一道成名能繼

父志

黃一道字唯夫號日溪勳子正德庚辰進士授戶部

主事奏革漁蠹疏議大禮出守興化時務以正學
信諸生濟貧恤冤又建橋寧海築長城堤民受其
利爲刻石立祠宦後挈族移居揭邑西門內今子
孫俱在揭邑

柯化鵬號聲朝藍田金湯人爲人謙厚和平舉萬曆
戊午鄉試亞魁崇正四年冬大飢揭邑紳士會賑
鵬以藍田黃寨去縣治寫遠特倡賑一方全活甚
衆及任浙江温州府推官有惠政讞獄清平時時
爲囚求生理丹筆不忍妄下三浦歸溫民多首頂

香爐數千里護行抵家其德澤感人類如此明季
山寇竊發其親族有被脅從賊者鵬力誅之處多
難之鄉謫先斂鍰匪類竟不能害與妻洪氏偕老
子孫有顯名於時者

何仕冢號純弼字文定棠荆鄉人生而穎異博涉群
書平居手不停披口不絕吟與海陽黃尚書錦吳
尚寶殿邦揚陽郭詹事之奇等十七人以詩文相
推重而何爲之長幼會肄業晉江極爲李光緒所
器歸潮遂冠多士舉萬曆壬子鄉試任潮廣鹵山

縣知縣

羅紅

揭志誤作洪

藍田上陽人少遊庠以行見推爲督學

陳欽所器欲薦之會陳卒母年八十家居奉養不

求仕進善吟咏喜山水有和歸田百咏詩揭邑長

隆正深重之訪其廬謫簿李本舉鄉飲賓爲鄉約

長

楊世喬更名宮號柳主藍田湯坑人原籍茶陽之白

溪爲楊龜山先生十六世孫舉天啟丁卯鄉試爲

人慷慨有國士風乙酉秋九軍賊攻邑城喬統義

士擣其巢穴遂解邑難繼而賊屢圍所居金甌寨
喬統衆堅守以義勵之數閱月食盡茹棉核蕉根
而千人如一心焉躬爲先鋒破賊解圍又詣郡帶
兵殺賊首馬殿黃甲於梅岡迎班郭二總兵誘殺
賊首劉公顯傅達馬茂素於府城更謀之饒鎮吳
六奇多方削平歷數年間藍霖寇殆盡全揭賴以
底定鄉人有漸染匪類者皆爲感化從善子孫繁
盛今移居揭邑沙腹湖

羅拱腸上陽人揭陽學生員孝友樂施曾捐田租助

祭揭邑文廟乙丑年經提學道張瑄優獎德行祀
揭邑鄉賢有子萬傑崇正甲戌進士

羅萬傑字貞卿號庸菴年十八舉崇正庚午鄉試甲
戌進士甫觀政丁外艱歸服闋授行人司行人兩
奉使冊封吉荆二藩庚辰召對給筆札問修練儲
備四事侃侃直言數陳利弊切中時艱擢吏部主
事轉驗封員外郎舊例副郎不與選事會冢宰鄭
三俊加意銓政以傑誠實不阿破格畀以選事在
職一年矢公矢慎每有黜陟反覆詳審適長安厲

氣盛行同邑王宗昌幾不能生爲多方求治朝夕
左右卒賴以安同邑林一奇卒於京邸傑昌暑親
爲治喪棺斂如禮其篤於友誼類如此復丁內艱
守制旋里值揭邑歲侵倡禁閩糶藉以全活者甚
多未幾聞國難遂矢志岩壑結廬茶陽山中草衣
蔬食與樵子牧豎量雨較晴性喜禪悅高僧談對
閒時或賦詩見志生平身無長物林居三十年足
跡不入州府家人婦子罕覩其面所著多不存稿
蓋不欲以文人詩人自待也病革自言吾身丁世

變忠孝兩愧且多年學道無成去當再來卒年六十八子八人俱能守其家訓今分居揭豐二邑

國朝吳廷符字弼垣六奇父少有至性篤孝弟好施與久而不忘鄉黨稱之以子貴贈光祿大夫祀府學鄉賢

吳六奇字鑑伯號葛如湯田人海邑諸生少讀書務大節不事生產明季山寇竊發奇與弟標訓練鄉族力爲扞禦當事嘉之委守豐順營先後殲滅巨盜鍾凌秀葉澳婆彭士炳張文斌林叅寰劉良機

等遠近賴以安我

朝定粵竒統衆景附特授掛印總兵官開闢饒平會土寇
江龍踞大埔鄭儼據湯坑統官鄉兵討平之潮鎮
郝尚久叛各縣風靡獨竒抗不肯附及王師圍
城竒捐餉不貲助攻甚力城下日保全甚多功成
晉少傅 賜蟒貂刀馬等物時海氛未靖募習水
師造船會勦鷺島克復又奉

詔宣諭南澳全澳將士及銅陵諸嶼一時向化來歸竒皆
捐俸贍給之嘗捐貲修府學明倫堂及饒平大捕

文廟卒贈少師謚順恪 賜祭葬祀鄉賢詳載墓

誌

歐亮松林社人曾爲饒鎮中軍康熙十三年七月逆
鎮劉進忠叛據城遣數營逆黨據揭邑亮統師
欲恢復揭城自舉義兵前導駐札磐溪都被逆黨
襲擊死之

鄒瑞橫坑社人明季武生順治十年同饒鎮吳六奇
恢復潮郡保全程鄉大埔鎮平平遠等縣有功十
二年授饒鎮中軍遊擊康熙三年虛福兩省總督

檄剿大埔木客有功六年封授驍騎將軍九年拔
湖廣德安府副將

王金環清堡人爲饒鎮吳六奇標將屢立功績順治
二年普寧土寇林叅寰劫縣以計斬之六月澄寇
困潮州解其圍繼而彭仕炳作亂陳擒巨魁三年
海賊掠潮陽鎮平寇攻梅州俱剿平之四年寇破
長樂賴以恢復十六年興寧大飢移粟萬石賑之
生子二十三人初授都司僉書管遊擊事陞任饒
鎮右營叅將

羅萬善號子臧字正仁藍田上陽人康熙甲子舉賢
書考授中書後改知縣以老不就職家居日事吟
味不履公庭有司罕覩其面性極恬澹而任事慷
慨重新祖祠祖潭堤決捐資脩築丙午丁未歲飢
於碩浦發儲散米人懷其惠享年九十有一長子
昌齡雍正癸卯歲貢任東安縣訓導次子松樾歲
貢中乾隆甲子何蘊躍榜三子鳴鑿監生任浙江
桐鄉縣縣丞今俱移居揭邑

羅國珍號豈藏字正殿萬善弟與兄齊名康熙丙午

鄉試第四名揭邑長鄭濂延脩邑乘初令武進以
憂歸繼補昆明皆有治聲丙子分校滇關所得皆
知名士告歸後與兄萬善白首怡怡人咸羨之有
子四俱成名今分居揭豐二邑

吳啟晉號長源六奇長子有文武才少佐父治兵預
叅帷幄性至孝重然諾友愛諸昆弟能得父歡心
平居耽書史雖其父以宮銜掛印行膺廕典非其
志也發憤下帷中順治丁酉科舉人房師洪琮期
以大器未幾卒人皆惜之

吳啟爵字縻源六奇四子郡諸生康熙五年以父廕授正黃旗侍衛隨提督施琅攻澎湖多立戰功諭降臺灣賞偽冊印星馳奏捷陞太原總兵給世襲旋遷瓊州平黎岐靖島嶼再調天津行至雷州卒康熙癸巳以

萬壽恩諭祭功臣榮寵及之

張應龍字仰雲建橋鄉人早歲失怙得寡母王氏教
育成之時與胞弟起龍夢龍相友愛人無間言乃
讀書艱於科舉就幕於湖廣糧儲道楊公漣署持
籌握算綜理簿書爲楊所竒重明天啟元年出爲
臨漳縣主簿廉能練達具幹濟才與邑紳周朝瑞
交最善周原官吏科給事中兼太僕寺少卿也疏
奏應龍爲賢吏遷署臨漳縣事調補衡山縣知縣
轉興都留守司經歷迨楊公題陞都察院御史又
以能員保薦奉 詔管領顯陵兼承天沔陽事務

居官勤慎清理詞訟聽斷無私一切興利除弊民
多感頌因念老母在家不得晨昏侍奉遂告職回
籍省視嗣授中議大夫並請封贈二代榮歸乃抵
家未及一年壽五十八而卒楊都察周給練同誅
題曰勤以趨事嚴以持躬才雄逐電守固凝冰迄
今孫支蕃衍猶想見其遺範焉子三人俱賢俊

楊貞號翠環北勝紫荆洞人少有壯志諳兵法爲吳
六奇所知順治元年黃海如寇潮郡隨六奇提兵
入援麀戰筆架山論功受上賞復討巨寇鍾凌秀

葉阿婆及九軍賊劉公顯等屢立戰功迨六奇鎮
饒平卽以貞爲裨將九年郝尙久叛遠近風靡獨
貞與六奇皆不附戰守之際叅謀決策心力交加
復輸軍餉助戎裝破逆藩定潮郡叙功績授叅將
劄歷守大埔饒平揭陽三屬壁壘肅然凡關軍國
事務行之莫不動中肯綮閩粵兩省總督檄勦大
埔本窖賊又與協鎮鄒瑞爲之原情定罪從寬赦
宥分別良歹予以自新其鄉民感恩圖報因而立
生祠顏曰鄒楊公祠時軍門楊 遇明奇其才欲

保薦陞遷貞乃功成告退築紫韜晦今紫荊園是
爲楊氏始基祖也防備盜賊鄉里賴以安若捐賑
救饑創建積慶東林西竺等庵寺一切善舉尤敦
行不怠康熙十二年卒崇祀縣學鄉賢子二十六
李漢玉城廂人幼聰穎十七登黌序旋補廩膺歲貢
強仕後選新興縣儒學抵任時士林式化學業尤
擅長經古名著觀海集中畢生正直持躬樂善不

倦

吳開岐城北人好讀書喜行善事每遇貧乏輒周之
應試屢躋援例報捐千總銜好論古今異事至老
不倦常以邑屬事有關果報者聞見輒拈筆錄之
彙成小編鐫之以勸世名曰靈異記長子良增生
次子榮廩生三子紅舉人孫謙受增生曾孫世光
庠生書香果葉皆其積善之報

楊鍾嵩字仁溪紫荊洞人監生考授州同鄉賢貞之
子幼穎異喜屬文有侗儻志躋於數不售退而營
貲產號素封慷慨好推解族戚有待哺者轍炊爨

給之靡德色尤篤友於骨肉稍違和正色以詈之
衆莫敢犯晚年自道云生平守拙無他術到處逢
人勸讀書壽七十有二子九人歧嶷惟肖詩禮傳
家孫支蕃衍

張應制字子亮官溪人庠生好施予重本源祖宗祠
宇多所創修百堵皆興毫無慳吝且賦性嚴正整
飭鄉規人多感服因稱爲官溪公而不名仍倣鄉
先生可祭於社之義至今每年鄉中祀社頒胙永
著爲例子丹客俗傳授異人寶出米致富云

張逢年監生官溪人謙和謹厚孝友存心家頗饒裕
教子孫辨義利聞嘉言懿行輒佩服不忘居恆重
道隆師勸耕課讀謂久大之業不外如是子之純
佐理俱生員之紀國學孫宣猷廩生

朱孔璋號琢齋居官以賢能著自佐貳至縣尹洵乎
卓異乾隆三十六年

上幸山東璋由仙遊縣奔赴接

駕恩賜錦緞旋調貴州銅仁署荔波等縣轉獨山州莅
任五載勉持清操興利除弊於民事靡不殫心民

苗有召父之歌仙遊邑誌以璋廉明強幹載入循吏傳邑人又立碑儀門及楓亭梅嶺以志遺愛嘉慶間纂修廣東通誌載入仕宦傳稱璋居官廉明在家孝友云

譚濬字方哲歲貢生爲諸生時負奇氣任盤錯有守有爲每歲豐都額賦悉爲肩荷完納省無數差輸糜費暇則宣講 聖諭化導鄉民惠潮嘉道張公士璉獨器重之尤精青鳥術邑治初開相度學宮基址並獻屋地三間以廣成之兼襄理倡建事

譚廷雋字特峯由廩生登鄉榜工文章樂善不倦日
按功過格而行舉動語默以士先器識而後文藝
爲正己化人之要務晚年著太上感應篇輯叅未
刊而逝家藏鈔本因咸豐四年遭兵燹三分損一
孫錫承修補之現梓行世

丁日昌字持靜別字雨生藍田湯坑人幼涉獵書史
有神童譽弱冠補弟子員逾年食餼惠潮嘉道李
璋煜聞其名延置幕中因縱談時事歎爲一世才
咸豐四年甲寅土匪吳忠恕困潮州佐觀察防勦

屢出哥計生擒渠魁事平授瓊州學訓導轉江西
萬安知縣兼攝廬陵篆善於聽斷初期呈詞約在
百紙第二三期僅四五十張匝月後不過一二紙
而已李制軍瀚章時爲贛南道竒其才由是聲名
藉甚曾文正公國藩督師兩江調赴安慶營襄辦
軍務上陳吏治條議十則又陳丁漕諸弊議核州
縣攤捐欸應裁者數十則皆洞中時弊同治元年
權釐來粵旋赴高州營幫辦軍務克復信宜復赴
上海督辦軍器克復無錫金匱等縣陞用直隸州

知州賞戴花翎蘇撫李公鴻章委辦全省行營營務克復常州生擒逆首偽護王陳坤書叙績以知府用是時仰膺

天眷不次超遷蓋將昇以大任矣署蘇松太兵備道旋奉特旨卽真上海自通商以來華夷雜處奸商狙僧潛結蠻酋洋商之狡黠者與官吏抗抵道任後驅夷兵出城檄犯事輪船充公索回吳淞口礮臺地基裁革會防局供應及英法兵費禁洋酋收洋涇濱賭規拏英教士陸和尚正法拔除浦東一路電線資遣

外洋流氓返國捕奸僧通事某置獄沒入其私購
買輪船機器廠地移建製造局於南郭等事皆人
所愕眙者然雷厲風行不少假借卒使諸酋警慄
去調兩淮鹽運使司兩淮利源一在鹽務一在釐
務訂定章程積弊頓改未幾有署理蘇撫之

旨陳言曾文正公懇代奏辭有五不勝任之語旋奉

命來粵查辦洋務事竣回署適清水潭決口潰至三百餘
丈籌費督修躬親畚鍤者數月及合龍溜急人力
難施夜大雪降二尺許乘凍集人夫趕築大工告

成人以爲有 神助云遷江蘇布政司有清訟均
漕減漕價墾荒田釐賦役勸積穀懲奸胥興水利
諸政逾年任江蘇巡撫時江南底定甫三年耳民
氣彫殘政籍蕩廢淬精勵神興利除弊前後清釐
積案至二十七萬餘起之多其立法最善者曰月
報詞訟冊曰錢糧斗則簡明告示皆經奏奉

前旨飭各直省仿照施行著爲令撫標兵籍種畧承綠營制
額缺而卒窳惰不可用條減兵增餉議上之大意
謂併三兵之餉養一兵併二弁之餉養一弁則兵

弁皆可精選凡再奏始得

旨如所請於江海防水師章程亦多所參定嘗言天下事
壞於泄沓自思有以矯之每當夜闌秉燭案牘高
可隱人無不親自稽核閱至百姪枉屈不能自伸
或受書差陵虐撫膺歔歔悽然淚下或見勤政愛
民諸事則呼幕僚相共欣賞撫吳時甫強仕不半
年鬚髮盡白矣奉

旨赴津門查辦事件批卻導窾外夷弭首就約丁內艱旋
里服闋奉

旨特召旋聞

穆宗毅皇帝升遐星馳抵京叩謁

梓宮痛不欲生

兩宮皇太后召對六刻所以拊循而慰藉之者甚至旋

派幫辦北洋大臣嗣任船政授福建巡撫夏間滯滌陟發

水災蕩析離居饑民盈萬露立城上六晝夜口煦

手拊之設粥廩二十餘處大廩日就食者千餘人

小廩數百人咸慶更生踰歲復災仍以其法設賑

全活甚衆臺灣者海外奧區也閩探例須東渡

閱先嘗奏言固臺防先必練兵欲練兵必先籌餉
不如卽以開墾之衆資兵術則兵不外求而足以
開墾之利助軍餉則餉不外求而足至是周歷全
臺籌畫布置北自蘇澳噶嗎蘭南距恆春琅嶠皆
開闢以來大吏所未經之處番民歸化夾道歡呼
臺俗有漁戶等稅多立名目胥吏因緣爲奸輸於
官者十取於民者百立奏罷之歲蠲榷額五千二
百餘兩兼督學政援康熙間湖南苗徭學額例奏
設番童學額以示招徠旋養病回籍闕中士大夫

榜於衢曰留中丞活百姓祖餞東門多嗚咽失聲
晉豫大饑在籍設法勸賑彙捐貳百餘萬圓解赴
拯濟尋奉加總督銜會辦南洋海防並充總理各
國事務大臣之旨卒以沉疴不起不能再出山矣
朝野惜之照巡撫例賜卹賜祭葬性嗜書得宋元
板精本節倖購歸之成持靜齋書目五卷詩古文
詞皆卓然成一家言奏疏條議尤爲詳明剴切深
入人心於漢之賈長沙唐之陸忠宣宋之歐蘇陳
龍川諸家爲近著百蘭山館文集百蘭山館詩集

撫吳撫闈奏稿撫吳公牘藩吳公牘海道圖說礮
火圖說各若干卷平生喜獎植士類一節之長輒
被容引其不束身自愛者則嫉之如仇以故世或
病其峭厲然正人君子談及老成典刑肅然起敬
猶相與流連唱歎於無窮也子五人長惠衡由保
舉 欽加鹽運使銜補用道 賞戴花翎具幹濟
才有父風次惠馨廩生惠康生員惠廸惠吉俱幼
學孫寶元廩生寶瑛由附生候補知縣

吳亦材號任齋城廂人生聰慧汲古有得品學兼優

年十四遊庠乾隆丁酉科拔貢丙午中順天舉人
歷任龍門感恩等縣教諭嘉應州學正遷廣西馬
平縣知縣廉明正直不枉徇人政聲丕著及致仕
士民感德遮道相留家居後培養子弟儉朴如寒
素而凡有善事則傾囊樂助邑中文廟考棚大橋
文塔善慶祠皆其倡捐董建也壽八十歲道光十
三年癸巳重遊泮水子四世驥廩貢生世馴武生
世琪國學世驥道光乙酉拔貢舉人聯捷進士孫
永澄同治辛酉拔貢永智光緒乙亥順天舉人永

瀾郡增生曾孫昌

期郡廩生
坤順天舉人

識者謂三代選拔四

代北闡鄉薦修德獲報良然

張登瀛號雲颿藍田埔仔鄉人善草書尤酷鑑史嘉

慶十五年由從九歷署浙江甯波府經歷奉化昌

化慈谿等縣典史杖錫大錢漁浦司巡檢補杭州

府城南稅課大使所至多惠政道光二十年丁丙

艱起復補湖州府輦市巡檢二十九年辦水災積

勞成疾卒于官年六十九歲子五人

張凌雲號濟川雙螺口人由武舉歷任潮鎮標饒平

惠來普甯鎮平平遠各營千總嘉應州城守巡防
緝捕嚴肅認真且愛養兵卒體恤民情主將本欲
委以重寄因念椿萱垂老辭祿歸養值歲稔施粟
發賑並奉 憲諭捐題百石赴縣平糶秦邑侯秦
給麟閣先聲匾旌之

譚宏詞大田鄉人嵩鵬四子讀書不售援例納監赴
鄉闈復屢困性樸實而每逢朔望必振衣冠敬禮
天地神明詣祖祠跪拜畢即以 聖諭宣講或引

古今果毀事感化鄉閭男女不有知人之唾其狂
者生平不解治產後家口繁費日薄猶安常如故
卒年七十歲其中子廷彥例貢白手創業乃立其
父祖蒸祀子若姪亦皆體承遺訓而成家道焉孫
曾洋壁明經煥手昌熾

吳慶平號靜海瓊溪田背人幼讀書負奇氣後因授
筆習弓矢年十八登武科聯捷進士旋考充廣東
全省塘務粵督吳榮光奇其才勗以忠勤盡職數
語慶平心誌之廨中一切積弊釐剔殆盡公餘酷

嗜翰墨秩滿丁外艱歸里哀毀逾節遂矢志養母
嘉慶庚辰倡建宗祠於文廟側身力不辭勞瘁繼
乃結廬於天柱山下居焉顏其堂曰尚志門首署
可以二字蓋取衡門詩以自況也手書栢廬家訓
於屏風又集唐句懸廳事云無多別業供王稅未
有涓埃答聖朝忠愛之氣溢於言表居鄉坦易遇
事之有關風化者無不樂爲表率道光初里有逋
負官稅者慨然代償出其獄歲甲申鄉里因旱構
釁幾釀巨禍慶平爲撫循之盃酒勸化懷甄鄭太

史家蘭贈以詩稱肝膽照人以爲季布彥方復出也家居三十年諄諄以詩禮種德爲訓卒年五十八歲子亦元至性過人綽有文風貢入大學孫家桂恩貢鯤廩生

吳世驥號蘭皋城廂人亦材季子也七歲嫻韻語少抱壯志博通史籍膽識俱高年十四遊泮十八歲選拔弱冠充武英殿重刊康熙字典校錄官選授西甯縣教諭年二十七舉順天鄉闈癸巳聯捷進士欽點禮部主事歷任精膳司主事遷儀制司

員外郎掌祠祭司郎中兼樂部和聲署署正禮部
則例館提調 實錄館校對京察一等記名御史
以繁缺知府用在京供職十餘載所辦條疏及吏
治事宜皆洞中時弊僚友服其賢乃天不假年卒
時五十一歲公論惜之

朱鳴玉 隴隍人由廩貢考授韶州仁化縣學蒞任三

載捐廉倡修 聖廟學署明倫堂勤勞任事心力
交瘁且課督士子誘獎維殷都人士感其化雨春
風以勤廉載入仁化縣志卒年六十六歲子炳南
炳欽孫之點俱廣序書聲

楊九疇號龜川紫荆洞人歲貢選授博羅秉鐸每朔
望必傳肄業諸生講經義詩文於學舍正誼明道
丕變士風人目爲龜山復起旋卒於任壽七十二
吳翽號傅衢道光己酉拔貢新陂鄉人父逢時爲邑
諸生居心仁厚翽承父志家貧舌耕以供甘旨

每歸視膳則縷述邸抄時事以博餘歡乃父在日
嘗舉歐公養不必豐要於孝之語以慰之尤篤友
愛終歲罄脯修之餘分給兄弟其家法整齊子與
姪輩諄諄課督成材食餼後痛濫保陋習慨然以
誓墓自明至於裁成後進在本邑鵬湖爲最歷掌
饒平琴峰揭邑梅江等處書院士林皆以品學推
崇咸豐甲寅土匪滋擾同治乙丑髮賊竄境翔在
局籌防出力原授訓導銜蒙內獎以知縣用晚年
倡修文廟籌理賓興諸務壽逾古稀而卒丁制軍

陸奥川泉云修
名一八ノ

曰昌諫之曰巋然靈光云

一材能

張乾福字洪塘建橋鄉人少負奇氣有勇畧粗識文
墨酒食倍常明隆慶三年寇賊黃瑞結黨倡亂自
江西及興長程海等處遭劫殺者不知凡幾乾對
父母與子姪輩曰人生必先重君父恩後顧身家
事方今賊勢猖獗難免覬覦吾家若不聯鄉井而
防患置礮械以禦侮將流離失所矣時適大理寺
卿陳公仲謀膺 王命巡按閩粵路經此地相度
形勢上隔程鄉下界海陽均屬鞭長莫及並確查

寇亂實情出示招募丁壯堅築土城團防堵禦先是乾稟明大憲尚未發兵至是慨然散家貲萬數統集民兵數千投効陳見乾人材雄偉且有深謀星飭馳京章奏並保准乾爲六品鄉都長僉軍事仍一面督率人役大興土木深溝高壘立東西南北門置銍礮四架聚族鄰備戰守越一月奉

特旨諭云爲國爲民不負勤王之意有謀有勇堪稱健將之勲着封爾張乾福爲武德將軍以示鼓勵餘俟滅盡賊黨再加爵賞可也乾於是統義勇復會閩

粵撫按官兵協同攻勦奮勇前驅深入賊巢生擒
賊首黃瑞楊魁吳安山張欽鍾鳳等五人並殺斃
賊將兵數百餘皆潰竄寇悉平

蔡鳳原籍澄海移居赤嶺鄉由行伍於順治十二年
海寇攻陷揭普澄三縣鳳隨饒鎮吳六奇軍前効
用及藩院大帥營駐紮新墟吳鎮保獎以隨征戎
旗守備銜十八年征剿揭潮山寇黃元尚等有功
康熙元二年前後奉委招撫偽鎮杜輝吳陞等投
誠並會勦太埔木窖賊首黃以萃屢著勞績加管

戎旗都司銜十三年潮鎮劉進忠逼叛平南王率
師征討奉令領帶官兵陣戰斬獲叛夥多人王嘉
其績獎授守備十四年奉剿店前賊首王元偉王
蘭等各處賊巢王復從優給賞加授都司管事仍
委鳳統領官兵防守要隘地方遂賴以安其子得
功以年力强壯歷練老成補右哨六局二旗管隊
孫進以年力精壯勤慎練達補右哨北門副管隊
楊孟號翠華遜心堡人少負勇畧倡義捍衛順治初
隨吳六奇征討巨寇鍾凌秀葉阿婆等屢立戰功

勞績迨六奇開府饒平歷陞授中軍叅將駐紮三河接濟軍餉軍旅所至蒼赤皆安後歸隱葉華村樂善不倦

朱樑號秋壯下湯社人有膂力諳兵法順治十二年由行伍補授饒平營千總防守緝捕勤慎任職且訓練有方鎮憲嘉其能保陞大埔城守營守備康熙九年流寇逼城樑奮力殺賊賊潰散以功擢大埔營遊擊十五年赴廣州援剿克復龍門縣叙功加副將銜調補廉州營遊擊擒獲逆帥祖澤清凱

皇川身二修

名一ハニ

積勞成疾旋卒於靈山官署壽六十二歲崇祀縣

學鄉賢





一忠烈

明吳萬雄松林社當風嶺人歷任總兵崇正時殉難

吳廷楨任總兵鼎革時殉難

譚聖典字啟中大樵鄉人雄於文而意弗專尚食儉
程邑爲諸生所憚日與諸子姪輩勗忠孝節義謂
人不如是雖文如王楊終屬名教罪人迨甲申變
作其子經綱及諸孫同殉難義方之訓良不誣云

國朝連旭陷墮下埔鄉人壯士也少有胆畧家貧捕魚爲
業嘉慶初海寇蠶起蔡乾餘黨沿海擄劫勢甚猖

獬旭與林孫陳之艷同夥捕魚被擄賊見旭等體
貌魁梧且慣習水留爲羽翼旭姑許之適中秋夜
賊在船肆筵賞月旭乘醉擒賊首數人而獻總戎
黃標論功加旭三人爲把總後屢建奇勳授香山
協營左哨千總陞達濠營守備嘉慶九年廣府屬
海寇復煽黃總戎知旭能使捕盜瀝洋面與賊敵
戰身負銃傷猶手刃數賊而卒寇平

朝廷褒嘉其忠烈賞給世襲

張萬達藍田埔仔寮人登瀛少子也幼孤事母孝援

例報捐從九品分發浙江補用咸豐十一年秋待
母陳氏寄厲杭城純佑橋適髮匪圍杭城陷罵賊
不屈隨母殉難聞者痛之事平巡撫馬公新貽列
其事奏於

朝廷奉

特旨賜卹加贈鹽運司知事銜廕一子入監以縣主簿歸
部選用

黃大鵬金湯市人猛勇絕倫由行伍疊陞黃岡協右
營把總咸豐二三年間隨栢中堂俊從征江南大

營攻鎮江城斬殺賊甚衆旋被礮傷陣亡

蔡德新藍田都人田行伍於咸豐四年土匪吳忠恕

圍湖奉惠潮嘉道曹履泰檄委帶勇守東橋頭筆

架山擒賊多名屢獲勝仗經鎮道憲賞給六品頂戴

復冒險攻破東津等處賊營郡圍立解總督葉巡

撫栢公貴奏

准以千總留提標水師營補用咸豐九年髮匪石達開圍

嘉應奉州憲文公晟諭帶勇赴援德新教其子六

品頂戴清泉從九品淵泉姪思創阿鸞阿連先帶

勇進城助守自與子龍泉親往突圍奮不顧身衆寡莫敵遂被賊困父子並所帶勇三百餘名同日陣亡同治七年江蘇巡撫丁公日昌將其帶勇陣亡情形入奏請優卹是年奉部覆准追贈守禦所千總給予世襲雲騎尉襲次完時以恩騎尉世襲罔替並祀昭忠祠纂入忠義傳思創龍泉清泉照馬兵例給卹阿鸞阿連均准附祀淵泉協守梅城城陷巷戰陣亡經州憲汪公政詳報粵督勞公崇光奏請優卹嗣奉部覆准與嘉應州吏目尹

紹伊等十人同給予世襲雲騎尉襲次完時以恩
騎尉世襲罔替同治十一年德新長子鑑泉淵泉
子湘均由縣備造宗圖冊結親賫督署經閣督瑞
文莊公麟閱驗均發潮州鎮標差遣委用十二年
到營効力

丁爲龍藍田石印人廩生因遊幕粵西在梧州知府
陳公瑞芝署中襄辦筆墨咸豐七年逆匪圍攻府
城爲龍隨同在城文武官員登陴固守是年八月
初十日力竭城陷帶勇巷戰手刃十餘賊受傷倒

地罵賊不屈被賊抉舌破腹登時殞命同治七年
江蘇巡撫丁公日昌將其死事情形入奏奉

旨着從優議卹嗣准部議照外委陣亡例給予雲騎尉世
職襲次完時給予恩騎尉世襲罔替其長子堯釗
承襲世職於同治十一年取具親供圖結履歷文
冊赴督署驗看經閣督瑞公驗明發標學習

日本書紀元

卷之七

如
學
如
學
如
學

PDG

一孝義

明朱月嶺正德時上林鄉人佃儻義俠嘗置舟偕僕漁釣溪中夜聞岸上呼救往則二婦人也詢知福建上杭人黃姓姑媳二人爲賊所掠奔逸至此憐而載歸安置一室給以衣食夜則重其鎖鑰卽致書其家約期來領厚贈資費以歸越數年夫婦來謝適已謝世備極哀痛爲披麻哭泣而去嘉靖間海陽令採其實上報舉鄉飲賓子起凡亦以孝友著

崇正間舉鄉飲賓

楊最生員母朱氏患眼與妻晝夜舐之復明嘗爲甕
煖寢處二銘傳家有子世喬天啟丁卯舉人

國朝羅明倫字德振號未能藍田上陽人生而穎異十歲
能文中順治庚子副榜癸卯再中副惠以義命自
安無舐望意生平制行溫厚事父母繼母以孝聞
捐已田二百畝爲兄續嗣人偕稱之

賴心台金甌寨人順治初九軍賊圍寨危在旦夕心
台夜半開門失圍而出詣通判府請吳六奇撥兵
救護復於夜半潛回被獲賊令心台誘開寨門台

不從卽斷去手足焚其屍金甌賴以保全

李佳瓊小勝鄉人好義樂施康熙丙子丁丑洊飢斗米四百汝家給粟按畝借種鄉人咸得其惠雍正丙午丁未又洊飢斗米六百郡中賑粥鄉民艱於遠赴復爲按口酌給鄉無死者前海陽令頽敏會旌以匾曰齒德堪仰現年八十三歲

張璉字文賡建橋人生員爲人約已好義鄉之石碑下係海程孔道崎嶇難行捐重資開闢之鄉有甲坑溪水深病涉建橋以利行人又脩一渡水橋凡

皇川身示
身三二
鄉之死喪無所歸者周恤不倦年至八十五歲

羅孟震字德宣上陽隆烟寨人國珍子貢生候補訓
導改選主簿雍正四年五年揭邑歲祲煮粥賑飢
倡建慈濟堂施樁掩骼買山作義冢部旌好義又
捐舖租助祭文廟

楊安定金甌寨人澄海縣學歲貢生平質直好義值
雍正丙午丁未洊飢捐金倡賑族黨咸得其惠

羅鑠字裕聞號龍峰上陽人基恒長子揭學增生雍
正七年學院鄧公鍾岳舉優行事親以孝聞生平

輕財重義族有貧者助其聘娶友負糧不能補代
爲輸之嘗偕人夜行望氣得白金千兩堅不受
康熙丙戌歲舟泊產湖適溪水暴漲淹及村舍捐
穀拯救活數十人雍正丙午丁未洊飢爲揭邑長
力陳賑術仍自捐囊佐賑當事給匾旌之卒年八
十有二子起濱武舉餘列成均

楊兆璇布心社人年十四其父楊熙俊歿母張氏撫
之雍正十二年母病幾危醫藥無効璇日夜哀禱
於佛前夢佛告以人肉可療璇隨割己之乳肉烹

以進母母不知食之病果愈而璇亦痊復如故

吳一孫字正伯在城人生員原海陽縣知縣張士璉

治海時以豐政都離治窳遠民多抗糧委理糧務

催輸得法爲鄉約長公正不欺原潘田司巡檢沈

元震解任未及一月母故不能奉柩回籍葬於邑

屬尖髻山許孫看視孫爲之脩葺祭掃一如已葬

四十餘年未嘗少衰且謀立祀產以期久遠現年

七十二歲前邑令王如珩給匾旌之曰延陵碩菴

彭昌孚下湯社新福園人讀書不遇家居力農爲人

一介不取而性樂施濟乾隆四年饑里有鬻妻子者爲立賑穀百餘石先本族後鄉里全活甚衆乾隆七年大旱孚卽會請鄰族出穀百餘石賑之有詣門謝者却不受卒年六十子孫俱入太學

李少溪明季庠生原大堪社人移居北勝社小勝鄉居家以孝友稱遇鄰里有故多爲排解足跡絕不履公庭今爲李氏始祖其祠曰孝友堂族姓蕃衍子孫賢達蓋彬彬焉

朱月嶺救婦人一事旣載誌而其事父母順志承歡

善歸親過歸已及親歿勺漿不入口三日老尤人所難當時有勸其節哀者嶺曰吾何知哀率吾性耳旣而扶榭葬北山麓築室墓傍事死如生居喪三年未嘗見妻子面遇烈風迅雷卽焚香大呼曰兒在此父母無恐也服闋仍獨居三月始束裝歸同里孝廉譚廷雋直書其事載入感應篇作註證以勵風俗海陽學角忠義孝弟祠春秋崇祀至今後嗣蔚起科名富盛猶徵遺澤孔長云

吳崇鑑字嚴質豐政都人幼有至性乃父爲小經紀

貿易程鄉行至大歧嶺下遇暴疾卒時鑑年方九
歲聞耗星夜馳往視之則螻蟻負土成坟矣羗留
顏面一時呼籲隕絕哀感旁人遂葬乃父於其處
卽今所稱蟻地是也居家孝友仲兄早世爲續遺
孤視如己出分產時弟兄交讓有泰伯季子風一
日告其母曰家道寢昌全賴祖德欲在瓜子塘地
面鳩一本以建祠何如母喜諾遂納土構焉至賑
貧乏助喪塋建立義田義學等舉鄉人多賴之卒
年五十九歲豐政都吳族蕃衍大半是其派下

吳廷魁號亮臣南廂高田人幼失怙五代零丁事母以孝稱稍長高曾以下墳墓俱經手塋併置祀田生平涉獵經史諸子百家無不披閱兼通算學青烏歧黃等書及壯隨饒鎮吳六奇征勦以精算法運籌決策所到成功奉

旨恩賞鎮國將軍銜隨營選用尤能招集流亡使人安居樂業因親老辭歸嘗僑居潮城遇異人待以客禮出秘書二種一青烏一歧黃且曰助公濟世無不效者至今各省外洋皆馳名卽其秘書中方也埔

邑銀溪口墟貿易多年有病涉魁捐設義渡且置
產以垂永久咸利賴焉子十三五代同堂孫曾九
十餘人壽八十二歲而卒

鄭宏號公毅環清鄭家圍人 國初定鼎歸總兵蔡

元營援勦有功授連州千總陞都司順治十四年
總督洪保奏封昭義將軍爲連陽遊府嗣奉

旨將部屬額糧追解以備支給宏分別征收深得民心州
人因立生祠供祀晚年解組歸撥田八畝三分作
圍基族人賴之

吳 鳴國學生橫坑社人父子昂夢迺雷震庭電光

耀室驚寤而鳴適生遂命名鳴字成震號夢先誌
其異也幼聰慧以文名通經史尤熟周禮爰納監
赴南北闈屢躋其父勗之曰爾讀書當以報本型
俗爲先富貴功名天定之敦善積德我主之若不
顧祖宗惠鄉黨亦虛立人世吾老矣爾其善承吾
志毋忽父歿悉遵遺囑舉行遇歲飢則盡量賑濟
遇爭競則極力解排有善必爲不求人知創建五
世十世兩祖祠貲雖鉅身獨任之更自創屋一座

堂額曰志事蓋取繼志述事之義也

生子四孫十
六書香繼起

丁口蕃衍尤喜親見其子元發登武科孫慶平聯
捷進士以德召福有自來矣

劉登魁崗下圍人拔貢生敦品力學工書法以孝行

聞親病躬侍湯藥衣不解帶廷試後惟資穀以供菽
水循循善誘名下士多出其門洵屬有光藜閣矣

吳文緯號愛亭成震之四子幼業青緇長遊壁沼後

仍五赴棘闈不售家法整肅凡祠宇墳墓莫不躬

爲治理事諸兄怡怡如也乾隆乙卯歲大侵竭鐘

以貸鄉人多德之一日某氏子牽牛踐田有隣叟

見而讓之曰此吳封翁續命田也何忍犯諾其見重於人如此歲值疫癘頻聞緯命其子贈藥施醫全活無算或遇水旱察佃所虧均減其償開佃戶鄒某遭凶荒將鬻子緯廉其情轉與之粟而蠲其租鄒啣其德惠記念不忘後將謀他徙星夜獨持十餘金踵緯門以償舊逋緯固却不受乃謝而去其生平長厚仁慈壽六十三而卒邑令傅公修孟誅以善行可風族姪禮部郎中世驥述緯行狀亦以山負海涵余膺所服稱之云

譚深號懷川大田鄉人由監生舉於鄉任曲江教諭
興學校勵氣節正文體諸生具贄概不受有貧寒
者時周恤之類宮圯廢捐廉重修莅任三載告歸
彼都人士呈請額留立去思碑居家馭下嚴而恕
教子孫毋奢毋傲毋比匪敦族睦鄰晚年喜讀瀛
溪手不釋卷患氣疾端坐而逝遺命戒子孫永不
得用浮屠後人至今遵之

譚益盛葛布鄉人讀書不拘常解不徇時好雍正甲
辰登鄉榜出宰於潛化澆俗長仁風環潛七邑稱

神君焉兩次充浙闈同考及致仕草服芒鞋怡情山水省存薪俸之餘悉均弟姪有種其友愛者曰非也吾親在貧不能奉養今以贍父母之子孫特少補前日之罪耳餘若磬道途恤貧乏人咸德之譚嵩鵬深之次子由國學膺鄉薦兩任閩中嵯大使再爲羅源等邑宰均未期年而遷及平和素稱廉邑觀政數閱月而民皆息爭嗣調歸化宰理六載重整圭山書院增膏伙多立鄉學設惠民倉放養兼盡因不阿時好解組歸田邑紳赴府籲留者人

滿衙署循聲載道因相爲製錦貞珉建祠去之口
攀轅泣餞護送三十里生平孝敬父母母早故每
臨墓涕泣父偶不豫旦夕侍湯藥衣不解帶及丁
艱哀毀骨立率諸弟守塚其性行類如此

丁賢拔藍田都金湯人制軍日昌之父也性慷慨好
義矜恤孤貧凡有善舉莫不樂而爲之湯俗素好
勝遂釀成紅白旗會頻年械鬪不息拔則力爲婉
勸解釋讐仇自出貲財具酒席邀請兩造叙好幾
至傾囊並無德色復倡集九十兩圖建藍田書院

良川
作假武修文盛事隆師重道遇修儒之困頓者遠
適多蒙其惠至於爲本文敦厥誼皆無非至誠至
性以啟惕孝弟忠信之端壽終六十有五生子七
以第六子貴贈光祿大夫

王耀曾環清高屏園人節孝歐陽氏子幼而穎異跬
步必謹凡出入起居悉遵母訓晨昏定省曲盡承
歡及長專事詩書正誼而不謀利遂遊庠食餼旋
由歲貢選授儒學生子七次子逢壽舞勺采芹三
薦鄉闈以優廩舉孝廉方正逢聖逢萬逢紀及孫

利賓年十四俱親見泮藻聯芳其時儒學張公夢
齡旌匾曰竇敎蘇傳夫婦壽逾九旬孫曾繁衍

鄒纘功字宗煌號留窻璜坑人幼失怙煢煢孑立母
彭氏每篝燈紡績督其勤學圖上進稍有倦怠則
含淚切責纘於是悚惕發憤領會師承窮研書史
年十九府試冠軍入泮旋食餼明經作歲貢嘉慶
五年出仕廣州儒學如其官封贈父母生子萬成
庠生成章外委孫觀光國學

連善和臨隍下埔醫生也性至孝母病劇效岑叟嘗

糞以驗之及母未葬寄柩河干和日夜不離左右
一日洪水陡至和只顧母柩不懼洶濤見者以爲
必死於水矣而竟無恙一夜柩前有虎嘯和偃臥
柩旁虎不敢近人皆竒其孝感所致而孝子之名
大著邑侯訪得其實給孝行可嘉匾旌之

楊汝弼字簡恪監生金甌寨人公正和睦篤實謙光
乾隆十一年舉爲鄉賓 恩賞八品冠帶江邑侯
廷隆旌以匾曰德望流芳五世孫成魁舉人成玉
歲貢成梧監生

張璋字文遠贈文林郎建橋鄉人大元四子幼失怙
事母彭氏人皆稱孝每朔望及二分節必親至父
坟哭拜日晡方歸生平質正持已勤儉成家娶配
朱氏亦克全婦道遇族戚貧乏不吝解推雍正時
洊饑出穀二百餘石濟賑全活多人且重道隆師
設鄉學立祀蒸修橋路施庵寺凡有善舉皆所力
行卒年六十八歲四代一堂生子四人權作科進
權達權中俱國學孫本立增生承立考授縣主簿
千秋乾隆辛卯舉人其餘文武科名後嗣繼起

黃子信監生城廂人持身儉素處世謙和家饒裕而
施與之事敦行不怠乾隆間由閩汀永定營葬父
坟於邑屬產溪嶂背鄉因卜居於攬秀街構書室
以培育人材士林羨之壽七十六而卒舉丈夫子
五

譚斯政字玉緒贈儒林郎大田鄉人隨父在南遷居
靈水鄉生平廉潔自持守正不阿取與之際毫無
苟且鄉曲間稱長者焉在家課農勸學矩矱先人
生五子皆成名孫曾林立詩書相繼

鄒宗智璜坑上興圍人生平潔清自矢勤儉起家乾隆間納監加衛千總銜乙卯大饑捐貲助賑存活甚衆族黨借貸不責償聽自便舉丈夫子二貢監各有成立親睹兩孫登科夫婦齊眉享壽八十七而終鄉人沐其德私謚曰良抑迄今人文熾盛

張廷高號雲峰雙螺口人性慷慨弗慳餘囊好行義舉嘗於本境礫下庵仔塘倡建佛寺爲民祈福取民物滋豐之義顏曰永豐欲人顧名思義也鄉之隔仔裡地方路通馬頭社渡梅嶺一帶羊腸鳥道

行人多病崎嶇因捐貲攘剔或砌以石或築之橋
往來皆便遇族鄰貧乏尤賙卹備至其德澤所流
傳後裔宜蕃衍也

吳子聰璜坑社人幼時未立家室及壯肩販生理見
鄉鄰構書舍輒樂助工年四十二始娶妻生四子
咸勗以讀書隆師重道供膳必潔婦亦極知大義
凡送塾盤匱務親自檢點第三子會深蜚聲庠序
欽賜副魁孫佩蘭郡庠曾孫鵬副貢書香接踵枝葉蕃昌
人以爲殷勤之報

張鴻翔號樂山雙螺口人援例入國學謙恭節儉不
事浮華惟以敦睦孝友教家人坦易和平處鄉黨
乾隆三十二年大水陡發溪流中獲一屍骸腐敗
莫辨細跡之復檢得耳環始知其爲婦人因出貲
收葬名曰水遇婆且永爲承祀衆論避之子五人
長文光監生次凌雲武舉三文芳歲貢四際雲例
貢五文思廩生

張鴻舉雙螺口人國學生性情端厚睦族和鄉平易
可親友愛篤雁行之雅笑言不苟排解消雀角之

爭而且建修寺院軫恤孤寒嚴道義於一介施丸藥於四民衆善奉行終身不怠人多稱感之

嚴自感舉鄉賓與官勝東俱大勝人雖異姓猶骨肉也好義樂施雍正十三年倡建盤石寺同施出有糧田糧山在寺前左右永爲香燈尤喜修橋路多金不吝迄今子孫昌盛足徵樂善之報焉

何之瓚棠荆鄉人捐授州同性醮謹質直好義和易待人嘗以平安卽福一語囑子孫作韋佩咸豐十一年市井無賴匪眦構釁勢等燎原幾釀巨禍瓚

之裔孫監生何作柱等體其先祖之瓚遺訓並奉
憲諭設法排解卽將瓚嘗抽出銀五百圓力爲調
停事得寢息知縣倪灃嘉其厚德傳芳復旌匾曰
誼敦桑梓瓚之孫支亦見蕃昌衣冠繼美

何應彬棠荆鄉人監生持身謙厚處世和平與人交
終日相對無疾言遽色勗子弟耕田輸課讀書揚
名諄諄不倦素志如此生子四長日熾庠生次日
銘國學三昌言歲貢四濯錦廩生孫曾多列秀監
城北建普濟橋濯錦分董斯役往來遠處勸捐皆

自備盤金不取給公項人皆稱其廉而好善

羅允昭大勝人恭敬明神不憚煩苦乾隆十三年夏旱盤石寺佛田涸昭胼胝手足濬鑿溝渠灌漑之檀樾主官嚴兩姓憫其勤勞因立牌名供祀寺內彭秉才字定邦下湯見龍圍人天性孝友奉庭幃間視定省無虛日父歿則情文備至卜吉葬於黃母塘湯池地離厝十里廬墓三年孝思不少衰及母故亦如喪父禮卜葬禾坪凹復廬墓越年疾作家入促勸回猶依依不允去尋病劇輿回家卒

吳元發字瑞齋璜坑社田背鄉人中乾隆辛卯武舉
勇藝超羣且疎財仗義與本邑武舉朱應魁同赴
會試乃抵京朱遽患病元發力爲延醫調治輒罔
效復備衾棺殮具科場竣卽親歷艱難扶柩舉直
至朱家所有盤川用費不吝餘囊亦並不索朱家
人致謝其矜氣誼世人所難後元發卒朱之妻子
聞訃哭往執喪以報其義至今猶嘖嘖人口焉
楊玉華紫荊洞人例貢玉祥同懷兄弟也和厚寬平
儻好善遇建修賑濟之事必實力奉行尤篤孔

懷寢食必共天倫樂事近世罕見立祀典設學租
且構家塾延師教子弟造就成材每課日必設盛
饌爲師潤筆子五人上兆炳龍庠生培清國學

楊國秀紫荆洞人楊貞曾孫慷慨豪俠與中書楊中
龍交最厚未遇時屢贈之他如修橋路周貧乏量
力而行並無吝色尤重師儒有德行者必尊禮之
卒年八十六歲子登榮十四歲遊庠孫曾蕃衍

鄒慶昌號兆平宗智孫嘉慶甲子科武舉由兵部簽
掣漕標以把總用性嚴正課督後進不偶恕排難

解紛人多畏服又道光間商同邑紳倡建普濟橋
往來行人咸利賴

鄒鵬飛號雲衢宗智次孫中嘉慶丁卯亞魁兵部簽
掣督運銜歸潮鎮左營効用當事嘉其材能欲委
任適丁內艱旋里服闋後竟甘居林下時論惜焉
居家隆師重道課讀勸耕好施與圍南有溝堤灌
溉糧田數百畝屢遭大水衝嚙輒煮粥召衆以勸
築之聞子弟呶聲慤勸獎勵不啻口出尤整飭

鄉規聞有販鴉芙蓉戲樗蒲者必詣縣請示禁絕
而後已卒年五十四歲第四子清華廩貢生次三
俱庠生孫支競秀

陳其昌隍隍人樂善好施凡祠墓庵廟道路橋梁無
不捐貲修建咸豐四年土匪擾亂奉憲設局籌餉
防勦朝夕勤勞七年及同治三年十年饑饉海臻
斗石騰貴倡捐平糶鄉人德之知縣李洪毓特爲
撰讚並旌以匾曰有裨鄉閭卒年七十七歲

吳世驥字策斯城廂人廩貢生天性真摯襟懷豁達
弟世驥有夙慧其封翁亦材以偉器期嘗嚴督責
未免過逼驥悚恍若不自容驥因窺其意善爲誘
掖一應書金京費始終周全遂致其弟揚名顯親
恩義兩無遺憾僉謂新造士泥書帖固由乃父勗
之亦賴乃兄成之也湯坑向有紅白旗會鄉糾鬪
頻年不解四民廢業流爲盜劫凡交界貿易通衢
行人皆裹足不敢近適驥在湯夥營質庫不惜貲
財一一爲之和解彼都人士至今稱道不衰知府

易公中孚嘉其辨和之賢能特獎以玉種藍田匾

子永燾拔貢永瀾十四入泮補增生永熙徽俱國學

吳玉鷗號伯璣南廂高田人候補府經歷幼聰敏善

事親母病頃刻不離嘗籲天願以身代及母故哀

毀盡禮服闋隨副將吳標平猺亂於平定連陽等

處叙功保陞將蒞任復丁父艱回籍遂終老焉次

子啟灝國學乾隆間知縣吳蘭濛舉爲邑賓旌以

善著鄉評匾生平以正直好善聞

吳光祖號健中新陂鄉人由監生加授衛千總幼聰

明英偉喜讀書因祖父年老倦勤遂膺庶務性慷
慨凡應祀廟庵祠墓以及橋梁道路皆不惜貲財
修建咸豐四年寇匪逼境驚擾人心光祖抱恙亟
請知縣敖翊臣諭飭各鄉紳士設局籌捐集義勇
團防堵禦詎匪擾大田鄉光祖自捐千金鼓率團
勇遂得殲厥巨魁餘孽殄滅地方賴以安全生平
喜勗後進嘗於其敦倫堂設文會課合宗姓之士
類而品評每年無間族戚寒畯尤加意周全他如
賑饑平糶排解紛爭人多稱感子騰飛廩生騰清

騰高騰琛俱國學孫世熙弱冠進庠

楊新號銘三紫荆洞人楊貞七世孫也品學純粹有
文名饒著作英年食餼膺恩貢最善講解生平教
授生徒成名者甚衆咸豐四年甲寅土匪逼城設
局團防鄉里安堵知縣敖翊臣獎以清白家風四
字子錫綸監生

詹文楷大溜隍人廩生篤志學業立品端方鄰里欽
之道光二十二年李觀察璋煜舉爲溜隍約正遇
事秉公屢肆肅然咸豐元年以方正二字題匾旌

之壽六十五歲

朱肯堂字繼之，臨東深村人。捐職州同，生平急公好義。道光十年，潮橋鹽餉虧缺，慷慨捐貲助補之。經布政司李獎給義以爲上四字匾。十二三年，潮屬大饑，設局賑濟，保活甚多。至今口碑載道。咸豐四年甲寅，土匪滋擾，奉憲辦團，自捐粟五百餘石，又捐軍餉四千兩，以資防堵。詐賊匪猖獗，陷市被陷，肯堂手不能刃，賊爲賊窘，逼憤懣死之。迨賊首古聲揚，就戮餘孽，勦平在事貢生彭景雲訓導譚史

等因聯名呈請獎卹知縣敖翊臣以賊迫捐軀其
推清白應卹給匾式以慰幽魂批准詳行道府經
吳郡尊均彙詳獎叙卒年五十八歲生子四長錦
池由增生選用訓導次錦洲由廩貢籤分兵部主
事現廣西卽補府加道銜三錦淮選用縣丞四錦
濤例貢生諸孫多採芹香一門濟美

楊蓉初號錦江水頭洋人恩貢生博學能文橐筆韓
江榕浦間學者多宗之性廉介當路之門非公不
至咸豐四年土匪寇警在局籌防出力知縣敖經

保獎六品頂戴壽七十歲

張錦帆號星槎雙螺口人郡廩生八歲時父既見背幸其兄文瀾勵以學遂篤詩書早年冠軍入泮居平嚴氣正性不務浮華惟敦任卹道光十二三年連遇饑荒帆家本非素豐見貧乏者每賙恤之幾至典物傾囊而不惜復倡集鄉中父老及殷實家勸捐米穀銀錢設廠監督賑濟全活甚多生子二長作猷歲貢次建勳列成均孫曾書香未艾

張文山號春風雙螺口人歲貢素有才望博學能文

應秋闈屢房薦不得志旋教授生徒出其門者多
知名士畢生謙恭和睦質直謹厚鄉鄰族黨構釁
爲之排解無不帖服咸豐四年土匪逼境山在局
督辦團防朝夕勞頓事平 上憲論功獎賞山曰
平寇破賊國家之福官民之幸於我何有堅辭不
受功獎同治九年倡闔邑重修學宮分董其事終
日無倦容其樸誠遜讓類如此壽七十四歲子伯
明附貢勵真庠生後嗣昌熾

劉東福環清劉家圍人善事孀祖母王氏以孝聞生

子玉樹聰明穎異弱冠承芹知縣許炳嘗贈以詩有謝家玉樹不凡材生長鵬湖錦繡堆之句後玉樹愈加勉勵攻習舉業旋選廩貢屢赴棘闈於光緒壬午科欽賜副貢人以爲母節子孝之報鄭超然號可凡環清鄭家園人庠生其父染喘症母王氏患瘋輒步履尤艱超百般延請醫師調治晝夜扶掖奉侍至二親歿故慙數十年無稍懈其妻鄧氏亦克相夫而盡婦道深得親心洵爲夫倡婦隨人皆賢之

鄒錦洲字往瀛瑣坑上興園人幼讀書不遇援例納
監鄉鄰有誦許者必與禮讓解之咸豐四年土匪
滋亂倡集義勇團練堵禦鄉里賴以安居恆布衣
蔬食彬彬儒素家風尤以讀書守分訓子姪卒年
六十八歲子世莊捐授州同請封二代

楊智周號慧軒紫荊洞人郡庠性廉介尤敦孝友居
平教學遇貧苦生徒不取脩脯咸豐四年同治四
年兩次土匪寇警設局防禦有功經知縣放保獎
六品齋居嘗賦詩云無人知爾方爲貴有地容吾

不負貧立腳莫隨流俗態持身休愧讀書人
可以想其志行矣

楊紹徽字肯堂監生砂田人敦孝友愛姪若親生偕
弟監生紹光治家整肅男女七十餘口皆和樂同
爨不分居且喜修橋路助建文廟修祠墓置嘗蒸
咸豐六年土匪寇擾市無米鬻施穀救贖人賢之
鄭江山潘田社人事親至孝其母病篤服藥無靈與
弟招發茶湯服侍時刻憂煩因再四詰之醫者答
云此非人肉莫可療矣江遂拔刀自割左腕肉一

塊重約兩餘卽欲烹而奉母忽昏倒在地幸救獲
甦厥後母病亦愈

余金聲潘田社人早失怙且家貧因爲人傭工度活
每回家省母必市肉親自烹而進側立俟母食竟
然後退蓋恐母老愛憐幼小分其餘甘故也母嘗
患目疾痛苦不安屢以舌舐之忽一日聞母呻吟
淒楚無可救解金聲愀然引刀自斬其左手食指
爲母分痛此天性之孝流露而不覺也

陳林濤字松軒潘田人附貢家頗饒裕讀書明理恤

孤憐貧咸豐丁巳游饑斗米千錢減價平糶遇困窮無告者免其穀價酌給量予多受其惠且性廉正公平排解紛爭人胥帖服伯兄早逝撫姪猶子每聘名師教育之更以義方是訓知縣劉超旌匾曰藩鄉望重門內子若姪濟濟衣冠長子藩郡庠朱文德字潤亭小隴隍居林鄉人捐授藩司理問祖武克繩慷慨好義道光甲申夏雨淋漓河水暴漲隴東一帶洪濤洶湧鄉中數百家窮厄乏食不舉火者五日德雇舟載米沿鄉賑濟毫無德色且修

築橋路另助瓦舖一間爲其祖祭蒸生子四長炳
光庠生煥光輝光同科歲薦三煌光國學孫秉權
秉綱俱廩生

張際雲號澄川例貢生雙螺口人謙和處世勤儉持
家事非正經不枉糜費而修橋路立祖蒸賑貧乏
雖傾囊不惜城北建大石橋捐鉅貲勸助逆藏事
知縣王啟棻旌以利物濟人匾贊美之子三長國
凝授布政司理問次國襄例貢國勳監生孫楷磨
恩貢生餘多遊庠納監

李廷英大勝人性好義施濟無吝容道光十三年邑
大饑自捐粟二百石賑贍鄉中困乏菜色得免壽
至八十有九子景裕慷慨有父風壽亦八旬同治
十一年合鄉紳耆呈請學憲何公廷謙旌之曰榜
榆式德

李南金號錫三北勝人例貢性忠厚品端方同治四
年髮匪陷嘉應金設局團防竭力籌辦任怨任勞
且倡修文祠葺橋路施義渡一切善事皆樂助捐
贊尤能排解鄰里事故壽六十五歲子吉常厚生

邱錫慶號善堂小勝人監生善體親心性慷慨兼具
幹材同治四年髮逆竄擾奉諭辦理局務知縣錢
誦清嘗稱之八年鄉有石橋被水冲塌自捐金貳
百倡修名其橋曰迴瀾復於大河杉坑幫施義渡
凡道路崎嶇不惜重貲鳩工修整凶年則糴米平
糶鄉人稱之

林文彬陷隍居林人家貧奉親以孝聞尤以謙順最
後進善解釋里黨紛爭若修築堤路勸捐義穀則
勤勞勦理不懈亦美德也子國藩廩生

張偉馥字仁齋監生藍田埔仔鄉人齡友之長子生
聰慧不苟笑言讀書明大義不事甲乙能成文章
年十八父見背時胞弟三尚幼馥綜持家務力任
其勞事寡母尤先意承顏視膳無缺建家塾延師
課督諸弟成名服物貲產之美而尤者悉讓與弟
無德色族黨有漢卜式之稱焉鄉有紛爭者正直
剖決寢息仇讎遇饑寒孤寡每周恤不吝丙午歲
稷施米粟粥食賑救且掩埋齒骼無數又獨鳩工
築造水鄉羊角壠大路坡等處石橋以免人病涉

復爲其二三世祖及殤弟營立祀蒸人皆德之壽
七十四卒易簀時猶手書毋侈靡毋怠惰毋聽內
言疏骨肉毋逞小忿棄宗親數語示子姪迄今後
嗣振起皆相守其遺訓云

黃建中例貢斗牛山鄉人寒素起家崇儒重道好施
與道光壬辰癸巳歲大祲倡捐賑穀二百餘石復
勸各股戶彙題俟助閩里皆賴安全焉生子三俱
成名壽七十三歲

吳亦槐號植之歲貢城內人經術湛深學問優裕公

平正直持已謙恭能繼父志廣行善事邑中文廟
文塔及普濟橋皆其身任倡修者至其處家則聯
子姓創祖祠篤友于訓子弟椿萱謝後一門百餘
口猶共爨同居所謂終其身不忍析箸也

朱德華號厚菴上林鄉人生有至性隆孝養篤友恭
及長教家庭以雍睦課子弟於讀畊重道崇師儀
型桑梓他如捐貲修造消弭訟爭矜卹孤寡周濟
貧寒諸善事皆樂行不倦海陽郭縣尹廉其品旌
以畧重梓鄉四字乾隆間遇歲饑倡捐粟賑濟吳

卷之六十一

邑侯蘭澂獎給孝義樂輸匾壽八十歲後嗣丕振

林亦俊豐政都人勤儉篤實悉懷承其祖父好施樂

善之遺恤孤憐貧造橋修路凡力所能為毫無吝

色雍正年間大饑俊親詣郡城勸捐穀千石量數

分賑人多感之海陽張邑令士璉嘉其慷慨好義

旌以能繼家聲匾表其門

朱承斌號全齋上林鄉人捐授正九品好施與鄉有

睚眦靡不力為排解時有兄弟爭產失歡幾釀鬪

狠斌即解已囊私向伊兄曰爾弟愿賠錢若干械

至伊弟處亦云爾兄愿賠語如前遂使伊兄弟各
釋舊嫌道光十二年壬辰邑大饑斌倡捐銀數百
兩救賑遠給米近給粥癸巳聯凶困窮者愈形憔悴
斌復謀諸同志捐賑幾有難色乃自罄家所存
穀百餘石獨行賑濟並賣租田二十餘石得估價
以益濟之鄉里於是少餓孳邑令丁旌澤洽鄉鄰
匾壽八十二歲親見二子采芹孫曾繞膝

羅星藍田上陽柵仔鄉人附生正直好義遇事排解
經張邑侯邦泰旌匾曰訓俗型方咸豐六年土匪

吳忠恕侵犯潮郡星督帶圍防招集義勇命次子
武生揚輝統率赴郡紫東橋頭鄉與賊接戰陣斬
賊徒甚多獲捷以功獎訓導銜子揚輝賞六品頂
戴又派義勇堵禦言嶺關將逆首紀阿服逐散鄉
邑晏然卒年八十六歲長子玉輝庠生孫曾蕃盛
杜亦彬字永發隕墮蓮塘人例貢孝友樂施嘗捐貲
葬先塋修橋路道光十二三年饑捐粟倡賑族鄰
咸沾其惠咸豐四年土匪古聲揚滋擾彬設局圍
防捐金助兵費經邑令赦翊臣以匾旌之壽六十

七歲

劉鴻俊字家柱監生藍田彭城鄉人早失怙事母以
孝稱且善排解修橋路立蒸產課讀耕與例貢家
勤等兄弟六人友愛倍篤丁傳百口五世不分居
咸豐四年土寇擾亂俊督鄉壯團練堵剿有功經
勅邑侯保獎八品頂戴同治五年髮逆竄北溪復
率勇協攻破滅道憲張公銑加獎六品銜

羅英傑藍田高尾鄉人監生性和厚善排解有因虧
財致爭傑爲解已囊代墊之不計償道光二十年

陳劉二姓因陂水構釁皆上控傑前往勸息不憚
辛勤撫憲鄧公深爲嘉獎以型仁講讓四字旌之
知府易公中孚旌匾曰息爭講讓其子元亨元魁
元亮孫國光干城俱相繼遊武庠國材武舉

魏邦澤陷隍後并鄉人公平處世耿介自持見人有
技輒讚歎不絕口遇窮約孤寒加意多爲矜恤若
愧無廣廈盡庇者然其性曠達如此年七十六歿
彭志先號尚亭產溪魏鄉人例貢居心正直約已濟
人尤拳拳於水源木木見祖祀有缺必愀然不樂

竭力經營以贍之所居鄉里多溝塗蹊徑募工修整化爲平坦且隆重師儒勗子弟於詩書講家人以禮讓勤耕播種善行嘖嘖人口焉

譚捷元靈水鄉人例貢秉性剛直有奇氣幼年承父志勤儉持家所置產業除立蒸祀外悉與弟姪輩均分不稍私蓄且樂善不倦凡有關世教風俗方便人事皆首先倡爲龍溪至黃金市相去三十餘里沿溪橋梁每年修造俱將伊父嘗內捐修永爲例卒年六十九歲子三人長史由增貢署興寧縣

學厚重慷慨具有父風次英挺英蓮俱國學贈修

職郎

柯光武陷隍長田鄉人六歲失怙其母魏氏年未及
艾日夜含悲武膝下瞻依每事承順稍長知母而
苦撫養悚惕自勵必勤儉持身方遂承歡之願於
是力謀耕種生活娶妻羅氏又能相助艱辛少有
贏餘而奉母必獻美新自食不厭粗糲遇周急濟
困諸善事則計足供母外雖傾囊亦樂爲之鄰里
有故不憚勞煩必極爲排解道光間陳邑侯舉爲

鄉正迨奉養其母至八十餘告終視膳未嘗稍缺
喪葬尤盡真誠里黨多稱道其孝焉夫婦俱壽逾
八旬卒

張騰萬字敬和建橋圍人國學家頗裕喜施與道光
壬辰癸巳饑捐穀倡賑並勸鄉中殷戶彙題減價
平糶困乏者多賴存活又縣城西大路乃通嘉應
番坑興甯長樂之衝行人每慮泥濘致多有撲跌
者萬則於獎坑石亭邊砌石修路並及廖屋角等
處僱匠鑿石條貳百餘丈沿路鋪成往來皆稱善

卒年五十六歲子步梯孫汝清俱膺正四品封

吳象大東

居人嗜書樂善忠厚傳家以六德六行誨

族黨一時彬彬有禮讓風縣令秦泰知其名延議

乙卯救荒協各紳舉行平糶並請開倉施粥救活

多人邑令深嘉乃績復俾倡勸捐修西門堤重建

聖廟炎帝廟鵬湖書院忠義節孝祠象繕書匾額
至今子孫多列膠庠猶恪守其遺風焉

鄭松布心耶人爲人忠厚卒業詩書非分之事一毫

不苟同治四年髮逆竄境松在局籌防破賊錢邑

侯申詳獎叙以恩貢加六品銜旋補授高州信

宜縣學乃將抵任壽既古稀加四卒生子四芹藻

揚芬

張懷勳建橋人孝廉千秋長孫讀書不遇性樸素與世無爭凡祖父所遺產業悉聽兄弟經營不以刻薄寡恩待子姪卒年五十歲以子嘉瀛由監生加授翰林院待詔請封登仕郎孫如棠例貢如棟如蘭俱國學會孫百濤鍊俱附生

張爲樑字希東建橋鄉人捐授衛千總性正直事父母兄弟極盡孝友人皆稱焉處鄉鄰族戚善排解

每朔望虔禮神明祖先畢必引古今孝弟忠信果報事化導族中長幼使知禮義廉節而不至比匪

道光十二三年連歲大饑設局捐穀賑濟平糶困乏者多賴安全又於逕心堡土凹頭牛眠地葉華村等處橋路鳩工籌貲修築以便行人卒年六十

歲

張光烈字裕堂建橋鄉人由監生考授漕運衛守備
加都司銜請封其太父祖周父粟二代昭武都尉
生平性端莊崇孝弟家饒裕不涉驕矜貌豐隆五
柳銀鬚過腹見之者皆目爲美髯公道光間疊載
饑荒設賑平糶多捐錢穀救濟甚衆凡貧乏借貸
不責償族黨德之且重道隆師培育子弟修築庵
廟橋路樂助勦成卒年五十六歲子六人長捷榮
捐授守禦所守府慷慨明達繼承父志次映葵邑
增生步榮登榮錦榮鎖榮俱國學孫曾濟濟成名

譚敬承大田社人孝廉廷僑孫聰明穎異繼守青緗
早歲入泮旋食餼膺歲薦舉動不苟嘗援諸葛經
綸惟謹慎句自勵自勗咸豐四年居廬遭土匪焚
劫貲產罄空敬承志不少挫復招集團勇督戰殲
滅同治四年髮逆由梅州竄境設局防守多有勤
勞事平邑令錢誦清詳請獎叙准以教諭銜邑中
重修 聖廟 萬壽宮及西門堤均與其役至如
友愛兄弟和睦鄉鄰人皆欽式壽終六十六歲子
六人鴻逵附生嘉珍國學餘亦克家

譚永志字德叟大樵社下潭鄉人監生居平忠厚篤
實恤寡濟貧和睦鄰里家業饒裕嘗創建房屋書
舍修祖坟立祀蒸且重道隆師諄督不倦勸耕課
讀勤勵後生年終八十二歲夫婦齊眉子二長永
璋例貢次永瓚國學孫謨道光辛巳舉人餘多成
名

譚永璋號達齋大樵社人幼承庭訓處世忍和嘗勉
受強宗產業價已盡償猶屢被增索不休且動
厲色惡聲挾制璋每含忍以禮下之使知自愧悔

而免禍患課子弟惟督率耕讀不與人競短爭長
致失族鄰情誼卒年七十歲生子五季子謨舉於
鄉餘俱國學

吳濟瀛號蓬洲橋背鄉人捐授衛千總天性孝友見
義勇爲咸豐四年土匪古聲揚倡亂直達城濠瀛
與在局諸紳募集義勇合官軍防禦擒賊殲之同
治四年髮逆竄入縣境北溪勢甚急復奉知縣錢
公誦清率團勇堵禦安全桑梓至如修學宮及城
隍龍王火神各廟修復西堤勸助晉賑捐辦義穀

皆竭力勸贊以底於成焉卒年六十四歲

丁初豐金湯人中丞日昌之姪孫也性純孝光緒五年隨其父母自羊城歸其母驟病途次無藥醫治豐日夜焚香默禱願以身代母病竟不瘳豐哀痛悲號水漿不入口者十數日家人屢勸之食且泣

曰視靈前供飯得吾母食吾卽食矣及至揭陽毀瘠旣憊旋得熱症病劇甚忽強起挽行於居室之西向其母停柩處望西哭拜竟不食死卒時年十

六中丞悼之因作記以表

原配賴氏聞訃由省城過門守節尤爲難得

彭應元號吉士產溪魏鄉人性聰敏喜讀書及長登國學善承父志克守成業尤能見義勇爲敦行不怠訓子具有義方雖幼稚不肯姑息嘗曰蒙養必以正云

彭桂先號月坡產溪魏鄉人例貢生幼失怙家貧淡艱苦備嘗惟恪遵母訓處兄弟怡怡如也因事經營頗有產業遂將膏腴之田租立爲祖蒸遇道路崎嶇必捐貲修之卒年六十九歲

吳文經號宿園增貢生田背人事親至孝尤能友于兄弟學行並敦名播郡邑髦年在鄉日以友恭示人鄰里化之巡撫德保聞其行給以雁翼齊騰匾獎焉後邑令傅修孟並撰壽聯贈云錦里著風聲德先孝友仙盤承露彩慶洽芝蘭皆紀實也然其生平大端不一乾隆乙卯歲大饑賑穀伍百餘石以甦人命不喜人稱頌迨後湯坑各姓械鬥幾欲抗官親往排解慷慨自任費銀數百兩而息閭端其居家處世皆可欽式有足風者

許養字宗廣乃賢良許申十五世孫也先代仕宦相繼至父許恭明洪武間由海陽外莆都遷居陷隍神沙鄉幼失怙事母極孝嘗自慨然曰祖德不彰親恩未報予之責也因懋自樹立創建祠宇凡事無論鉅細務稟奉母命及母卒哀哭盡禮卜葬站口虎地山廬墓三年人咸稱孝焉弟利字廣文亦以孝友著登洪武二十三年舉人曾孫鼎舉人任神砂縣知縣至今因名斯鄉雲仍蕃衍人以爲孝友之報云

何器璉號質齋松林小溪埧人少年力學志氣甚偉
兼擅書法邑中建文祠文塔俱竭力樂輸不稍吝
惜其治家規範宏遠嘗合兩代祖先蒸田撥立學
租以培後進弟一清從之遊昆季皆登歲薦

譚道字貫之大田鄉人孝廉廷雋之子少承庭訓爲
文沉思入細試轍冠軍但澀於遇年逾壯始獲一
矜屢赴秋闈並不以不售餒其氣彈琴嘯歌坦如
也弱不勝衣精明邁眾佐父創業建家塾以培子
弟且嚴立鄉規族黨敬服又嘗示其子曰吾無家

業可分汝曹惟傳此硯田耕穫汝其勿使荒蕪焉
斯可矣生子七長敬承歲貢其常廩生錫錫承從九
其源監生孫鴻達附生

吳錦洲庠生橋背人讀書善悟每見賞於塾師素性
謙和雖卑幼必加禮貌化怨怒不大聲色及門受
業者皆純謹有禮讓之風居家以耕讀勤儉課兒孫
至晚年進文庠爲分房內之開先其子監生重華
克承父道孫庠生鳳笙尙遵祖訓族戚咸欽重焉
林世德字心亭由從九功加六品階隍市人生平急

公好義咸豐四年甲寅土匪倡亂擾及兩隴知縣
敖公翊臣統集義勇親往勦捕並諭世德等設局
團防以資籌費詎賊勢猖獗圍逼官軍德不顧身
家奮力率團勇破之知縣揮軍長驅擒斬遂平遇
年饑每倡捐平糶至如排解忿爭和睦鄰里人多
稱之卒年七十一歲五子俱克家孫支競秀

劉淑元東隴寨子鄉人總角能文才情敏捷由廩膺
歲貢畢生渾厚喜怒不形行事皆準於義族鄰推
爲至誠君子童軍時曾爲督學覃公懋謙所賞

潛修白雲寺著作甚多未及刻遽夢玉樓

鄞翊清監生階隍寨內人品貌豐隆鬚長過腹生平
好義樂施道光壬辰癸巳年饑倡眾勸合市減米
價平糶貳月餘保活貧困無數咸豐丁巳饑奉縣
主諭設局平糶鄉里感戴甚多壽六十二而終子
文泰職員孫曾繞膝

朱衣德號黻堂下湯楊梅坑人性純孝喜施與事父
母及大母人無間言修築橋路尤捐助不吝乃生
四子而病劇易箒時以持家堅忍教子讀書囑其

妻張氏遂卒年五十四氏因從夫命專誠延師課
子供膳殷勤且矜恤孤寡多行善事里閭有巾幗
丈夫之稱他如每日以黑白豆分記功過說果報
以勵兒孫亦遵大上功過格而種心田也長子士
琦以州同請封二代次士瀛監生過嗣三宗沛廩
生餘皆克立

張紹景例贈修職郎粉菴人子華可忠厚相承隆師
重道凡利物濟人善舉量力行之不以家貲清淡
而輒阻里閭稱之孫炳菴廩生教授生徒誦誨不

倦多顯達者人以爲篤實輝光云

官辰雲例贈修職郎大勝人生平業醫濟世忠厚傳
家嘗以恤孤憐貧課讀力耕示訓子步陞監生尤
篤孝友爲族間貧乏者營嗣續絕支者承葬祀倡
修橋路多行方便人皆德焉

一耆壽

明羅仕傳鄉飲賓賜帛嘗捐資創建義塾壽九十三歲
有七世孫萬傑進士萬善舉人國珍舉人

國朝羅昺明郡學生員約已好施足跡不履公庭年至八
十三歲有子萬善國珍

張家達字右行生員建橋人篤志好學誠直不欺萬
歷四十五年入學歷試二十二科八十五歲猶能
應試康熙二十一年督學于覺世按試潮郡見其
鬚髮皓然諭之曰老生何不告退應曰尚喜作文

深異之給匾旌曰齒優好古年至八十七歲

張璩字如白建橋人公平正直善化鄉人有程處士

風賓飲於程邑知縣曹延懿旌以匾曰南金望重

王廷賓字俞臣歷試冠軍懷才未遇家居教授從學

日衆門下登賢書者有張豹變吳玉鷗王道符等

凡及門經其指授莫不有成生平溫和公正年至

七十六歲妻張氏年至八旬夫婦相處如賓有梁

孟之風次子增廣生靄雲能守其家學

王宗藩字萬宇湯坑人壽八十二歲雍正八年提四

令陳樹芝旌曰齒德雙輝

廖振琳大溜隍寨人爲人醇謹好施常捐資脩路雍正丙午丁未洊飢多周貧窮助喪墓前海陽縣知縣顏敏有匾旌之年至八十四歲夫婦齊眉子孫繞膝乾隆元年寨內大火鄰屋殆盡琳家獨無恙人以爲厚德之報

何宗富溜隍新池鄉人平生與物無競年九十有奇子孫繞膝矍鑠自如雍正元年 恩賜帛

羅奕卿字長侯上陽人爲人方正壽至八十六歲前

署潮州府趙光貴旌以匾曰齒德可風

羅兆吉上陽人生員羅俊拔父乾隆三年 恩賜帛

現年九十歲

巫乃文大樞社人現年八十六歲居家孝友接物謙
和鄉黨咸推重之訓子孫有方俱能勵志讀書長
孫廩膳生員巫馬光有文名

連朝相下埔鄉人居家敦睦鄰里稱之現年七十歲

張孟鸞藍田埔仔寨人孝奉雙親明教有才明靖難
兵起授都統府既而歸田順治時舉爲鄉飲大賓
精神矍鑠里黨式欽壽終九十二歲

陳竒龍號桂山由嘉應遷豐素有英勇當明季倡義
効忠安良除暴順治初隨饒鎮吳六竒討寇有功
屢題議叙給予叅將銜年老未仕創基占頭鄉爲
陳氏始祖焉壽終八十三歲

陳鵬英字漢翔占頭鄉人監生竒龍子康熙間考授
州同卓犖英偉表率鄉閭有父風壽九十五歲

張世裕號國器九河社密坑鄉人冠帶止九品性樸實以耕讀課子弟嘗云少年使務正業則匪僻無由生及老杖履優游鄉井間遇修橋梁闢道路等事莫不輸囊仗助道光元年知縣王奇雲旌以齒德堪羨四字壽八十一歲

朱孔珪小留陞人捐授布政司經歷居家孝友處世寬和海陽知縣顏公敏舉爲鄉飲正賓又以齒德兼優表其宅間壽八十三歲子六人

朱宗顯龍溪人質實和守壽屆百齡

陳義章字得中北勝占頭人奇龍五世孫壽一百零三歲親見六代孫曾繞膝百人 恩賜正六品冠帶並給建坊銀兩提學白公鎔題匾曰昇平人瑞
藩司者公善旌以盛世者英匾知縣陸翰爲之表
其異旌匾曰開邑百齡

胡香彬陷隍仙池鄉人友于甚篤處世和平里黨咸欽重之道光元年 恩賜帛壽九十七歲

朱彩鳳號丹山上林鄉人國學加授縣主簿性儉儉喜施予遇饑寒窘乏者量其老弱分給以錢米有

遭病者代爲醫治乾隆十五年歲大疫有捐穀平糶每日給粥二次如是月餘吳邑侯蘭澂以惠濟鄉鄰匾旌之居恆以忠厚詩書爲貽謀隆師重道無倦壽七十五子八人列貢監者五孫攀桂舉人吳泰盛字家敬監生城內人性寬厚休休有容處宗族鄉黨間和氣周浹不露稜角惟匪僻則深嫉之然猶不憚誥誡道光十二三年疊載饑饉率其子亦槐亦梯設法平糶並施粥倡賑全活甚衆子五人孫曾蕃衍五代同堂壽七十九歲

王鐸字瑞珍環清簾竹圍入生平正直和睦族戚鄰里有事必力爲排解康熙二十九年程鄉令申詳上憲給獎鄉飲大賓並旌望重彥方四字匾夫婦俱壽享九十餘子孫蕃衍

譚琨大樞社人例貢永璋長子幼習儒業輒躋於遇遂接衍聖公例捐分發山東屯田司廳因親老不敢遠離惟居家治事體乃祖乃父勤慎篤厚之心而成睦族和親之道其友愛昆弟矜恤貧寒鄰里推重壽至七十一子一孫二俱泮壁明經

吳涓賢字周佐城廂龍蟠圍人原海陽學增生康熙

六十一年舉鄉賓冠帶八品知縣顏敏以正直高

風旌之生平樂善凡周急濟困橋路庵廟力助贊

成人皆欽重壽八十二終子二人克斌國學孫景

蒸登仕郎景喜舉人曾孫世珂增生世漣職員世

壩武生拔補把總世培武生元孫永榮監生永華

國學贈奉直大夫攀龍潮鎮中營武生補用分府

俱臻眉壽永斌國學現年八十有六經提學馮公

爾昌旌以郭福彭年匾洵一門五代壽種傳芳

王時行龍溪人壽九十七歲

譚毓燕號善創靈水鄉人國學性和厚念高堂垂老
遂投筆硯勸家政訓子成立處已待人彬彬有禮
遇祖祠坟墓及近鄉橋路傾圮倡捐修復無吝無
怠壽七十五歲

譚步雲字斯榮大田鄉人家世業農竭力營作以事
母養老送終誠敬不違年七十援捐從九生平樸
厚寬和其家居近路過之者無論親鄰貧富必以
禮下之或留飲止宿焉壽八十五歲

張岐鳴號丹嵐建橋圍人縣主簿承立第四子三歲失恃年十四父復見背兄弟四人怡怡如也事後母巫氏一如所生視膳必躬親三十餘年無稍缺及母歿獨營松楸葬之好讀書圖進取艱於遇援入大學疊赴秋闈薦不售生平慎睦敦厚不尚浮華重道隆師論文不倦道光十二三年饑倡捐勸賑平糶族黨德焉生子六過嗣一親見孫嘉儀嘉樹均列膠庠嘉穀授從九孫曾環繞五代同堂壽八十九譚煥廷大田鄉人九歲失怙及就傳刻意讀書又嘗

以家業營懷爲憾廼援捐州同並請二代封典母
年八十四承歡膝下猶無怠意凡修建諸善事樂
助贊成梓里欽式年登耄壽夫婦齊眉

李向辰字星階小勝鄉人歲貢勤學善教游其門者
多顯名尤具幹濟咸豐四年土匪蠢動設局圍防
梓桑安堵七年復遇饑饉自運米五十石賑贍族
鄰人感惠而無菜色同治三年勸捐京倉籌助穀
石甚鉅至董修學宮倡建鄉中文祠排解紛爭修

築橋路皆所樂爲壽七十三歲子潤時監生

曹仕號竹田學前街人監生父早故煢煢孑立賴其
母喫啾養成及長經營生理家漸裕廼與弟創建
北門外祖祠分爨時爲弟姪各置田百餘畝乾隆
間邑大饑自捐米五十石助賑秦邑令秦給匾旌
之子六人長德忠貢生餘俱遊庠夫婦齊眉一堂
四代壽七十九歲

曹蓉號旭初歲貢生德忠之子竹田長孫也性穎異
博覽書史古文尤工書法食餼後選優學四次得

房薦六科爲傳邑令修孟所深愛邑中孝廉李維
楨諸人士嘗以詩文相高出其門者多獲雋王邑
令竒雲延之鵬湖主講裁成後進品詣氣量眾所
欽崇壽七十終子六

曹對墀字公明學前人從九品性嚴正持己廉讓尤
篤友于生平精業堪興重道隆師栽培子弟誠敬
無倦及老眉案相高孫曾繞膝壽至八十有二生
子四佐清永清俱生員永瀨瀨監生孫作柱附生

吳成得字葆亭南廂高田人國學生平孝友族戚無

聞言性好施砌橋修路終歲不輟有貧乏告貸者輒與之不責償居家購置熊胆聞有毒者雖雪夜雨天必親送至其門極力救濟邑令邵應鳳性情耿介少爲其所許可若而獨謂成得賢旌以濟世耆英匾壽八十四無疾而終子四長開炳嘉慶丁卯欽賜副魁次開煥州同開輝監生錫疇歲貢楊善先北勝砂田人捐授九品孝友和睦忠厚至誠凡修建施濟之事傾囊爲之無吝色明敏好學喜談史傳歷延名師課督後進鄉中文風因以丕振

壽九十五歲夫婦齊眉

陳肇昌號展亭北勝丹竹鄉人捐授州同質直好義
嘗爲人排難解紛其立祖蒸助祭費尤無德色遇
崎嶇道路必修築之且造橋梁施義渡人皆賴焉
壽至九十一歲

朱鴻勳監生北勝人忠厚純朴敦善不怠尤能重道
隆師以栽培子弟壽九十歲子景星國學承父志
而篤實鄉里推稱

林輝祖例貢生南陽人寬平和睦有和父風修橋路

周貧乏靡不樂爲年八十八歲夫婦齊眉嘉慶二十一年儒學林蔚華贈以五代同堂匾後裔昌熾陳振常字立齋占頭人例貢生賑濟貧窮樂行善事父子繼孫家道寢熾夫婦俱年躋八十有四三子皆英俊

程華翠金湯鄉人忠厚誠實壽一百零一歲光緒二年知縣李公洪毓申詳大憲賞給冠帶耆賓

陳星麟字朗亭從九占頭人質直好義忠厚傳家遇鄉鄰有事必力爲排解息事壽八十五歲

闕紹漢北勝溪西鄉人性情慷慨好善樂施凡橋道
傾頽不愜修費嘗倡建潭江義渡利涉利人縣城
北建造大石橋竭力捐輸助成壽九十二歲

李輔猷號亮之小勝人附貢生公正勤慎從遊生徒
皆蒙其講解貫通而多獲雋尤好行善事倡建鄉
中文祠以振士風咸豐四年土匪滋擾陷隍等處
奉憲設局團防遇隘口築柵籌捐經費鄉里賴以
安至如解忿爭嚴約束人多感之夫婦俱稀五歲
歐陽希聖號杏亭松林社長美人歲貢性聰敏善屬

文家道清貧而心地活潑每當朋儕讌集談論之際輒以所自題唱詩詞呈席上令人評賞惜未及刻其詼諧雅趣聞者多盪心胸從之遊皆一時名士如孝廉吳紅張雲錦楊成魁則領受真學問者也餘亦有雋品壽七十六而終

吳泰崙原璜坑高車田人移居南廂精堪輿人多以地仙目之知縣趙培蘭見其髦年猶精神矍鑠視履安閒旌以匾曰瑞應期頤壽九十三歲子雨膏監生孫曾振起術業傳家

楊鴻佐湯肯人監生寬平正直和睦宗族尤篤友恭

門內翕然遇鄉里有事必排解和息且好施濟救

急無德色壽八十六歲子耿光國學孫登雲武庠

步程

陳河書占頭人例貢生性和厚因妻無出而娶妾夫

婦均安義命語默不苟門外罕聞笑罵聲恤孤憐

貧皆所樂爲里閭中有詬諍者多觀感而化書與

妻曾氏壽俱耄耄妾李氏現存八十八歲繞膝間

安者九十餘人

李樹金號荆山小勝人性長厚多行方便壯歲入成

均家有盈餘凡所借貸不以重利剝取人壽九十
三歲五代同堂子上搏州同曾孫作舟中書

劉藜輝號乙齋環清劉家園人增生睦族和鄰禮義
是守事親克盡承歡及居喪寢苦枕塊卒哭不衰
上秋闈十二次膺房薦者五與妻譚氏眉壽相高
俱登九十歲子國華芝華孫建平俱遊雍且均見
鬚髮皓蒼若有壽種

李篤蕃號杏園小勝人捐授州同急公好義咸豐四
年土匪擾亂籌捐鉅金設局團防軍費事平知縣

敖公翊臣請獎優叙壽八十四歲子南金例貢孫
嘉賓監生吉常附生國賓布經歷

王煥文號網園環清篋竹園人生平莊重捐介守分
安貧嗜書史遊庠補增五應鄉試不售而志不少
毅咸豐丙辰補行乙卯科年已八十餘猶赴粵入
秋闈膺 欽賜副榜卒年九十一歲

邱國珍小勝人謙厚和忍耕讀傳家一堂四代肅然
雍睦壽九十歲子文炳文蔚俱監生後裔昌熾

李承訓監生小勝人佳瓊孫性仁慈喜施與遇寒士

應試必助斧資捐修橋路尤不吝惜鉅費居平不
喜殺生以爲有傷物命壽八十五歲五代同堂子
春華器華俱監生虎臣 欽賜副榜孫曾蕃衍

李騰雲小勝人監生忠厚和平與人無忤精神矍鑠
愈老如常壽八十七歲子振聯國學

李良桂監生小勝人性情和易鄉里推稱至老康健
壽九十三歲

李國英字子京小勝人自幼庭闈侍奉得親歡心尤
善養天和壽九十三歲童顏鶴髮夫婦齊眉

劉致中號位堂環清劉家園人性淡泊寡言笑立品
端方成童遊泮旋選拔元及門如禮部掌印郎中
吳世驥舉人羅萬史俱知名士惠潮嘉道李公璋
煜延教小學孝經壽八十四歲子錫榮監生孫名
揚庠生

王琳號玉山環清桂堂園人生平秉正嫉邪落落不
羈篤志好學期及於古不屑屑於時派故采芹食
餼皆冠軍旋膺恩貢卒年八十一歲子之柱附生
吳開祜號祉軒新陂鄉人捐授按察司叅軍忠厚待

見川界
人樂善不倦詩書啟後世濟其美夫婦俱八十有
餘歲

劉玉樹號皎亭環清堡人性質和坦早歲遊庠旋膺
廩貢光緒壬午欽賜副魁癸未重遊泮水康健如
常時年八十八歲夫婦齊眉

陳應恆藍田里仁圍人捐授縣丞現年八十九歲夫
婦齊眉曾元遠膝親見七代五代同堂光緒八年
邑紳丁中丞日昌以其年高德劭邀藍田局及諸

紳僉報經知縣許譜濟據情詳請

督轉奏在案

羅鶴鳴大勝人八品頂戴嗜善如渴見義必爲遇荒
年米穀騰貴倡合鄉減價平糶助賑貧乏人多德
之晚景杖履倡隨夫婦俱壽臻九十一子發盛貢
羅元龍大勝人軍功六品性情和煦謹厚寬平壽八
十五歲身猶強健子光耀監生文耀貢生

徐玉鼎大勝人素有隱德以醫業濟人髦年將所存
賑券悉付祝融且曰毋留此爲子孫禍其妻陳氏
賦性端良亦愆戇成之夫婦壽屆遐齡

蘇振榮號蓄齋大勝人從九忠厚寬和惟以耕讀課

子弟壽九十歲子文盛貢生文明監生文華從九
蘇振興大勝人從九謙遜和讓與人無忤里中有事
輒不煩言以解人多敬服壽七十六歲子宗學宗
海皆以攻破土匪獎給八品頂戴

林華明小勝人臨事勤慎存心恕謙課讀勤耕守約
節儉夫婦俱壽登八十七歲子孫繞膝二十餘人
簡乘通龍溪人居心長厚處世以和聞子弟趨向端
正輒稱許獎勵以陶成之鄉里有刻薄事必斥之
雖小事不偶恕壽九十五歲

吳亦梯號步之國學泰盛次子勤儉治家庭韓肅然
城北重建普濟大橋經費動以萬計乃兄亦槐命
綜理會計一切賬務至公至明纖毫不染咸豐四
年土匪古聲揚擾亂捐貲保禦城鄉七年邑內游
饑倡議平糶同治年間潮州府汪政舉爲族正處
斷世務人皆帖服壽九十六歲

吳世謨號弼臣城廂人幼讀父書躋於數捐授從九
具幹才凡族鄰齟齬不合事輒爲排解人皆服從
咸豐四年土匪侵擾設局團練防守城池七年大

饑勸集城鄉殷戶捐貲買米穀平糶同治四年髮
逆由梅州竄擾北溪白溪堪等處誤董理總局於
十二月二十三日聞警親督團勇隨署知縣錢誦
清馳往該處堵禦擒斬賊匪數十餘衆卽協左相
國及各營官軍圍繞截殺賊潰平知縣申詳督憲
瑞公麟撫憲李公福奏獎給六品銜九年馮邑令
寶封諭督修城垣及西門火神堤節孝祠鵬湖書
院靡不竭力奉公壽七十四卒長子永珍郡廩生
彭炳光產溪魏鄉人性和易與人交無疾言遽色見

義勇爲凡水陸道途有傾圯險阻難行者必設法
籌費修補填砌至老不懈且輕貲財不靳施濟里
黨咸稱道焉壽八十歲舉鄉賓

劉家勤字致佑例貢生藍田彭城鄉人與弟鴻俊等
兄弟六人怡怡如也丁男百口五世同居事寡母
極盡職勗子弟以讀耕處鄰里族黨忠厚正直不
矜財不使氣人咸欽之四代一堂壽臻九十歲

羅元魁武生藍田高尾鄉人忠厚謙恭與人無忤善
排解人皆敬服且武藝擅長教徒日盛習其技者

多獲捷如登鷹宴之子國材姪定江俱得妙技者
也壽七十九夫婦齊眉孫曾繞膝

楊肇榮砂田人例貢自幼貧苦及壯經商致富誠實
不欺急公好義立祀典建書室延師儒培育鄉中
子弟成材文風振盛閭里稱之壽八十八歲

陳振紀例貢占頭鄉人夫婦俱壽登九十一家貲厚
寶樂善好施足跡不履公庭凡創修賑濟之事力
行不辭鄉里德之

游尚綱陷隍南坑人家敦朴實道光二十六年儒學

李從吾請准給鄉飲大賓娶配峙溪藍氏夫婦齊
眉壽九十五歲子勲來瑟來俱成均孫益明附生
蔡鴻集陷隍赤嶺人素性樸厚眉壽傳芳年九十三
與兄弟鴻來鴻立俱壽九十蒙 皇恩賜帛集之
長子喜春壽九十三 恩賜冠帶次喜盛咸豐十
年儒學李從吾選舉鄉賓並旌齒德兼優匾時年
九十一歲三喜陞同治四年道憲張公銑獎以八
品軍功現年八十八歲一門壽考

劉鼎廷產溪白土鄉人忠厚樸誠事多諳鍊一言一

動胥合法程更喜引迪後進鄉中子弟莫不就而正之而矍鑠精神亦能隨時啟悟使各洽其情而去壽百零五歲鶴髮童顏孫曾林立

汪鳴陽號彩閣陷隍埔頭鄉人心性和平彬彬儒雅素習醫好行陰德施濟不務名凡遠近延請無論風雨寒暑輒迅步而往至老不倦壽七十五歲

魏鳳梧小陷隍人素業儒醫性情長厚方便救人之事敦行不怠咸豐十年儒學李從吾舉爲鄉賓壽

七十五卒

楊顯杰號英亭小樵人精醫理光緒六年督學馮公爾昌旌以仁術延齡匾先是同治四年髮逆寇警奉知縣錢誦清帮理團防保獎儘先把總現年九十四歲子璿璣在事出力獎六品頂戴

曹文煥號斐然監生學前街人同治四年在局辦團獎給六品 年七十五歲子輝光監生

楊紀廷字毅然紫荆洞人居平謙素和睦重道隆師知縣許公普濟旌以鄉閭欽式匾壽終七十五歲長子金聲歲貢生

李文珍號容軒小勝人捐授州同並請封典性寬厚
年七十六歲二子鷹揚雁揚俱國學

李春蘭小勝人監生 年七十九歲子二梓芳貢生
梅芳監生

楊德成號懋堂小樵人例貢生 年七十五歲子攀
梯附生其儀監生

譚史號蔗園靈水鄉人性純厚好施與由增貢任興
甯縣訓導甚得士心同治四年復委署信宜學光
緒壬午科欽賜副魁卒年八十三歲

杜育萬九河小湯鄉人生平質直與人無爭惟以課
讀勸耕是務壽至百歲夫婦齊眉曾元繞膝子國
英孫乃聘俱年躋耄耄洵爲一堂皓首五代承顏
咸羨其有壽種焉

杜國英小湯鄉育萬次子天性純孝人品謙恭事親
而無缺旨甘居家則教之勤儉壽九十六而終子
乃聘克承孝順一室雍和五代同堂亦含飴樂事
聘年八十有四歲

杜紹揚字斯標九河小湯人讀書不遇寄跡林泉性

方正而處事和平同胞四人家口數十雖不素豐
竊欲效張公不分居故事間里稱之現年八十四
歲視履矍鑠

何仕珍隍蓮塘人和睦樸厚年九十一壽夫婦齊
眉子國瑞亦現屆古稀

劉永傑東留寨仔鄉人例貢生平樂善好施輕財重
義持躬接物鄉黨推稱卒年八十八歲其妻陳氏
皆以爲賢孝壽至百有八歲

余開基監生留隍後井鄉人素性真誠樸厚交遊有

合義之風壽終八十歲

李瀛洲字梯雲捐授從八品小勝人性忠厚練達

年七十六歲子煒光監生國楨廩生

黃頤昆字鍾鎮陷隍三樂巷人從九銜和睦鄰里厚實持家壽終八十五歲

許樂天藍田八鄉人嗜學不倦經九十歲縣府前列始入泮越年九十一旋卒

蔡廷肅字國瑚大隍隍人溫厚謙恭和睦鄉鄰倡建橋廟無少吝惜里中後進咸奉爲楷模道光年間

道憲李公璋煜遴爲鄉正梁案齊眉壽七十二歲
子仁良能承父志克家

胡恭偉小隍隍人生平溫厚和平不慕榮利教子弟
安分自守每以栢廬家訓爲箴規壽八十三歲

蔡耀晃字廷榮大隍隍人監生誠樸不欺作事嘗留
餘地且曰無餘則滿滿則招損明知其損而故招
之不亦愚乎至七十歲猶健飯夫義婦順焉

魏家合小隍隍人天性篤實最善養心耄年猶兩眼
精明且能短檠下作繩頭細字壽八十二卒

魏梯雲小陷隍人生平崇正嫉邪鄉里矜式咸豐元年舉鄉賓壽七十五歲

蔡廷治大陷隍人性質直言動不苟道光二十年蒙恩賜冠帶壽九十二歲

朱纘先拔溪鄉人生平確信因果於太上感應篇一書竭力奉行至老不倦且英姿健舉結束在莊襟老帶間不需鳩杖而神氣百倍壽至百齡督學吳公寶恕以慶錫期願匾褒之

朱桂芳生員下湯上林鄉人生平好善樂施事父母

人皆稱孝且處世謙恭族鄰和睦壽九十三歲無疾而終孫曾蕃衍

何作懋潘田上坑人生平勤儉持家謙和處世凡修建橋路祖墳增祀產心不存私鄉黨咸推重焉援例捐授從九年八十二不疾西歸人以爲好心故善終云子之洲附生

彭廷聘號清逸產溪魏鄉人秉性倜儻家道整齊專以延師課督子弟爲務尤好行善事見水陸險阻寺廟傾頽捐金修之不較繁甿又嘗設鄉規寓勸

懲不苛於法頑梗向風壽九十三歲

彭芝勲號克明產溪魏鄉人嚴氣正性人莫敢以私
惠干道憲陳公舉族正里黨胥敬服焉道光十二
三年連饑鵠形遍野勲惻然捐賑多荷存活間有
借貸輒與之不責償壽八十九歲夫婦齊眉

彭如耀產溪魏鄉人勤儉持家善和鄰里道光年間
洪水屢患冲塌舖戶民房指不勝屈耀極力彌縫
稟請楊邑侯昭詣勘撫卹復捐已貲量災分賑衆
心乃安邑侯表其閭曰謹敦桑梓壽八十一歲

廖烘字亦奎隍人現年七十六歲相莊眉案雙鑠

自如

黃情山小隍人咸豐二年舉鄉賓同治四年髮逆

騷擾團防出力道憲張公銑獎給六品軍功現年

九十一歲子鶴松附生

鄞浙豐隍寨內人咸豐二年舉鄉賓經儒學李從

吾給照現年八十九歲

鄞毓璠號馥亭大隍人從九道憲李璋煜舉爲

約正知縣李振傑因土匪滋亂舉爲團練總時

年八十四歲

陳曜東字紫來占頭鄉人咸豐六年同治四年髮逆
兩陷嘉應曜東辦理團防以功獎六品銜督學吳
公寶恕旌匾曰善氣延年時年七十三歲子期泰
監生期昌廩生

詹耀奎陷隍人佾生時年八十六歲

廖江湖例貢官溪人性慷慨多行善事邑屬與饒平
界溪水深險行人病涉江湖獨捐貲建築橋梁名
曰萬安又於大水唇造橋名報德俱以石砌成所

費不靳千金且到頭凹一路山勢崎嶇復營已貲
建茶亭壹座並撥田租二十餘石每歲夏買辦茶
水以解往來之渴煩他如倡建本鄉文祠修道途
設義渡多不借題欸而樂善成人皆德之壽至古
稀子智仁生員次入大學孫曾蕃衍

楊顯嶽布心社埧園人居家儉樸處世惇誠嘗與人
坐談必舉勤讀力耕毋好訟一語勉勵後生壽八
十八歲

方伎志

林亦全字建陽冠帶鄉賓由饒遷豐而居南陽爲林氏始祖生平廉厚業醫學精脈理以施藥濟世診之者投以方藥雖沉疴立見神效尤明通痘科前時海陽邑令顏公敏因母病篤延全診治病立起雍正六年贈以指下回生匾迄今子孫蕃衍

彭朝綱號紀堂監生下湯人精脈訣習竒方以醫業名世屢應効驗人多德之次子錦標繼承其術援入大學後嗣克昌

鄒錫綸璜坑田心人世業刀圭好行陰德貧乏家及
急症贈送丸藥不取酬儀子世卓能傳秘授

盧精一北勝南陽人業岐黃性樸實人延之診視雖
風雨遠涉必馳至無論貧富不問酬其救危濟世
行之終身壽八十授冠帶

節烈節孝志

明羅尾娘上陽羅敬恕女自幼不妄言笑年十七歸揭

邑霖田湖口高姓十九夫亡哀慟數日遂自縊

國朝宋氏貢生宋兆椿女年十九歸舉人吳啟音爲繼室

二十六歲啟晉病亡一子未周歲孝奉舅姑誨子

成象讀書成名苦節幾三十載前海陽縣知縣朱

一鳳詳請旌表

張氏環清堡鄭邦懷妻二十五歲夫亡守節年至七

十二歲康熙四十四年程鄉縣知縣郭廷祚旌以

匾曰光耀竹扉

歐氏名錦娘松林社湖洋樓歐子靖女幼許字吳汝
潤及笄未婚而汝潤病亡錦娘聞報哀痛欲絕三
日不食七日後潛至汝潤墓哭拜是晚回家自縊
鄒氏副將鄒瑞女監生吳廷選妻年二十四夫故一
子僅三歲氏紡績事親婦兼子職篝燈課子母備
師儀卒年八十五歲

彭氏在城生員吳三彪妻彪幼穎異十五入海陽縣
學勵志讀書二十六歲病故無子近族無可繼者

時氏年僅二十四歲號泣三年未嘗見齒苦守七載始得夫弟之子芳爲後姑病刻不離側藥必親嘗教子成名得入太學卒年八十五歲

呂氏州同吳廷遜妻年二十四夫亡無子立夫弟次子爲嗣氏孝事姑孀訓子成立後入太學孫嗣鵠起堂列四代年八十六歲前海陽縣知縣顏敏旌

匾孝節流芳

馮氏在城吳三鷗妻年二十三鷗亡遺孤子捷未周一歲四壁蕭然甘負苦節上奉舅姑下撫幼子歷

四十六年如一日四代一堂年六十九歲

譚氏監生譚方明長女吳鐘舊將吳豹爲第三子吳子寬聘之未婚而寬歿氏聞報哭泣終日不食卽欲奔喪父母屢止之不能未逾月過吳門衰服三年甘心守節立有嗣子振第爲後

陳氏副榜陳棐五長女生員吳州彥子漢若之妻二十三歲夫故遺腹生子懷源氏事老撫幼苦節自守卒年八十四歲

吳氏下湯社雙螺口人生員吳三彪女監生張元卿

媳夫張啟庸二十七歲病亡時年二十五生一子
三多甫三歲氏事舅姑克孝守節二十八年卒年
六十五歲子入太學孫嗣森盛康熙六十年海陽
縣知縣顏敏旌匾節孝可風

林氏歲貢林作棟女總兵吳啟鎮媳生員吳成孝妻
二十四歲夫亡氏飲水茹孽勤撫幼子開瓚延師
訓課身刻成均現年七十六歲康熙六十一年海
陽縣知縣顏敏曾給匾旌之

劉氏監生羅焜祖母年二十五夫歿守節至九十二

歲雍正元年 恩賜帛

林氏曹寨鄉陳顯卿妻年十八于歸二十四歲夫故撫孤至十六歲而孤歿氏堅墾族衆僉立夫弟生員陳鳳儀四子振飛爲後時甫十歲氏訓之後入太學孫嗣森立年至六十計苦節二十六年

陳氏上陽羅義烈妻十九歸羅二十一歲夫亡守節孝事舅姑遺腹舉男旬後舉雍正元年武鄉試經正四年奉

旨建坊旌表祀節孝祠

吳氏上陽羅文士妻三十而寡守節七十年壽百歲
恩賜旌帛

陳氏上陽羅畧如妻年十六歸羅三載夫亡家貧力
紡績事姑舅撫遺孤守節至八十七歲雍正九年
揭陽令陳樹芝旌曰孝節可欽十三年 恩賜帛

葉氏環清堡王正遠妻生員葉文斌季女十九歸王
九載而寡夫病時親嘗湯藥不離左右歿之日撫
棺悲痛欲絕舅姑俱暮年奉養得其歡心撫孤順
泰成立列名太學計正苦節者二十八載乾隆八

年春合邑紳士僉呈督學梁文山旌匾砥節松筠
張氏藍田湖陂鄉羅明侯妻貢生羅山澤媳年十七
歸羅二十九歲夫亡是時雙白在堂二孤年幼事
親撫孤始終不懈長子天漢補邑弟子貞氏年四
十八而歿

林氏下埔鄉連朝烈妻年十六歸連二十二歲夫亡
遺孤僅五月林事老撫孤備極艱辛守節者五十
年乾隆十年知縣葛曙旌之曰霜筠茂節

朱氏在城生員吳三俊媳夫啟昌歿時氏年三十三

歲僅遺一子成良氏撫之惟恐不至一以勤儉治家子不朮年復撫孤孫開京開雲成立卒年八十二歲乾隆十年知縣葛曙旌匾松筠晚茂

馮氏鄉飲賓馮煥公女卽朱氏子成良之妻成良病故氏年二十事孀姑惟謹撫二孤開京開雲訓導有方現年五十五歲乾隆十年知縣葛曙旌匾正節嗣徽前知縣王如珩於乾隆七年合旌之曰雙節垂範

朱氏鳳娘生員朱以德長女年十八歸生員吳三近

長子吳啟煥爲室二十五歲夫故遺孤成集年甫
四歲撫育訓誨備極苦心得入國學現年六十一
歲

謝氏產溪彭奕瑞妻夫亡守節撫子振蛟成立名人
太學

朱氏大田社朱可珍女胡良瑄妻年二十六生二子
而夫歿家貧日夜紡績以養繼姑謝氏及姑目廢
八載寢食不離亡後負土築塋訓幼子有方現年
七十七歲

彭氏大匠社朱世豪妻生四子二十八歲夫故氏事老訓幼備盡婦道第四子煌及孫三人俱列成均氏現年八十五歲

劉氏卽彭氏長子朱正立妻劉三尹女年十七歸朱甫二載夫故痛哭幾不欲生遺腹四月後舉一子養孀姑撫孤幼孝慈兼至年六十八事彭氏始終不懈云

張氏下湯社人監生彭文縉妻二十九歲夫亡一子甫七歲苦節自守事姑盡孝課子成名鄉黨咸稱

之現年七十五歲

徐氏藍田都新棠鄉曾殿侯妻年十八歸會二十九夫亡遺孤世茂年僅二歲堂有白髮雙親生養死葬俱氏任之訓子後入太學氏現年七十五歲

羅氏金湯寨周元捷妻年十六歸周二十二歲夫亡並無兄弟侍養舅姑得其歡心歿之日喪葬盡禮撫二子建五建常俱各成立氏現年六十五歲

羅氏監生羅基蒙女副將吳啟鎮爲子成亨聘之年十五歸吳二十五夫歿皆志守節子又早喪助媳

撫養孤孫時年六十五歲

黎大娘大樵社橋背人黎永學長女吳啟義妻年十七而嫁未百日啟義病亡氏痛哭氣絕其母救醒隨嚼指出血誓不改節哀求夫兄啟仁次子成繼

繼嗣時年五十五歲

吳氏上林坑朱文麟妻年二十歲夫亡無子立夫兄之子爲嗣氏子立事姑孝養無缺撫孤成家時年五十一歲

彭氏仙洞鄉彭爲霖女劉宏售妻年二十四夫亡守

節遺孫栢止四歲撫育成立孫曾三代繞膝時年
六十四歲

續修 咸豐四年邑侯張 邦泰 蔣 成璪彙詳

督 撫列大憲轉咨

部文覆准在案奉

旨旌表入祀節孝祠姓氏牌名臚列於後

計明

欽旌貞慈孝義譚龍姑儒士吳子寬字啟紆之聘而未婚
妻聞寬歿過門守節志勁松堅經併建坊於龍蟠

圖門首

張氏松林鄉何敬夫妻夫病永訣時氏年二十一舉
一遺腹子持家有法事舅姑必柔恭教子應瑤成
立慈訓端肅動無違則再傳孫器連一清俱列明
經乾隆三十年經奉

旨旌表部頒清標彤管四字儒學謝堽旌其間曰松筠多
節並賜詩一章褒美云清標彤管久香薰

御賜題名單五雲莫說老天無報應眼前雙鶴立雞羣卒
年八十一歲

欽旌王氏儒童曹增玉妻城廂人年十五夫亡氏甘心守節泣訴舅姑立嗣繼後清操苦志教子昌成均孫

文謨庠生經道光元年呈請詳准旌表建坊

劉氏監生譚淮之妻部准旌清標彤管

楊氏儒士李善宣妻

李氏儒士張光樹妻北勝白芒輦人氏年十八于歸

二十夫故堅貞自矢事舅姑撫孤兒孝慈兼至家

道饒裕樂爲推解至今鄉人頌德弗衰壽七十四

歲經邑侯丁公澐漳旌匾曰栢節松心

光樹卽光恕

張氏儒士吳泰深之妻

鄒氏儒士張永春之妻

吳氏儒士張懷彬之妻建橋人氏二十一歲寡居幽

貞淑儉盡職孝姑媪茹荼教嗣子卒年六十八歲

王氏儒士吳亦楷之妻

鍾氏儒士張光第之妻北勝官溪人十六歲適張二

十五而寡與兄嫂李氏同門守節撫一子成立丁

令澧漳以栢節松心四字共旌之

李氏事見前

羅氏儒士劉振千之妻

劉氏環清填上園儒士王用行妻年二十七失偶孝
養翁姑婦職無忝一子承志撫之成立名列園橋
孫六鳴鸞職員鳴謙國學卒年八十二歲

徐氏儒士梁承宗之妻

巫氏儒士張敬韶之妻

曾溫氏儒士陳永灼之妻

劉氏儒士彭亦機之妻

劉氏儒士張灃之妻經學憲史公夢琦旌以栢節爾
芳四字卒年七十五歲建橋人

楊氏儒士李亦晟之妻

謝氏儒士張纘王之妻

胡氏儒士陳高通之妻

陳林氏儒士馮振衡之妻

劉氏儒士彭成旺之妻

譚氏儒士張朝綱之妻

王氏儒士張崇香之妻

王氏儒士張立淦之妻

朱氏儒士鄭禮宰之妻

朱氏儒士張立漢之妻

吳氏儒士陳聯增之妻

謝氏儒士張爲樞之妻

葉氏儒士陳桂香之妻

古氏儒士王品官之妻

劉氏武生吳國寧妻田背鄉人十三歲適吳二十八

歲夫病不起僅遺一孤甫離襁褓氏茹哀飲痛鞠

育恩勤堂有老姑寢膳必潔族黨稱之邑令張公

邦泰旌以彤管揚徽匾卒年七十七歲

劉氏儒士魏亦參之妻

譚氏儒士朱義和之妻

楊氏儒士朱明端之妻

鄒氏儒士吳獻達之妻

邱氏儒士張建福之妻藍田埔仔鄉人氏秉性和淑

十八歲于歸二十三夫故堅操矢志事親則孝撫

孤則慈幽貞之德里黨皆稱五代同堂孫曾環繞

道光二十九年奉

恩旨旌表勁節凌霜壽九十六歲

彭氏監生吳獻昫之妻城廂墩仔上人年十八于歸
二十一而寡賦性幽淑孝事翁姑撫孤則慈愛鞠

養矢志則冰霜清潔持家教子兼而有成五代一
堂孫曾繞膝壽八十有七孫昌言從九品

陳氏儒士羅啟才之妻

許氏馳贈朱文桂之妻

朱氏儒士李亦材之妻

邱氏儒士李馨宣之妻

官氏儒士李三善之妻

李氏舉人李維彬女儒士吳亦惇之妻十六歲于歸
甫閱月而夫亡氏栢舟自誓勵志守節姑性頗悍
奉承惟謹鄉里咸稱之螟蛉一子躬自紡績教之
成立卒年五十二歲邑侯張公邦泰旌之曰貞孝
完人

杜氏儒士李煌宣妻

陳氏監生李光烈妻

吳氏武生王斌魁妻

劉氏儒士林定國妻

楊氏儒士張顯洞妻

鄒氏儒士吳順德妻

蔡氏誥贈朝議大夫朱啟元之妻

李氏儒士何光濟妻

吳氏儒士張崇道妻建橋人氏年十八于歸二十二

歲夫故立嗣子撫育事舅姑極盡婦道妯娌無間

言苦節一生冰霜勵操松栢貞心卒年七十二

洪氏州同張鴻材之妾雙螺口人

林氏儒士王立繩之妻

以上俱經入祠崇祀

何氏廩生張錦帆妻二十六歲夫故僅生二子事翁姑以孝稱茹荼飲苦矢志貞操撫子成立卒年七十八歲子作猷歲貢建勳監生孫炳榮郡庠

王氏儒士張立海之妻雙螺口人

楊氏武生張登壇之妻雙螺口人

張氏馳贈儒林郎吳泰礪妻田背鄉人氏年十九適

吳純謹事舅姑儀脩內則二十一歲夫故哀毀欲

絕遺腹舉一子名國樑列成均孫樹芳州同請封

經學憲李公棠階旌節孝揚徽匾現存九十八歲

光緒八年奉 部覆准建坊

陳氏儒士張南祝之妻

吳氏庠生鄧蘭湘之妻

鄒氏儒士張立濟之妻雙螺口人

鄭氏儒士王遠謀之妻

黎氏監生楊耀璋之妻

魏氏儒士劉象萬妻陷隍寨子鄉人年十八于歸二

十六夫故僅生一子齟齬待哺氏婦道母儀勤劬

備至卒年六十二歲

呂氏湯坑湖坡鄉羅清就之妻錫灘呂炳女十三歲
適羅二十二歲夫故家貧無以爲炊且翁早逝哭
以內僅存孀姑弱息奉養堪憐氏婦道克全耐雪
貞心撫子其瀾成立現年六十一歲

羅氏湯坑人丁惠樂妻于歸時家赤貧燈影機聲備
嘗辛辛苦十指所入以助堂上甘旨之需舅姑倚養
天年咸豐二年惠樂身故氏年二十九歲痛不欲
生旣而曰親老子幼吾惡乎死飲水茹菹貧且益
堅以事以畜無間言焉迨舅姑迭逝曲全孝道其

子志德功加遊擊 誥封夫人世咸謂節孝之報

云光緒六年歿五十七歲守節二十九載越二年

其姻婭工部郎中倫五常具疏爲請於 朝荷

旨旌表准建坊祠以彰節孝

許葉氏陷西神沙鄉儒士許華用之妻年二十六夫

故氏栢舟矢志孝事舅姑勤儉持家克全婦道賑

恤貧寒族隣感德遺生一子蘭馨撫養成立得列

成均孫曾繼起或膺仕籍進膠庠濟濟一門人咸

羨焉

陳氏浙江寧波人爲杭州課大使張登瀛側室性慈
敏襄內政嚴而有法道光二十九年登瀛病故氏
哀毀盡禮撫諸子成立又恆以不獲孝養舅姑爲
恨春秋拜奠必躬自洗腆以盡婦道暇則舉古今
忠孝節烈事勗兒輩有古賢風戚黨咸敬禮焉咸
豐十年髮匪圍杭州歷七旬城陷氏挈輿鬻擊賊
大罵赴井死之長媳葛氏次媳莫氏幼子從九品
萬達暨姻戚莫望祀僕婦李媽家丁龐福俱殉難
行道皆惋惜同治五年巡撫馬公新貽以其事奏

旨准旌表及兩媳俱受褒封子五人萬程萬崧監生萬熙
浙江孝豐縣典史又次卽萬達因殉難

賜卹加贈鹽運司知事銜時錢塘名士吳淦撰其節畧並
詩百首梓行以彰一門之節烈云

陳氏埔仔鄉儒士張爲恆妻性端莊不苟言笑十七
歲于歸越二年懷孕僅七月而夫故氏誓以身殉
投繯者數次翁姑乃諭以遺孤在腹宜以吾二老
終養及宗祧爲重氏感悟遂起執喪矢志堅守閱
二月生子含淚撫孤姑因慟子喪明氏旦夕以舌

舐其目事親盡孝教子以慈子耿光納監士大夫
作詩文褒其事邑令王詳報督撫申奏道光二年
恩准旌表建坊入祠崇祀

陳氏埔仔鄉儒士張佑南之妻德性幽閒十八歲于
歸十九夫故矢志守節閨闈言動以禮事翁姑盡
婦道自養一子更立夫弟子爲嗣篝燈紡績課讀
諄諄長錫彤次仲宣後先入泮孫象儀武庠道光
廿三年邑宰詳報經撫憲葉奏 准旌表建坊入
祠崇祀張邑侯邦泰旌貞淑流徽匾卒年七十八

曾氏埔仔鄉張文藻妻幼端慧十六于歸十七歲夫
亡含淚悲切恐觸親傷惟孝事翁姑無缺且好善
樂施遇貧乏借貸必與有子姪無貲讀書應試者
助修金贈考費不吝里黨皆稱爲女中丈夫撫嗣
子亦克成立同治六年經學憲杜公聯旌以志潔
名芳匾壽八十二歲

邱氏埔仔鄉張岱祝妻幼嫻姆訓十八于歸二十歲
夫故矢志守義孝事翁姑撫養嗣子汝梅成立同
治十三年提學章公鑿旌松筠繼美匾壽七十五

邱氏埔仔鄉張瑞香妻二十一歲夫亡撫夫兄子爲嗣上供菽水下撫孤兒持家不干棚外事同治六年督學杜公聯旌以婦節母儀匾壽七十五歲

謝氏埔仔鄉張恂愉妻貞靜幽閒十八于歸二十五歲夫故早悲鸞散幸夢熊祥同崔婦之乳姑效郢母之教子後以子貴受封年終四十歲

何氏湯坑大山背鄉楊二水之童養妻也及笄時二水遠適不歸氏食貧作苦矢志守貞事翁姑盡婦道處妯娌和睦撫孤兒政騰教之成立壽七十

歲光緒八年經善堂詳報旌表

羅氏金湯寨吳振玉妻十六于歸二十九歲夫故生
子女各一氏念親老子幼堅貞孀守耐苦持家事
翁姑盡婦道教子女以勤慈壽至七十有九經善
堂於光緒八年咨准旌表

黃氏埔頭雙河徐承選妻十七歲于歸十八夫故遺
腹產一子撫孤事親婦道克盡壽七十九歲光緒
八年善堂經詳准旌表

陳氏銅盤鄉馮克纘妻十八于歸二十九歲夫卒螟

蛉三子撫養成人長子善繼以州同請封尉箕嬀
守潔清之志卒年七十二經光緒八年旌表

陳氏埔仔寨張添近之妻性情幽順十八歲于歸越
四載夫亡氏冰霜勵志內則是嫻奉姑撫子孝慈
備至親族伯叔嘉其德爲之另撥田產以獎其貞
操焉卒年四十七光緒八年經詳准旌表

邱氏埔仔寨張詩响妻監生張國輔母也十八于歸
二十五歲孀守孝順翁姑克盡婦道撫養嗣子成
立族黨稱焉嘉慶十二年督學陳公嵩慶旌以吉

金貞石四字壽八十五歲

劉氏環清人璜坑儒士鄒仁提妻十九歲于歸越明年生一子遂痛夫亡號泣欲絕舅姑乃慟諭之曰若不節哀將置藐孤於何地氏悟含淚操作婦供子職且嚴荻教道光二十三年學憲李公棠階給獎苦節延齡匾壽七十七歲子念祖列成均

鄭氏陷隍蜜坑鄉張和芳妻十七賦桃夭二十三歲悲黃鵠撒珥灑血傷動親隣爰擇夫堂姪啟承爲嗣氏勉承翁姑意謹執婦道而終莫解其悲切抱

鬱而終年四十七歲

鄭氏縣城東廂儒士吳鴻序之妻十四歲歸吳二十
八夫故生子紹銓髮初垂次紹綸未離襁裸籠
鐘二白寢膳資人氏痛失藥砧俯仰誰靠於是勉
供菽水苦學熊丸族戚咸嘉其儀則子紹銓生員
卒年六十二歲光緒八年詳准旌表

林氏慧娘逕心林俊蘭女幼許字鍾國隆未結褵而
鍾亡至十六歲父母令改嫁氏堅不可遂過鍾門
以守其貞家貧淡勤操作矢志靡他道光年間邑

人譚茂才林鸞鳴等稔其貞節因白邑令劉登榜以栢舟堅貞旌之儒學謝騰霄典史章銘全贈節符完壁匾都人士亦多作詩章以紀其儀型孝廉吳紅有詩云他年史館如修纂女曰貞兮吏曰循蓋嘉氏之節義堅貞洵足旌表也

鄭氏紫荆洞鄉楊璋卿之妻十八于歸二十歲夫故喪葬盡禮舉遺腹子靜齋教訓成立奉侍翁姑旨甘無缺壽八十歲乾隆三十年督學金公士松旌以松筠晚茂四字

陳氏北勝南陽鄉林時嵩妻十七于歸十八歲夫故
遺腹生一子孝順舅姑撫孤孀守妯娌或有戲言
輒避走壽七十二歲平日居家勤謹訓後有方子
潤茂列成均嘉慶三年知縣劉公嘉穎儒學謝公
東安旌匾曰彤管揚芳

費氏本籍河南嘉慶間李維楨宰汝陽時聘爲長子
名舉者側室過門後先意承順恆得翁姑心及翁
病無藥可治氏暗詢之醫者答以人肉乃可療否
則殆矣氏遂夜半焚香默禱自割左臂肉烹而進

人莫知也翁病果愈而氏因刀口滴血不止竟成瘡家人廉知其故述於翁姑氏終不肯明言且囑其母曰兒盡兒心何足介意無久瘡亦平復生一子年至六十餘而終巾幗中有此孝世所罕見

葉氏布心社處士楊鳳南之妻自幼適楊二十三歲失所天僅一子孤苦零丁勵志孀守孝敬舅姑克勤菽教飲水茹檠歷四十餘年艱難萬狀氏端慎自持闔幃欽式迨以子楊貞勤王功授叅將遷居紫荆洞親見孫鍾岐授守府鍾嵩授州同衣冠濟

濟繞膝百餘人壽七十有二提學翁公心存採風
勵俗以節孝流芳匾旌之其子貞崇祀鄉賢事載
志乘人以爲如雋不疑之能遵母教云

陳氏和寨曾廣應妻十八歲于歸二十二而寡撫一
遺孤以存宗祀教子有方持家有法婦德洵爲無
愧卒年五十二光緒八年詳准旌表

邱氏后峯鄉徐德堯妻十八適徐二十歲夫故矢志
守節從一而終壽七十二歲計守節五十二年經
善堂彙詳准旌表

楊氏金湯蔡德才妻十九歲禿合二十一夫亡氏哀
慟欲絕杜守閨門而事翁姑處妯娌各盡婦道撫
嗣子思劬孫阿連成立咸豐九年子與孫隨夫弟
德新往嘉應攻勦髮匪同時陣亡捐軀報國其忠
義激烈之氣由慈幃之教所致也光緒八年善堂
彙詳咨准旌表

陳氏斗牛山黃紹聚之未婚妻黃故時年方九歲遂
矢志無他過門守節勤持婦道孀居五十七年貞
堅松栢卒年六十五歲經同鄉京官吳永智等呈

咨禮部彙題准旌表建坊

李氏陷隍詹瓊園妻十七于歸二十七歲失偶子幼親老孤苦食貧氏事翁訓子孝慈兼至里黨稱之壽八十從一而終子偉士孫時省列成均後裔文楷岱俱有文名道光二十六年督學戴公熙給以節孝二字

林氏蟬娘陷隍寨內人職員林世科女十六歲嫁朱紹江爲妻纔四月夫故氏痛苦悲切誓不自存頗解韻語嘗賦詩見志有不貪富貴不貪生之句惜

全稿遺佚其母勸改適氏口佯唯唯數日後暗自
脩理衣服針線紉身投江而死年十八歲節烈最
著士論誌之

黃氏隴隍人監生魏依賢長媳青年孀守生子四夫
亡時子尚幼秉性慈和持家有法事翁姑極孝敬
能行人所難嫡姑張氏自二十歲病癩壽至九十
三歲衣服汗穢無敢近者氏親爲澣濯侍奉始終
無懈後四子皆有成氏亦壽登八十有六歲豐九
年督學殷公壽彭旌以匾曰巾幗儀型

吳氏環清簾竹圍武生王斌魁妻年十八魁以新進
至城廂高田親迓于歸二十二歲夫故畢生孀守
苦節堅貞螟蛉一子撫養成立家頗裕立愿造青
潭驛路木橋並撥出田租八石與人耕管看守該
橋遇洪水漲大卽以木筏渡人至今往來皆德之
享年七十餘四孫納粟後裔克昌經入祀節孝祠
胡氏潘田社陳林敏妻二十九歲夫故生一子甫九
齡氏堅貞守節備極苦心事姑撫子孝慈兼至子
照入國學道光二十八年經張邑侯詳准入節孝

祠卒年八十四歲

陳林氏潘田銅坑鄉處士馮振衡妻年十七歸馮二十
五歲夫故僅生一子氏善承翁姑意矢志撫孤
勤儉持家課子成立經邑侯張公邦泰詳准入祀
節孝祠孫曾秀監林立

陳氏九河社高砂鄉監生劉丹桂妻十八歲適劉年
三十夫故堅貞孀守六十餘年內則是嫻慈育爲
範生四子教撫成立壽九十四歲五代同堂子鳴
鸞例貢餘俱國學且一門多臻中壽

楊氏布心社鄭國金妻早年夫逝志懷冰霜且善持
家克勤克儉經敖邑侯翊臣獎以栢節松貞四字
嗣鄭松爲子以歲貢授信宜縣學孫亦遊庠壽終
七十有八

徐氏小溪埧邑庠生吳濟翔妻十七歲于歸至二十
五歲未有子翁與夫相繼而亡氏堅貞事姑孀守持
家而營謀不讓丈夫志嘗自誓曰氏夫益祖孝廉
方正一家貢監相傳豈可失節以墜家聲凜烈之
風不容泯滅焉

王氏建橋鄉儒士張希政妻十七歲于歸二十夫逝
生子甫三齡時家淡丁稀翁姑悲切又恐媳立志
不終氏泣抱孤兒跪告曰媳命不猶而萬不敢離
二親拋呱呱以失亡夫之望於是并白躬操紡織
爲事堅貞矢志慈孝兼全教子德隄成家入國學
長孫森林遊泮鵬程晉雍孫曾多成名氏壽終七
十七歲

彭氏大隄墮蓮塘鄉儒士杜朝英妻年二十一夫故
遺幼孤俊卿起卿四壁蕭然甘貧守節事姑撫子

克盡孝慈卒年九十三歲子孫昌熾

魏氏林世舉之妻陷隍市人週歲過林門夫妻和合
值將合卺時而夫故氏矢志無他事姑甚爲孝順
乞請夫兄子爲嗣勤儉持家奉姑終老卒年五十
一歲子孫挺秀

杜氏東隍鄉監生劉文通妻二十歲于歸夫遽先故
事姑至孝教子有方里中有孟母之稱壽至九十
有七六代一堂子四殿元生員秉元從九淑元歲
貢孫曾繞膝多成名者

陸氏年方三歲歸大樞社王肇柱爲妻十六歲夫故
孀居貞守服侍翁姑立嗣承祧教養備至光緒四
年提學吳公寶恕旌松筠勁節匾卒年七十六歲
蔡氏陷隍蜜坑鄉張佳敏妻年十三歸張十七歲夫
逝舅姑以其年未及笄且無子每抱隱憂氏心惟
從一貞守終身几杖代良人之奉蘋蘩修介婦之
儀時年九十三猶督責子孫惟勤惟儉光緒九年
許邑侯普濟獎以撫孤守節四字嗣子慶平繼承
創業名列雍宮一堂四代

彭氏幼嫻姆訓年十歲歸布心棠荆角何允元爲妻
二十五歲夫亡氏誓以身殉翁姑泣勸曰垂白在
堂呱呱未成何以見吾兒於地下於是勉操井臼
進甘旨教育孤子榮光勵志成人諸孫森列咸豐
十年學政殷公壽彭褒以節孝流芳匾壽八十一
而歿光緒八年善堂彙詳准旌表

邱氏占頭鄉陳尚如妻十八歲夫亡生遺腹子名意
鳳鞠育教誨茹苦含辛雙白垂堂婦供子職姑李
氏嘗稱之是善事氏歎如也年終七十三歲

陳氏占頭鄉張順芳妻二十五歲婦居僅一子延師
誦督使之成立理家政井井有條得翁姑歡壽
九十六五代同堂光緒三年提學吳公寶恕旌以
松栢冬榮匾子肇猷國學

張氏上林鄉儒士朱日脩妻十八歲于歸二十六夫
故灑血孀閨誓志不奪事翁姑奉命惟謹撫二子
勗以讀書及長遣就外傅供脩脯尤慇懃清儉自
持荆釵布裙晏如也同治十年督學何公廷謙旌
之貞型潛德壽七十二歲親見二子同科遊泮長

選青增貢次炎歲貢孫曾競秀

楊氏埔頭鄉和順坑徐亦盛妻十五適徐二十歲而寡生遺孤事親撫兒備極慈孝卒年七十七歲光緒八年詳准旌表

郭氏北勝溪西鄉李維辛妻十三歲于歸二十五夫故堅貞自勵誓不改節儉以持家莊以處已顧復二子九菽有方咸稱松栢晚蒼焉壽六十二歲

胡氏隍隍儒士羅文猷妻結褵於十六歲越二年失所天子齒僅齟翁年七旬哽噎待祝氏孝敬循內

則之儀保赤篤誠求之念堅白自勵指据持家經
含飴者孫曾三十餘人壽六十九歲

洪氏大勝鍾明亮妻十七適鍾僅三日而夫亡氏堅
貞自矢不苟笑言孝親慈幼儀修內則立夫兄子
爲嗣同治三年督學王公泚旌沒齒完貞匾壽終
七十七歲

劉氏小勝邱國清妻三十歲夫故子甫四齡家甚清
淡氏獨賦性幽貞撫養弱息以期成立雖老年柶
以外不聞警歎後子錫慶登大學多行善事皆承

氏之賢而教也壽至八十七親見一堂四代

譚氏小勝李國棠妻二十九歲失偶翁姑俱耄侍養
需人氏敬菽水誓不改節每當自織輒呼幼子從
旁雜誦便書聲與機聲相和其靜貞之性洵爲四
德芳型乃翁庠生李龍光聞之不覺破涕爲笑嘗
對人稱曰是爲吾之賢媳婦也卒年八十五歲

劉氏小陷隍葉孟作妻二十九歲稱養姑老子幼哀
感族鄰氏矢志堅貞勤操十指事姑盡敬教子以
慈學憲翁公方綱旌栢操松壽匾卒年七十八歲

廖氏小陷隍庠生葉德華妻年三十二夫故家徒四壁羣雛呱呱氏能明大義甘心守節勤勞操作藜藿充庖惟期養兒長大成人不易玉潔冰清之德壽百有二齡而終親見五代同堂

李氏小陷隍處士朱學善妻二十歲失伉儷且無子人方以爲憂氏節義明心堅持從一冰霜勵志貞靜形單嫻內則克全婦道主中饋不苟笑言壽終七十四歲

王氏城西大街李維標妻十八歲歸李二十六歲夫

逝二子尚幼兼雙白垂堂氏謹守孀幃事親撫孤

孝慈備至且持家勤儉勵志幽貞壽終六十五歲

光緒八年詳准旌表子國珍

遇春紹蓮

庠生重輝職監

吳氏雙螺口張丹鳳之未婚妻聞丹染嘔血症家有

白衣觀音旦夕默禱年十九歸丹舅早故姑孀妯

娒前動循規範及丹病篤問何以自處氏泣曰相

從地下耳亡何丹卒計于歸僅十六個月氏血淚

俱竭亟請爲夫立後姑以長媳生之第二子爲其

嗣越數日抱兒向姑妯伯叔前拜曰呱呱藐孤賴

姑等撫養成立姑覺其有引決意密訪之復改容
操作忽一日給家僮云我房內羣鼠聒噪爾爲市
砒礪毒之值丹亡七虞之夜遂自毒姑隔牆聞哽
咽聲疾往視之尚能言救之不醒黎明溘焉而逝
矣年終二十歲光緒八年詳准旌表

彭氏山芳鄉儒士盧集朋妻十五歲歸盧二十六夫
故僅一子家貧孀守孝事翁姑撫育孤兒艱劬備
至年七十二歲子建猷因髮逆竄境帶勇効勞經
錢邑侯保獎六品孫樹棠監生

彭氏小隍隍新池鄉胡傳洲妻十五歲于歸越一年而寡氏甘心守節且孝事翁姑時年五十二歲

彭氏縣城東廂吳泰業之妻十二歲適吳二十五歲

夫故生一子僅週歲家酷貧移挪葬具備嘗辛苦幾不欲生轉念一縷孤懸不撫養成人非特九原

難瞑堂上皤皤將謂之何迺吞淚承歡鬻薪哺子

教之成立時年六十九

子探淇從九請封光緒八年趙邑侯詳准旌表在案

謝氏占頭鄉楊元喜妻六歲適楊二十五歲夫故子

玉麟甫三歲家甚貧紡績養姑晝夜訓子勤勞撫

育備極堅貞光緒四年督學吳公寶恕旌以松筠
勁節匾時年八十四歲子六品軍功

柯氏金湯寨蔡宗通妻二十歲產二子而夫故家徒
四壁氏矢堅守事雙親撫三孤終始如一備歷艱
辛時年六十歲光緒八年善堂詳准旌表

馮氏楊梅坑朱君門妻十六歲于歸生二子至二十
三而寡家雖貧事翁姑能盡婦道勗幼稚和妯娌
不苟笑言且賦性純良勵心貞節時年六十六歲
鍾氏小勝李凌雲妻二十歲孀守事翁姑克盡婦職

撫育遺孤六歲篝燈課督訓至成人時年七十一
鄒氏璜坑人年十八歸雙螺口車欄上張朝經爲妻
二十八歲生子甫六月而夫亡氏矢志孀守善事
舅姑勁節凌霜撫孤成立子登廷孫錦芳俱登黌
序時年七十五歲孫枝競秀

江氏丹竹坑儒士盧集慶妻二十歲失所天家徒四
壁雙白在堂氏飲泣承顏茹荼勵志翁姑憐其節
立嗣繼之氏撫養如已出教之成人嗣子肇基因
髮逆竄境隨錢邑侯効勞保獎六品氏年六十八

許氏蓮塘鄉監生杜廷輝妻年二十六而寡立夫堂
姪爲嗣氏姆訓夙嫻翁姑前動必以禮井臼澣濯
始終供奉不懈迺嗣子不祿又復立孫鞠育撫養
兼施勞愛卒年六十督學汪鳴鑾旌匾節媿松筠
吳氏環清桂堂園儒士王繼盛妻年二十二夫亡孤
亦旋歿立嗣閔鬻妯娌感傷氏轉思白髮無依乃
收淚供職堅守孀閨督學胡公瑞灑旌以節孝可
風四字時年八十三歲

彭氏環清堡王洪友妻二十七夫亡儷一孤尚幼二

白在堂氏視膳無缺井白勉操孀閨紡績課督孤
兒成立時年五十六歲

羅氏環清岡下圍劉起順妻乳哺歸劉七歲失夫八
歲翁逝氏矢心從一茹素養姑以終餘年又撫孀
姪婚娶完姻嗣其一以延夫後洵爲童貞孀闔巾
幃完人時年六十五歲

吳氏雙螺口張紹箕妻十六歸張內則克嫻事孀姑
必恭敬止乃至二十五僅遺一子而夫故氏含悲
歛淚暗自盡婦職而鞠育撫孤不忍哀號而感傷

寡母心者幽貞堅守節孝芳徽時年五十七歲子
樹棠克成立入大學

劉氏產溪靈水鄉監生譚英挺妻二十八歲夫逝二
子尚幼劬勞鞠育慈愛兼施侍奉翁姑盤匱盡職
性純謹惟示荻教不聞嚴厲聲時年七十四歲長
子洲例貢次禮縣丞銜

張氏璜坑上興圍處士鄒仁春妻二十四歲無出而
夫永訣氏欲以身殉孀姑廼泣勸其節哀遂立夫
胞兄之六子名用中爲嗣於是冰霜矢志闔幃肅

然羹湯侍奉未嘗稍缺紡績之暇則勗兒力學且以吃虧畢竟受益之語訓兒姪輩時年七十三歲孫曾繞膝

張氏璜坑鄒顯曾之妻二十歲賦宜家甫周歲而悲黃鵠附膺抱痛九死一生家人憐其無嗣遂以夫兄次子振勳爲繼氏性近烈門以內常嚴肅而其處姑嫜妯娌却具和婉時年六十四歲子振勳國學長孫耀璋府試冠軍入載學

鍾氏大田譚英全妻二十八歲夫故遺雛尚幼顧影

無依乃挺節堅貞從終撫子提學章公整旌以還
齡亮節四字時年七十六歲子之楨從九請封

鄭氏儒士譚上承繼室十九歲歸譚適土匪古聲揚
等勾盟擾亂上承督率義勇堵禦防勦被賊逼斃
時氏方二十二喪葬盡矢志守節立嗣撫育以承
後今年五十二歲

吳氏環清高屏圍儒士王大賓妻二十四歲夫永訣
氏灑血悲號聞者傷感舅姑哀慟更不忍言族戚
因爲之立嗣以承後氏於是勉操井臼奉養庭牀

撫嗣娶媳恩勤備至乃螟蛉二子俱早喪亡姑媳一家同矢貞守孀閨深靜僅見孤孫爲一綫之延其伶仃有可憐者督學葉以筠節流徽旌之時年七十三歲

郭氏陷隍廩貢生朱鳴玉妻二十八歲寡居一子僅三齡氏劬勞撫育愛養兼全堅守操持冰霜勁節時年六十七歲

劉氏占頭陳榮勳妻二十一歲生一子夫卽經商遠出病亡家徒四壁鄰婦憇憇再醮氏以姑老子幼

普不改節作羹分哺上下周全以子家邦得封典
四代同堂許邑侯普濟旌栢勁松貞匾年五十七
鄭氏陷隍詹其珍妻二十九而寡四子俱幼且家貧
姑老氏善持閨範事姑盡職訓子有方人稱其德
時年七十二歲長子經以從九請封典少子史廩
生子孫繞膝

林氏陷隍居林鄉朱耀東妻二十四歲寡居子之黠
僅一齡氏劬勞撫育孀幃肅然表潔奉親鄉里稱
孝時年五十八歲子邑庠孫挺秀

杜氏葛布鄉李毓傲妻年二十六夫貿易外邦而故
遺孤纔半歲氏苦志撫養不憚劬勞子文珠受荻
教入國學壽八十五歲

吳氏下湯彭朝嵩妻十二歲于歸十四歲夫徃外洋
身故氏獲凶問披麻飲泣冰檠自持苦節事親採
樵供職及翁姑歿先後嚮釵釧殯葬哀毀盡禮族
鄰咸稱其賢孝卒年六十二歲

陳氏環清監生劉瑞友妻年二十失偶遺腹生一子
名集大氏念高曾祖父皆一綫僅延教育孤雛聲

與淚俱子亦感泣發憤讀書遊庠入貢氏卒年八十一後嗣藜輝增生運飛庠生上騰廩生登魁致

中拔貢玉樹廩貢 欽賜副榜

王氏滿娘環清盈倉圍王三考女幼許配建橋張秋苑爲妻張以貧不能具聘女年二十六聞旁議勸退婚女以從一自持不甘改適連次服毒急救復甦旋投水明志挺勁節而付波中守貞魂以居泉下冰清玉潔洵女流之冠

何氏環清鄭智奇妻年二十夫歿立夫堂姪足鳳爲

嗣氏撫育辛勤勉以遠大奉侍庭幃從無忤色孀
閨貞守問視以外罕與閒言壽七十三歲子列成
均孫枝秀發

陳氏產溪鄉儒士彭恆捷妻十六于歸二十四歲夫
亡家貧守貞不妄言笑舅姑前小心侍奉敬慎無
違壽七十七歲道光十九年陳邑侯發新儒學禩
儒詳咨部准旌表

劉氏產溪鄉儒士彭從龍妻十二歲歸彭二十九夫
故矢志守節孝事翁姑敬先則表潔蘋蘩訓子則

追徽九菽道光二十八年張邑侯邦泰詳准旌表

鄭氏小樞儒士楊顯城妻十四歲適楊閱二年而藁

砧響絕高堂髮白侍奉需人膝下雌黃乳哺虛望

氏則冰霜耐冷矢志靡他爰立嗣以承後孝親撫

子拮据忘勞道光二十六年督學戴公熙旌以節

孝二字壽終七十有四子二朝喜早逝孫多秀監

鍾氏大田處士譚斯乾髮妻歸乾逾載而乾患痰喘

氏日侍湯藥不見效遂歸寧與父母訣曰壻死兒

必相從願二親靜養勿以薄命女爲念也旋泣請

舅姑立嗣續後畢乘乾病革閉戶自經而復甦越
三日夫妻偕入南柯夢矣因共壙葬詩曰生同室
死同穴其譚鍾氏可以風

陳氏產溪靈水鄉譚榮元妻結褵於十六歲至二十
一夫亡而無子幸側室陳氏二十歲獲舉二丁氏
撫之如己出且能逮下事翁姑極承順常得親歡
洵爲一門雙節孝氏年六十八妾年八十七終壽
子英健監生英揚從九品

朱氏松林鄉處士何慎圖妻十八歲于歸二十六僅

生一子乳哺四月而夫亡氏皎日矢心堅冰勵節
事奉翁姑雖菽水旨甘盤匱必潔撫幼子成立家
道寢昌督學全公慶旌冰檠銘徽匾壽八十五歲
光緒八年詳准旌表

李氏湯坑石湖鄉陳壽成妻十八歲適陳二十二失
偶事舅姑盡孝道撫幼稚以慈心端莊和睦苦節
松筠年七十一歲歿子文盛武盛俱監生

吳氏大田鄉譚斯翰妻十六歲于歸二十二夫故矣
心從一刻節鏤貞雖蘭兆未徵而擇賢立嗣撫養

倍劬勞咸豐元年督學許公乃釗旌以栢節松心
匾卒年七十歲

謝氏大田譚維部妻十七歲歸部至二十五而部卒
僅生一子氏撫孤矢志迨四十五歲孤兒賢慰又
卒家徒壁立媳不能留遺二幼孫呱呱待哺氏復
恩勤憫鬻指据支持藜藿自甘絕無怨悔卒年七
十一歲

朱氏大田譚維圮妻十八歲于歸二十八夫亡雖無
所出而志不少移立嗣撫養以續夫後丸荻之教

川
修
卷之六
倍極辛勤同治八年提督學杜公聯獎給彤管揚
芳四字卒年六十九歲

劉氏高屏園王財臨妻自幼不妄言笑十七歲于歸
二十二夫故傷慟無以自容僅遺一女方四歲舅
姑且泣勸其節哀迺與寡嫂吳氏共承菽水立嗣
子二撫養成立孝慈兼至卒年六十五歲督學葉
大焯旌匾曰松筠節茂

丁氏璜坑田背鄉監生吳世芳繼室十六歲學執婦
道值夫棄世氏年二十八無出矢志從一茹素念

經先是其夫在日慮乏嗣氏勸娶妾以延宗祀迺
娶童氏十六歲入門未久世芳忽邁沉痾童氏躬
爲煎藥竭力服侍俄而世芳卒童氏年方十九事
嫡如母遂依以終身後立子各一互施慈訓俱列
成均丁氏卒年五十七歲童氏卒年四十八光緒
八年均詳旌表

何氏九河社儒士鄭士義妻十八歲于歸二十四僅
生一子而夫亡家甚貧氏以針黹度活撫養孤兒
侍奉孀姑克盡孝順守貞閨闈不苟笑言同治六

年錢邑侯誦清詳咨部准旌表卒年七十五歲

魏氏九河社鄭永棟妻年十三適鄭後生二子二十

二歲夫故翁姑亦相繼病亡家貧如洗氏堅貞婦

守賴採樵傭工度日撫養二孤兒艱苦備嘗終不

變棺舟松筠之節同治六年族紳鄭流何等呈請

錢邑侯誦清詳准旌表壽七十二歲

管氏九河社儒士鄭流鎔妻自幼入鄭門遵姑命守

婦道二十三歲夫故欲以身殉姑嫜再三慰諭以

撫遺孤繼宗祧爲重氏乃飲泣吞聲孝事孀姑訓

子成立族戚咸稱焉同治六年族紳鄭鳴謙等呈請錢邑侯誦清詳准旌表時年五十四歲

光緒八年制軍丁公於揭陽善堂採訪節孝彙詳經奉旨准其旌表建坊在案今將節孝姓氏載列於後

唐氏下角鄉盧鴻能妻三歲適盧二十八歲失伉儷堅心孀守矢志靡他挺勁節於三十三秋赴泉臺於時六十歲

馮氏仙洞鄉劉昌彥妻十八歲于歸二十二歲夫故孀居五十八載耐雪貞心享年七十九歲

鄧氏城廂大街曹慶爵妻十七歲于歸二十一歲夫故貞操堅守從一而終卒年五十一歲

蔡氏下溪鄉黃受業妻十八歲于歸二十一孀守深閨霜冷清節冰堅卒年三十七歲

彭氏小溪埧何鼎成妻十九歲于歸二十四而寡清操自守飲榘茹荼卒年五十歲

藍氏小溪埧吳亦命妻二十歲于歸二十八而寡栢舟誓志栢節貞心卒年五十有二

謝氏埔仔寨張雙能妻十八歲于歸二十五而寡堅

持貞潔內則修儀卒年四十四

王氏城廂南門外吳永恂妻十七歲于歸二十而寡
守四十三載幽貞苦節冰雪同芳卒年六十二

鄒氏璜坑田背吳泰華妻十七歲于歸二十九而寡
孀居孤守五十七年貞符冰玉卒年八十有五

彭氏城廂吳永享妻九歲適吳十八歲孀守幽淑清
貞持家勤儉事孀姑克全婦道撫嗣子鞠育有方
矢苦節於六十五秋閨幃霜冷幸繞膝有孫曾衍
慶彤管傳芳壽終八十三歲子昌言從九品

黎氏橋仔頭吳孟聰妻十八歲于歸二十九夫故孀
守五十三載卒年八十一歲

陳氏橋仔頭吳昌智妻三歲適吳二十五而寡矢志
無他堅心從一卒年六十五歲

吳氏仙洞鄉生員劉春魁妻十六歲歸劉二十六歲
失偶幽貞堅守婦道能全操作勤勞笑言不苟卒
年六十二歲

黎氏新陂鄉吳泰紹妻十八歲于歸二十二孀守心
堅冰玉節比松筠卒年八十歲

鄧氏新陂鄉吳亦彩妻年十八于歸二十四歲悲黃
鵠孀居貞守冰雪同心卒年七十四歲

劉氏建橋鄉監生張鵬程之長媳儒士張祖觀妻二
十歲于歸二十四僅生一子而夫故氏恩勤鞠育
撫養孤兒於舅姑前奉事尤謹視膳不違孀守貞
操人言無間卒年五十二歲

吳氏布心社鄭恩魁妻十八歲于歸二十二歲夫亡
氏自縊以殉之死靡他

吳氏小溪埧何德丙妻十八歲于歸咸豐十年德丙

從軍勦賊陣亡氏聞耗自縊以殉時年二十六歲

劉氏小溪埧吳永瑞聘而未婚妻二歲適吳七歲永

瑞病亡氏矢志守貞不變其節年三十五而卒

鄒氏陶下鄉吳世光妻十一歲適吳二十四夫故清

操矢志貞守堅心卒年八十有二

陳氏埔仔鄉監生張觀光妻年十八年歸二十九夫

故以姪爲嗣孀守二十餘年事親撫孤孝慈備至

且姑病不起床禱者六年氏躬親奉侍湯藥朝夕

不離及姑故執喪盡道卒年五十八歲

劉氏建橋圍張崇基妻二十八歲孀守奉姑嫜克盡婦道處妯娌相率以和撫養孤兒教之成立貞心耐雪閩範嚴霜時年七十三歲子仲濱國學

鄒氏下湯社彭能正妻二十二歲寡居堅貞自守苦節凌霜慈孝儉勤人言無間時年八十三歲

吳氏建橋鄉監生張如松卽開榜之妻二十七歲孀守持家侃烈誓志無他時年六十四歲

張氏新陂鄉吳泰景妻二十一歲失偶孀居貞守惟勵從一之冰心時年六十一歲

譚氏三角塘吳世儀妻二十一歲寡居堅心守節冰
檠同貞時年六十八歲

彭氏橋背鄉吳亦理妻二十五歲孀守矢志無他節
操松栢時年五十四歲立嗣撫養教之有成

黎氏橋背鄉吳亦穎妻二十六歲失偶幽貞孀守不
易堅心時年六十九歲撫遺孤成立孫曾繞膝

張氏松林社鄭禮香妻二十歲孀守堅貞勵志勤儉
持家撫育孤嗣孝慈盡職時年五十六歲

洪氏松林社鄭芳英妻十七歲孀居志矢栢舟心堅

松節時年五十六歲

朱氏小溪埧吳亦緯妻十七歲孀守矢志從一貞淑
勤操人無間言時年八十八歲

何氏雙螺口張衍六妻三歲適張後衍六出外身故
且家淡氏矢志全貞不甘改適時年七十一歲

李氏大樁社橋背儒士吳瑞蘭之妻十三歲適吳二
十五歲夫故氏矢志守節孝順翁姑尤能教子成
立時年五十歲子鳳生邑生員

吳氏雙螺口張雙魁妻自襁褓歸張至十五歲因雙

外出而故氏甘心守節之死靡他時年六十一歲
劉氏建橋鄉儒士張崇高妻二十七歲孀守撫一未
週歲孤兒劬勞倍切奉侍家姑譚氏視膳必虔且
賦性柔貞舉動出入笑言不苟惟以持家宜勤儉
訓兒媳卒年六十四歲子邦礪克成立孫支秀發
王氏建橋鄉儒士張錫書妻二十九歲失所天生二
子尚幼氏堅貞矢志苦節冰心撫育幼兒慈愛備
至處姑媵妯娌皆稱其賢時年七十七歲子百魁
孫孤皆俱國學孫曾並秀

王氏建橋鄉張永浩妻十四歲結褵越三年而寡氏
含悲飲泣冰雪盟心孀守貞堅事姑尤謹廼立夫
堂姪振階爲嗣撫養長成策名大學同治九年經
督學胡公瑞瀾旌節孝可風四字現年五十四歲
王氏建橋鄉儒士張錫連繼室二十九歲失所天生
一子甫週歲氏堅心孀守孝事翁姑撫養遺孤劬
勞備極且持家勤儉閨節肅然時年六十七歲子
鳳岡習武援例納監孫支挺立

鄒氏建橋鄉監生馳贈昭武都尉張步梯妻二十九

歲悲黃鵠生二子俱髫齡氏矢心孀守撫育遺孤
治理家事有丈夫志且能承順庶姑婦供子職時
年五十二歲子汝清亦克成立膺正四品封銜

張氏環清桂林樓生員王之楨妻二十九歲寡居氏
悲切哀號甘心守節立嗣撫養矢志無他時年五
十五歲

藍氏高田圍吳喜遠之妻十三歲于歸二十歲而寡
心堅守義節勵潔貞時年六十一歲

王氏高田圍吳喜初妻十六歲歸吳二十二失偶氏

誓不改適甘守孀閨從一而終可爲閨範時年七十有七歲

鄒氏高田圍吳喜標妻二十二歲寡居飲檗茹冰心甘苦守撫嗣承後志切堅貞時年六十二歲

劉氏高田圍增生吳亦綸妻二十八歲孀守冰霜耐冷擬松栢之節同堅慈育恩勤思宗祀之延續續時年六十三歲

鄭氏南廂吳得昭妻七歲適吳二十四歲孀守勵貞節而矢志堅撫孤持家勤劬備至時年七十五歲

何氏雙螺口張衍琨妻二十八歲孀居守貞從一勁節凌霜撫育承祧堅心持雪時年七十五歲

吳氏建橋鄉儒士張崇登妻二十歲孀守性慈淑志堅貞事翁姑克盡婦道撫嗣子倍切恩勤乃兒媳俱早喪僅遺孤孫莞孺子立經督學何公廷謙旌以節孝流徽區壽終七十六歲孫曾繼起

何氏建橋鄉張崇景妻二十六歲孀居生二子尚幼長泮聲因念夫弟崇登早故撥次子泮興爲之嗣嫂孀同門守節翁姑均憫其貞撫子養孫備嘗艱

苦事親養志克盡承歡時年七十六歲

張氏灘下鄉許粵文之妻二十四歲孀守堅貞自矢
飲泣茹荼慈育爲懷撫孤承志時年八十八歲

藍氏建橋鄉處士張懷英妻十二歲適張克嫻內則
二十二歲而寡彌切貞操生一子甫三齡氏恩勤
撫養孝順翁姑姑患巨病尤與二兄嫂鄒氏朝夕
舐洗數月而愈督學馮公爾昌經旌節孝揚徽匾
時年五十八歲子嘉穀從九品孫森立

吳氏建橋鄉處士張兆基妻十二歲適張二十六而

寡生育二子劬勞撫養孀閨貞守勤儉持家時年五十六歲

吳氏建橋鄉處士張崇翼妻二十五歲因夫外出身故而寡翁姑在堂氏奉事惟謹撫養三子示以儉勤堅心從一時年五十七歲

鄭氏環清堡王獻安妻自幼適歸十八歲而獻安故青年失偶氏堅心守節從一而終時年七十八歲彭氏產溪社湖田朱君協妻二十八歲寡居冰雪持心栢松勵節撫養幼子教之成人時年五十八歲

曾氏埔仔鄉張親能妻二十歲于歸二十八孀守志
勵栢舟節持彤管年八十有五歲

朱氏環清堡王曾祥妻八歲適王十七歲夫故清操
貞守從一而終年四十八歲卒

徐氏湯坑大山背楊三友妻先是三友外出未回氏
將及笄父母舅姑擇吉娶歸楊門其祖母牽氏手
拜碓臼而成婦禮抱養一子政根繼後及根娶妻
徐氏歸根又夭亡復立孫撫養姑媳相守孀幃貞
符冰玉父子續承宗祀膝繞孫曾三友妻之守節

撫孤其苦心洵堪昌厥後時年七十有五歲

陳氏金甌寨楊政安妻十三歲于歸二十五夫亡氏

哀毀盡禮矢志守節在舅姑前備極誠敬事庶母

尤謹撫嗣子有義方時年五十六歲

邱氏金甌寨楊世掌妻自襁褓適楊二十五歲夫故

矢志守節動循禮法立夫姪政丙爲嗣今孫曾衍

慶時年八十三歲

吳氏東里鄉陳連增妻十五歲于歸二十二歲夫故

性情溫淑從一守貞時年七十二歲

吳氏東里陳謙瑞之妻年十六適陳十九夫故堅守
貞節孝順翁姑族戚欽之時年五十四歲

邱氏柯屋寨鄭壬申妻自幼適鄭二十九歲夫故家

貧守節孝親撫兒族黨推重時年五十五歲

王氏埔仔鄉張明倫髮妻十七歲于歸生二子二十

二歲孀守上奉菽水而得親歡下和熊丸以成母

教持家謹肅洵爲巾幗鬚眉時年五十三歲

羅氏埔仔寨張五娘妻十五歲于歸二十五夫亡盤

匝侍奉庭闈盡子婦之誠茶檠含茹丸菽垂母儀

之訓裙釵荆布艱苦備嘗時年五十七歲

羅氏埔仔寨張集福妻六歲適張二十一歲孀守舍
茶飲泣養嗣子以繼宗祧栢節松筠持終身可爲
儀則時年五十七歲

黃氏埔仔寨張喜雲妻十二歲于歸二十一歲夫故
翁姑悲切撥第四男所生子以繼其嗣氏執喪盡
禮撫養劬勞孀守堅貞始終不變其節事親亦克
順承時年六十二歲

羅氏埔仔寨張晝蒙妻十八于歸卅二歲生二子而

夫故氏堅貞守節并日躬操孝事翁姑撫養孤稚
咸豐十年殷學政壽彭旌松筠勵操匾壽八十歲
吳氏大羅鄉邑產黃鉞妻十八歲結褵二十一失偶
翁尚在堂乃立嗣續其後氏孝親撫子備極勤勞
勁節凌霜堅持貞守時年五十三歲

蔡氏金湯寨黃可輝妻十七歲于歸二十五慘賦栢
舟食貧終裏茹荼飲苦撫育遺孤乃晚年子孫俱
逝形影相弔饔飧惟叔是賴人皆憐其苦節焉現
年七十六歲

徐氏金湯寨卓齊秋妻十八歲于歸二十五孀守生
遺腹子文煥撫養成人爲之娶媳劉氏年二十產
子成孫乃文煥出外身故姑媳同撫孤孫一門雙
節而劉氏事孀姑撫弱息尤倍殷勤操井臼勵冰
霜共堅貞節時姑年七十六媳年五十四

高氏金湯鄉林初昇妻十五于歸二十二夫故奉姑
克孝訓子有方勤紡績以給饗殮勵栢松而堅貞
節時年五十三歲

黃氏金湯寨蔡東初妻十五歲于歸克儉婦道生二

子二十七歲夫姑相繼云亡孑身無靠惟勤針黹以養遺孤堅耐雪霜以貞苦節食貧自若守志清操時年五十八歲

吳氏溪頭鄉邱家節妻自乳哺適邱夫故時年二十六僅遺一女家道貧寒機杼度活矢志孀守始終不易其心事翁姑尤孝敬時年五十六歲

徐氏和寨曾廣讀妻十八于歸習婦道孝翁姑甚稱賢淑至三十夫故遺二子尚幼氏劬勞撫養倍切艱辛矢志節貞彌堅茹苦時年五十五歲

邱氏和寨曾德興妻十六歲于歸性情和順十七歲
守冰雪堅持立子爲嗣教以成立時年六十八歲
劉氏銅盤鄉馮天惠妻十八許嫁二十二歲夫亡侍
養尚有家姑乳哺僅遺生女氏堅貞自矢服事殷
勤飲檠茹茶倍嘗辛苦時年八十五歲

黃氏埔頭鄉徐振康妻年十六于歸二十四歲夫故
志節端莊笑言不苟清貞勤儉欽式閨幃時年六
十歲

黃氏赤草鄉劉新時妻自襁褓適劉二十歲夫故舍

淚事親克勤婦職及翁姑謝世彌勤耕織辛苦倍
嘗養子爲嗣教之成立冰心貞節歷久不渝時年

五十四歲

蔡氏和寨陳式玉妻十八嫁陳生一子二十四夫亡
抱孤養親和睦妯娌持家勤儉勵志節貞乃子娶
婦羅氏子年二十又夭亡姑媳居孀親族感痛爰
議立孫繼後蔡時年六十六歲

黃氏新寮黃儉之女十九歲適坡尾樓監生蔡煥明
爲妻二十四夫故氏堅貞守志時年八十一歲有

子蔡虹武舉孫支挺秀

謝氏橫坑謝仁之女十八歲嫁坡尾樓監生蔡旭昂
爲妻二十三夫故松栢矢志孝慈養志教子經邦
成立晉雍時年六十歲

吳氏埔頭后輦鄉徐明捷妻十九歲以翁歿過門守
孝越六日夫相繼亡氏哀毀盡喪誓志從一抱兄
子爲嗣教養備至雖家貧食乏而堅心苦節終不
易其貞操時年五十八歲

邱氏后輦鄉徐國華妻克嫻內則十四歲于歸越七

年而失藁砧撫一遺孤劬勞備歷志堅冰雪藜藿
自甘時年八十三歲

曾氏埔仔鄉張蔚文妻十八于歸而夫困苦志力學
旋獲病亡氏悲痛守節遺腹生一子撫養長成延
師課讀又常以書帷示其夫用功處其子激勵因
以英年成名洵爲貞儀荻教時年六十六歲

羅氏埔仔寨張清輝妻十八歲過門二十一孀守苦
節堅貞事親孝敬時年六十八歲

陳氏埔仔寨張簡淡妻十六于歸越年夫故堅持苦

節耐雪經霜時年八十四歲

陳氏埔仔寨張志淡妻十五歲適張而無出夫納妾

吳氏年十八性情柔順事嫡如母樛木葛藟各安

分願里黨嘉稱乃氏年念八妾二十一良人棄捐

相泣中庭皆矢志靡他栢節松筠同堅苦耐時年

氏七十六歲妾年六十八歲

曾氏埔仔寨張習傳妻十五歲嫁張二十九守節性

情和淑善事孀姑時年六十九歲

黃氏埔仔寨儒士張永年妻十八歸張諧伉儷事翁

姑乃二十四歲失所天氏飲泣含悲未嘗見齒撫
孤子成名覺序經督學旌松貞栢操四字時年六
十有八歲

張氏橫坑謝仲景妻十一歲適謝二十夫亡氏冰雪
自持誓不改節時年七十六歲

蔡氏高美鄉羅紫棠妻孝事翁姑善處妯娌年二十
九夫故氏守閨門訓嗣子矢志堅貞時年六十三
陳氏大湖洋徐喜兆妻二十九歲夫故遺一男一女

而家貧如洗氏牽蘿補屋矢志守貞孝順翁姑承

歡無缺迨婚嫁畢家道亦成人咸稱翠竹蒼松嚴
冬挺秀時年五十六歲

劉氏藍田金甌寨林大漢妻自幼勤謹有婦德十二
歲適林家承順翁姑克操井臼乃夫外出無歸氏
惟封髮守義維紡維織無非無儀持家有道奉養
必虔至四十六撫夫姪爲嗣教之成立人以爲女
丈夫時年六十八歲

張氏溪頭鄉邱家業妻二十四歲孀守僅生一子以
延宗嗣氏勵志自守貞節堅操撫遺孤至於成

立時年五十七歲

劉氏建橋鄉儒士張世熒妻十七歲于歸適夫因攻書染熱病至二十四而寡氏勵志堅貞栢舟自比立夫胞兄子二爲嗣撫養成立並爲之畢姻姑嫜妯娌間無詬諍而有婉容奉庶祖母蔡氏尤謹常得老人歡心光緒四年提學吳公寶恕旌松筠勁節四字時年六十歲子鑑衡國學孫支森列

黎氏建橋堡黃坭塘藍鼎祥妻自襁褓適藍年十六未締合而鼎祥外出不回氏賦性純淑端莊動必

以禮及閩鼎祥故愈矢志守貞堅心從一舉止勤
儉洵爲巾幗完人時年五十四歲

林氏上洋羅禮發妻二十二歲失偶苦守孀閨志堅
貞節姆訓嫻習可作壺儀時年五十七歲

楊氏蓮塘鄉陳創增妻二十八歲寡居心惟從一茹
荼槩以守幽貞時年五十三歲

陳氏埔頭雙河鄉徐承祜妻二十五歲孀守持家有
道猶是幽閑貞靜之儀教子以慈惟思孝敬儉勤
之則時年五十四歲

傅氏埔頭鄉徐德雄妻二十五歲孀守夙嫻姆訓賦性端莊矢志堅貞持家勤儉撫嗣子而劬勞鞠育事翁姑以孝敬終養壽六十二歲子炳彰國學

張氏縣城龍蟠圍吳敦仁妻二十九歲失偶家翁歿故惟姑尚存氏矢志栢舟終不違侍奉承顏而失婦道螟蛉一子以續宗祧甫歲餘撫養備至教之成立時年六十九歲子炳堂以從九請封

蔡氏銅盤鄉馮善繼妻二十九歲孀守栢節矢志貞操堅志撫養盡道里黨稱之時年六十三歲

蔡氏銅盤鄉馮世達妻十七歲夫永訣心惟從一節
符松栢之挺堅義可全三嗣續螟蛉以承後時年

五十三歲

張氏松林社吳永書妻十三歲于歸二十九孀守堅

貞勁節孝親撫嗣時年七十二歲

吳氏建橋圍儒士張樹業妻二十九歲孀守三子尚

幼祖母寡姑年老侍奉需人氏視膳必虔撫育幼

兒慈愛兼至閨幃霜肅彤管風清時年六十三歲

子克成立次 賢從九品請封孫支競秀

張氏大樞社楊朝全妻二十八歲孀守深閨月冷堅
持心志靡他苦節霜寒惟盡孝慈之職事親教子
卓有徽音時年八十三歲

馮氏南廂吳永澂妻二十九歲寡居矢志從終堅心
守義事姑以孝教子以慈勤儉持家克全婦道時
年五十四歲

梁氏建橋鄉儒士張向葵妻六歲適張二十八歲而
寡冰雪自持孝慈兼盡茹荼含檠節勁心堅時年
五十五歲子有三孫挺秀

吳氏建橋鄉儒士張世經妻二十一歲孀守性情懿

淑志節貞堅奉姑撫嗣孝慈兼盡時年六十一歲

吳氏建橋鄉張芳祖

字錫珍

妻二十八歲孀居二子俱

幼氏恩勤鞠育勗以成立且持家有道事庶姑克

盡孝誠時年七十二歲子步魁奪魁俱大學

吳氏北門外黃家仁妻二十三歲失偶孀閨守節堅

矢無他內則習嫻撫嗣教訓時年七十三歲

以上一百一十一名俱經光緒八年彙詳准旌表

劉氏城東徐永海妻三十歲孀守撫育二子劬勞備

至冰雪持心乃二兒早喪復爲養孫教之成立而
事姑處妯娌尤爲孝敬時年七十五歲

彭氏大樞半嶺黎開舉之妻二十二歲夫故螟蛉一
子撫養成立冰清玉潔恪守閨幃奉翁姑必恭敬
昂嗣子以儉勤光緒七年學憲馮公爾昌獎以松
筠節茂四字現存八十二歲子廷傑例貢生

彭氏姜娘九河社小湯鄉杜昌文之未婚妻年十五
而文病亡氏聞耗卽過門奔喪撫棺痛哭誓志從
終泣請舅姑立嗣繼後乃以夫堂姪日高撫養爲

子事親教兒克盡婦道家有祖母李氏壽屆百有三齡氏尤旦夕侍奉寢膳不離洵爲貞孝懿德卒年三十三歲

高氏璜坑社田背吳世岐妻事姑極孝敬年至二十六夫適亡僅遺一孤尚乳哺氏供養上下備嘗艱苦而栢舟彤管愈切貞操乃姑至老年而逝子纔七歲遽亡俯仰旣見無依終不易其甘貧守節之志里黨咸稱之時年六十歲

呂氏湯坑湖坡鄉羅清就之妻錫灘呂炳女十三歲

劉氏坭溪張發貴之妻五歲適張而後寧遵婦道淑
慎閨門事翁姑不避艱難廿九歲夫亡僅遺一子
零丁孀守茹苦含辛經三十八年如一日光緒七
年報准廣東省城小北門外崇祀節孝祠子炳勳
例貢生現年六十七歲



高賢

宋朱子相傳選勝至潮寓同榜進士鄭國翰家遂偕入
藍田飛泉嶺書莊以居嘗手書落漢鳴泉四大字
揭諸覽勝亭中復鐫石壁上因留題焉今遺跡杳
不可尋矣又傳明時有樵者誤入見脩竹萬竿古
木繁翳鳥啼花開不減武陵歸語人引觀之已失
所在此傳會之言不足信

鄭國翰字寧夫揭邑藍田六圖人紹興十八年戊辰
與朱子同登王佐榜初授莆田令歷官兵部郎中

南渡後致仕歸築書莊于藍田之飛泉嶺集生徒講學其中朱子游湖主其家嘗以澹名軒學者稱爲澹軒先生

楊萬里字誠齋吉水人爲廣州提舉督師至潮經彭田舖登韓山訪韓木復觀於海皆有題味嘗偕黃公度過瘦牛嶺作詩有云平生不慣乘肥馬老去須教過瘦牛

按府志載唐陳元光揭陽人陪義安郡丞陳洪孫洪子政以武功著政子元光鎮撫漳潮屢著戰績後陣

亡貽豹韜衛大將軍開元四年追封潁川侯謚昭烈
建廟漳浦鄉人以陳氏累世貴顯因名其所居爲貴
人村山曰貴人村山揚志又云唐陳洪爲義安丞因
留居爲揭陽龍溪人子政以武功復隸廣州揚威府
孫元九習緇鈴善用兵累官鷹揚衛將軍儀鳳中崖
山劇賊陳謙攻陷岡州嶺左閩越驚擾元光隨父征
戍閩父死代爲將潮州刺史常懷德倚重之時高士
廉孫璇嗣爵申國公左遷循州司馬永隆二年盜起
攻南海邊鄙璇受命專征以光原諳揭陽令提兵入

潮伎山開道潛襲寇壘俘馘萬計嶺表皆平詔立廟
封謚查揭屬龍溪都於嘉靖四十二年割隸海陽並
無貴人村山地名而乾隆三年開設豐邑揭屬分割
地方內有貴人村今居民尚多陳姓但莫有知其先
世者附錄以備參考

豐順縣志卷之七

知豐順縣事禹航葛曙生洲父纂

風土志

氣候 風俗 物產 古蹟 附寺觀坵墓 兵寇

嘗聞習俗之淳漓勁弱地氣使然乃古今不易民而
治豈非風俗與化移易所當因勢而利導哉邑故分
隸海揭嘉大四州縣峻嶺崇山民多悍習仰邀

聖天子德化無遠不屆比年以來調燮濶而瘴厲不作教
學廣而禮義同歸勞勸行而財用日出刑賞立而頑

梗胥願爲之占其氣候考其風尚稽其土宜旁及雜
事今昔蓋殊觀焉久道化成胡不慶仁里而歌樂土
歟守土者慎毋聽之地氣也作風土志

一氣候

五嶺氣候多燠少寒忽燠忽寒其大較也潮郡處省
之東北豐又介在萬山寒較多於他邑冬至後以及
正月寒燠常相半一日中又遷改不常若大風陰雨
嚴霜無論卽盛暑有風雨亦寒深冬時霜白如霰甕
結薄冰高山見雪乃粵屬所僅聞也曉行山多大霧
不辨前峯日高始散三伏暑氣當午尤甚惟去海寫
遠濕蒸少免耳

一風俗

豐邑分割嘉海揭埔四州縣成治風俗鈔畧相近民皆聚族而居質朴儉約無浮靡之習重宗祠祀田婚喪俱倣文公家禮行之士閉門自守絕不干預外事邑雖山陬而溪濱巖谷間土壤可以種植泉源可以灌溉者無不墾闢爲田故力農居多工賈不過十之一二田皆兩熟山水四時不絕惟湯坑羅家約等處以泉少憂旱大小陷隍等處以近大河憂水餘皆旱潦無憂故邑民無大富亦無甚貧婦女汲水採樵搯作

甚勤邑多官山無恆產者多居山麓種植薯芋等物
名爲種輩游民絕少疾病罕服藥信尚炙火平居極
畏奉神有所謂公王國王者不知何自又多惑於形
家言墳墓雖遷徙告爭不厭邑屬無恃衆恃強恃富
恃尊恃奸等習前未設縣時豐政都各鄉去海治甚
遠時有抗糧拒捕之事今亦大變矣惟嗜利負氣聽
唆訐訟或有親族不顧者至於擅攤壓寶此風甚多
尤宜嚴禁因其樸實加以教化非守土是責而誰責
哉

嘉應州移割之環清逕心建橋等處民皆服畊其秀者頗善讀書安分少訟地多官山時有興寧長樂二縣民寓居嶺谷種植薯芋等物里民亦不之競也

海陽移割各社其大小陷隍產溪濃溪九河等處民風謹愿力農工作間有舟楫爲生者皆安業守法畏見官府至北勝橫坑布心大樞等處俗亦愿樸惟爲遷流狡猾之徒所煽爭訟不少而潘田一社爲尤甚下湯大田二社以附近礦山礦徒未絕海志所謂豐政獷悍難治者以此

揭陽移割各寨金鼎金甌金湯羅家約銅盤等處民
居稠密訟端以滋然士知自重讀書應試者在通邑
爲最盛商賈亦較之他邑爲繁之管箕坪貴人村等處
地方寥濶居民不過數百家僻處深山並無田業每于
踰零犂确之地雜樹稻芋養生終年不入城市至爲
貧苦其地行跡罕到司牧者尤宜加意

大埔移割白茫輦等處山多田少民居不繁風俗謹
厚

男女婚嫁貧富厚薄不同禮義則一初時名爲問名

男家以手釧或銀爲櫛櫛儀遣媒致送繼則名爲做
定擇吉日備禮銀猪羊酒米等物送至女家答以禮
帽書儀等項將娶數月前擇定娶期用聘銀五十兩
至十兩不等如前物儀送至女家答之亦如前名爲
送聘及娶先一日仍備猪酒等物往迎其女家嫁儀
視貧富爲之貧者不過隨身布衣而已

居喪初歿時族戚俱到弔哭子孫守屍三日用棺殮
之拜告天地披麻執杖同姓以麻異姓以布俱成服
送至墓所宴以謝之家中設紙屋香案奉祀三年大

祥燒除紙屋麻杖送香案入祖祠合祀葬後十年或十餘年易以瓦礫俗呼金礫收貯骸骨其骨黃者復葬原處如骨黑及濕則另覓葬地喪費亦視家有無爲之

立春前一日有司迎土牛于郊士女聚觀多以豆穀洒之至期鞭春爭取土牛以歸以爲利市元旦晨起祀祖親友往來賀節清明祭墓端午各家裹粽三牲祀祖門前懸艾七月十五日名爲亡人節祀祖冬至亦祀祖十二月二十四日夜茶酒果品祭灶除夕祀

祖

父母翁姑俱稱阿爹阿姆伯叔稱阿伯阿叔姆媻稱
伯姆叔姆翁補壻阿郎壻稱翁亦係阿爹阿姆翁之
兄弟亦稱阿伯阿叔壻之兄稱且大壻之弟稱且郎
其餘舅甥姑表稱謂與通俗同

--	--	--	--	--	--	--	--	--	--



一物產

穀屬

赤早 白早 烏種 早秣 大秣 尖秣 黃占

赤脚占 上五種土人俱稱糯穀古今注曰稻之粘者為秣即糯也宋時分種自占城故又名占

大麥 小麥 荳 即菽有黑綠黃赤白各種 油麻 即芝麻又名胡麻 稷

粟 香米穀 種類白早炊飯香氣異常 薏苡 扁豆 刀荳 穰

子

蔬屬

芥 芹 薑 菘 即香菘 木耳 莧 韭 葱 蒜

蕪菜

一作蕪菜

茄

菠菱

蕨

土人採以作粉製餅

同蒿

蕪荷

建橋

產者佳

烏子荳

長莢荳

絲瓜

土人呼為秋瓜

冬瓜

苦

瓜

一名錦荔支一名癩葡萄

南瓜

土人呼為金瓜

西瓜

匏瓜

瓠子

薯

一作薯卽山藥

芋

蕤

笋

味微苦

蓴菱

地瓜

土名番薯

越瓜

俗名竹瓜有青白二色醬豉糟醋皆宜

芥藍

葉如藍味與芥類稍苦

辣椒

果屬

柑 橙

佛手柑

間有橘

柚

香櫞

柿

桃

梅 李

橄欖

間有梨

波羅蜜

落花生

俗名地豆亦名

蕉子

番

仙甘蔗

湯坑等處所產曰竹蔗可煉漿作糖以販吳越人多以此為利

蕉子

番

石榴

木屬

茶 松 楓 桂 樟 柳 榕 苦楝 杉 刺

桐 檉 棕

花屬

蘭 蕙 珍珠蘭 一名賽蘭 樹蘭 俗呼五葉蘭花如珍珠 玉蘭 木

蘭 倒掛蘭 一名風蘭 桂花 落地金錢 花紅小如錢午

午梅花 桃花 李花 山茶 茉莉 合歡 含

笑 朱槿 山丹 鷄冠 鳳仙 剪春羅 七里

香卽芸草

玉蝴蝶

山梔

百日紅

一文紅

如葵紅色

蓮菊

龍船花

如海棠深紅以端午開故名

美人蕉

葵

草屬

芝萱

席草

可織席又名鹹草

茅

蒲

鼠麴

葉似馬齒莧土人雜

米粉野葛

俗名斷腸草服之立死惟生羊血鴨血及蜜或人糞灌之可活

蕉樹可織布

苧麻

煙草

竹屬

筍竹

猫竹

麻竹

黃竹

赤竹

紫竹

菴竹

苦竹

觀音竹

箭竹

淡竹

慈竹

笏竹

藥屬

菖蒲 益母草 車前草 蒼耳 旱蓮草 紫藤

薄荷 天門冬 麥門冬 三柰 似薑而香合香者用作香料

吳明子 陳皮 香附 土茯苓 金櫻 葶麻

小茴 葛根 艾 金銀花 香薷 甘菊花 干

里及 巴戟 金毛獅子

羽屬

鴿 鵲 烏 鳩 雉 鷓鴣 畫眉 竹鷄 山

鵝 百舌 吉子 俗叫噪林鳥 杜鵑 鶯 雀 鸚鵡

燕

白頭翁

鸛鵒

山鵲

紅嘴長尾

毛屬

虎

豹

鹿

麀

猴

豺

獺

兔

猿

狸

野猪

豪猪

麂

山犬

鼠

蝟

田鼠

山羊

鱗屬

鯉

鯽

鱮

似鯽頭大俗呼為大頭松鮓草魚

鯽

鰻

鱖

鮪

又名鮪

鮪

土鱈

似鱈而小味甚美

介屬

龜 鱉 蝗 蚌 蟹 蟻 蜚 蜎 蛭 蛆 螺 鱧

鯉 即穿山甲

虫屬

蜂 蟻 蟬 螢 蜻 蜓 蝶 蛾 蜥 蜴 蚋

蜈蚣 螳螂 狀如龍虱綠壁善走入厨篋嗜食 水雞 一名田鷄 蜘蛛

螳螂 蟾蛛 蝦 蟊 蟋蟀 蝙蝠 螟蛉 蝸牛

班 猫 蛙 蚊 蠅 蠹 魚 蛇 石 輪

貨屬

苧布 葛布 鈍平鳳葛最佳 蕉布 麻布 綿布

油有藤油茶油菜子糖蔗漿煉成烏糖白糖沙糖茶炭青澱

以藍爲之馬藍葉大各凍石可刻酒杯文錫

銅鉛上四項漸產必呈官充商方准採賣

一古蹟

揭頂

今名飛泉嶺揭志云秦始皇戊守處又云通

志卽作揭陽嶺形勢岿巖其麓達興寧長樂之境
裴氏廣州記以爲此秦戍五嶺之一

藍田書莊

攬勝亭

卽宋鄭國翰讀書處在飛泉

嶺朱子嘗書落漢鳴泉四大字併題絕句今詩字
磨滅書莊亭址不可復考矣

釣臺

明處士羅紅隱居處在藍田上陽卽今羅家

約龍溪之陰叢石巖峩下臨流水偉然勝概水口

有巨石曰望牛石紅隱居躬畊故名

禾倉石 一名印石方正似印大於穀倉在小勝中

村突浮水口上有路開禾熟石坦民安八字人傳
以爲僂蹟

出米岩 在淨水寺後相傳岩有小穴日出米少許
可供一人饌後寺僧鑿之遂絕寺有飛來鍾亦在
其處寶林寺亦傳有飛來鍾疑皆寺僧詭托轉相
傳會者姑存之

歸來亭 在佛泉寺下黔鎮吳啟豐歸里後所構與

友蕭右溪日游衍其中臨流觀魚後毀於洪水康
熙己卯秋庵僧融改作榜曰悠然亦毀今於山麓
築一小院而棲菩薩名之百花庵香草青蒲牽蘿
補屋步履層崖峭石饒有幽趣

通判府署 豐順營 舊址俱在城內今毀為民居
潘田司署 在潘田今廢

產溪驛署 在產溪今廢

武甯驛署 在逕心今廢

鯉魚墩石 在建橋雙溪匯合之處峻石壁立下注

深潭十餘丈儼如游魚戲水形隔數十丈前突聳
一石圓滿若珠大數圍浮於溪中人皆謂鯉魚吐
珠墩畔舊有亭榭每當花木盛開青紅交映水月
連天遊人賞玩不勝有春秋多佳之致

環翠亭

在建橋西門外榕樹一株屈曲若虬龍大

可十數圍陰森蔭十數畝下建一亭閣顏曰環翠
中祀呂文宗先生牌位鄉人於花晨月夕嘗聚談
讌會於斯下有十二洲石梁極長橋臥波之觀

石塔

在建橋蔴地埔突聳石峯高十餘丈竒特尖

秀儼然水口文塔今燒毀

烏石頭 縣城西通衢旁離城兩里許高丈餘週數十圍乾隆間典史周勝萬俸滿晉省經過其處賦七律一章鑄諸石詩云謝却風塵十二年鄉關望斷子規天周旋久愛蘭爲友勸勉還將石作箋無屈十分書忍字得閒一刻種心田情深最是臨歧際回首豐城月滿川

龜石 在蝮蛇崗口路屬璜坑社距縣城四里溪中有石廣四五尺長七八尺躍起中流頭頸身縮背

錯綜酷肖龜形隨波衍泛行人俱得寓目焉

鐘石 在布心社小樵村尾離縣六里山形如龜其
眼窈而深內構神宮一座宮後樹木陰翳一巨石
巋然傑出高廣數仞擊之聲若洪鐘

第三磔 在布心社離縣二十五里山勢鼎峙形若
二獅一象石骨昂伏巧合天然其中澗水廻環由
第三磔出口奔騰飛瀉高約十餘丈下有磐石激
響錚錚然如鑼鳴再落直播潭心反作鼓音相應
形與目謀聲與耳謀竒趣各出如此

石古砬 在潘田社中村離城五十里乃由縣至隍驛站旁有古石嵌空陡削竒峭橫直丈許內供神座甚靈驗右配猪石左配羊石居前一碣尤雄峻乾隆年間知縣秦公泰過此大書聳翠二字以紀賞之

層石巢 在璜坑社尖髻山邊離城三十里由山腳直上約十里至絕頂突矗方石高數丈大如巨鰲中斷復連故名層石石下凹處作神巖可避風雨背有池廣兩畝許深澈四五尺每當春夏之交豐

馬川身一
草綠縟皴波若織週遭復產香茶遊屐所及髣髴
旃檀上界土人因呼爲自仙塘

仙蹤石 在占頭鄉東面小溪上石方廣十丈現仙人足跡一雙長五尺許跡中有水終年不涸如涸則主旱里人以此占雨水焉亦名穀箱石

仙蝦石 在占頭中村突浮水面狀若生蝦石面有神宮宮後終年有泉味甘可解煩渴行客利焉

翰墨石 在紫荊洞水口長約二丈端正如墨橫亘溪流石上有翰墨題名四字相傳爲仙跡云

響石 在大隍隍紅隄山頂高數丈廣五圍嶽嵌三層以石擊之玲瓏有聲宮商各協每逢踏青節遊人賞玩流連而不忍去焉

龜蛇石 在占頭鄉中村水口溪流屈曲左右有二石像龜蛇相對水石激湍機趣橫生兩岸古木陰森雖盛夏無酷暑氣上建白沙公王神宮一座宮名永福旁有惜字塔高丈許

石狗 在北勝社離縣一百十里隍隍大河而上有石蹲踞河干昂頭向水形體酷肖守犬船商行客

經此見之者莫不歎羨生成之奇物相傳古歌謠
云鳳凰袖啼石狗吠可以占風水

童子拜石 在北勝社與太埔屬分界由河面及山
腰危石聳特形肖觀音叢林遮護天開異境有石
童子二拱立作拜狀因名

紗帽石 在雙螺口鄉沙渚中方廣丈餘四面陡削
劈分兩層後若列幔前若覆幘如紗帽然爲豐城
水口之鎮

龍星珠 在雙螺口鄉一帶清溪繚繞狀若虬龍有

石圓潤如星珠嵌綴中流高廣數丈

金龜石 一名金印在大隍蓮塘鄉口色若黃金
形如巨龜突起中流下臨高礫礫石有人馬行跡
聯絡雜沓世多指爲仙踪

仙人石 在小勝鄉尖山嶺有石酷肖人形屹立其
上相傳祈晴雨立應下一石如蟾蜍張巨口容水
斗許經冬不涸有云取其水可瘳惡疾

三十六墩 在北勝龍溪綿亘十餘里高出羣山上
纍纍如貫珠每澗出泉甘美可愛曩傳上有仙人

倒挿竹枝葉何下時或見之

鯉魚石 在魏鄉水口距城五十三里山形如鯉在水之涘高廣數仞層石巍峩古木陰森鄉人多於此祀神焉

紗帽石 在產溪社靈水鄉離城七十里距黃金埠十五里水口之東山有巨石巍峩端平名爲紗帽復以石擊之恍若鑼鼓聲音聞於里許山麓怪礪嶙峋羅列拱護透闢玲瓏天然石室鄉人於此立譚公仙聖廟崇祀焉對面溪西又相綴兩石高廣

數十丈石紋現出福字宛肖形摹每風日晴和遊
人賞覽嘖嘖稱勝景云

東山巖 在大田社長叟口距城七十里負山面水

雙流匯合巉巖怪石環列山麓別具洞天建立宮

廟祀 鼓二帝其巖下餘址里人孝廉葉上林倡

建行宮爲修禊勝槩社有公事亦咸集會議焉

鷓婆嘴 在大田西地居辛方聳拔如筆嵐光送翠

飛瀑懸崖竒崛變幻不可名狀

鐵策寨 在潘田社距城四十里高出雲表周圍二

十餘里絕頂甚平坦上建華光太帝廟不知始於何時相傳神化鶴飛來迄今屢屢顯聖有禱靡弗應者

佛祖一 在雙螺口鄉其地枕青山挹溪流石壁嵯峨林木蒼翠上建神宮一座亭閣清幽水光倒影如列畫圖徃來行人多憇息於此神亦靈應能福佑人

古宮榕樹 在環清堡瑞臨埧距城四十里舊有社壇溪流旋繞旁植古榕一株飽雨露已歷百餘年

幹大十圍蔭垂數畝虬曲蟠結望之亭亭如華蓋
中立撐天喬木亦洵足寶貴焉

獅子砮 在環清堡三枝嶂頂有石巖巖奇峭巉聳
屹立山巔形象儼若戲球之獅逞露爪張牙之勢
因名之曰獅子砮

齋公田 在韓山之麓突然平坦廣約三里中間低
窪似池非池而泉源流出遂成一溪清潔甘美可
灌田數頃相傳前朝有菴堂一座聚集齋公和尚
百餘人皆挾奇技異術將以爲亂官府聞而擒滅

之庵毀廢今遺址尚存同治八年鄉人好佛者捐資仍修葺之古刹重輝別開境界

韓山嶺

在城西一望至高廣之山乃潮郡揭陽豐

順發源之龍祖也距縣四十里高十餘里週圍廣

八里峯巒突兀山頂平湖如盆底山水潺湲流成

溪渠竒花異卉四時俱有山麓又特聳一石雙層

連綴高十餘丈大十數圍頂上一石端方平正較

下層石尤廣厚相傳仙人下棋處蓋能攀援探上

者猶見棋盤痕蹟云

諸寺觀

布福寺 在布心社

保福寺 在布心社離縣城一里饒鍊吳六竒重脩

今名新庵面溪背嶺松栢交蔭風濤長鳴盛夏如

秋

佛泉寺 在橫坑社離縣城一里坐峭壁上饒鎮吳

六竒重脩下有泉名佛子潭聚魚千頭寺僧鳴拆

飼之隨響躍起以爲常遊客投以雜物輒吐棄

如受佛戒潭上舊有亭康熙四十一年四月晦日

溪水暴漲亭毀泉亦潰決今不復聚魚矣

廣福寺 在橫坑社順治時副將鄒瑞重修

龍祖寺 在橫坑社離縣城二十里饒鎮吳六奇重

修度三峻嶺始達居深山中茂林脩竹泉甘土肥

不啻盤谷

淨水寺 在下湯社衆山之頂層峰迴抱曲澗環流

寺後有飛來鐘文刻至元三年相傳有鐘飛來鄉

人始建寺舊址茅菴已毀康熙乙巳年里人胡海

重建

沙田寺

在北勝社離縣一百里順治十二年建

東林寺

在布心社順治十八年里人楊正脩

慶福寺

在濃溪社離縣七十里順治十年建

植福寺

在產溪社白土鄉離縣六十里相傳元時

建

資福寺

在大樞社饒鎮吳六奇脩

凌雲寺

在大樞社

南山寺

在建橋堡離縣二十五里宋元祐八年建

蓮花寺

在逕心堡蓮花山離縣六十里明萬曆中

建康熙十九年重脩

言嶺寺 在環清堡離縣四十里

羅寨巷 在上陽村卽羅家約離縣七十里宋巡檢

羅安建

下壩巷 在下壩寨離縣七十里

寶林寺 在環清堡離縣三十里建自元朝康熙時

舉人吳啟晉重脩寺有飛來鐘初有潭一線泉桃

花溪開經石擲錫峰

水口巷 八鄉亦有此寺名

長寧寺

俱在潘田社離

縣四十里

圓應寺

在仙洞坑離縣十五里順治二年建

慈祥菴

在大隍墮離縣九十里崇禎時建

七娘菴

在鄧屋寨山上離縣六十里明隆慶三年

西蜀人總鎮郭成松建相傳嘉靖末山寇蘇劉等

聚藍田山谷中總兵郭成松督師征之至小灘見

七婦人渡水語以賊巢所在併授進勦日期後平

賊果如其言爲之立廟至今里民崇祀又稱七聖

廟其灘卽名七娘灘

末豐菴 在磔下

福壽菴 在犁頭山

西岩寺 在平城鄉

藍定菴 在溪頭寨

太平菴 在湯坑三門凹下離縣六十里

蟾步宮 在大樵社離縣三里廟後一園約四十餘

家踞大溪上從無水患相傳康熙五十三年洪水

爲灾廟神於前數日見夢於鄉老巫乃文謂某晚

圍有水患當預避文卽遍諭鄉人衆以文謹厚信

之預爲備及某晚果洪水奔騰廬舍淪陷而人得全活

太陽宮 在崧沐社離縣一里有古榕一株不知何代物方廣十餘丈枝葉扶疎而樹根空濶蟠固儼若堂奧門戶皆具土民構椽其中奉神祀之號曰太陽宮今卽以名其地

刷牛社 在大樞社里民築壇于社日祀神

謝娘娘壇 在橫坑社尖山下相傳明末女子知兵原長樂縣石子岡涼傘樹下人順治中車任重寇

通通判府神顯靈驅之賊衆驚潰後饒鎮吳六奇
副將鄒瑞重脩祀之

逸老菴 在藍田隆烟寨前明銓部羅萬傑建爲雲
水歸休之所後以居僧環菴植叢桂脩竹鑿方塘
種蓮養魚距羅紅釣臺一望許國初雪樵僧題其
額曰逸老

五顯帝廟一在建橋堡大高巢相連今名五顯巢層峯
環繞樹木陰森中間神座一棟一拜亭所求皆響應
一在潘田鐵巢寨一在產溪白土鄉水口一在
龍溪徑門一在建橋園內凡有祈禱均顯威靈實
爲各鄉所托庇也

三山國王廟一在璜坑社坊頭官廟貌莊嚴不知何時
所建一在松林社白沙宮

盤石寺 在北勝社大勝鄉之西北離縣百四十里有
石如盤石上建寺一座林木蒼翠山水清幽中祀大

日川... 卷之八

士像最靈禱雨尤驗寺側添建文昌宮一座鄉人官
勝東巖自盛楊紫驕於雍正十三年倡建並捐有糧
田糧山為寺中香燈勒石寺外昭示來茲遊者皆稱
洞天福地云

公王宮在普濟橋東宮後古榕濃蔭亭前曲水迴流邑
人全建

青蓮觀在環清堡萬石崗對面山巖石巉叢恍然石洞
同治年間道人韓道榮負石為居小築數椽日夜坐
蒲團而修真煉性且辟穀絕粒人因稱韓半仙云

附址墓

宋梅州知州揭陽陳希佖墓 在藍田上陽村

南雄府沙水鎮巡檢羅安墓 在白石嶺

元博羅縣主簿羅直養墓 在上陽龍眼窟

明黎翼士墓 注大樞社相傳明初南京人，衆擁戴

太祖渡江，登基勅授副將，賜名翼士，四世孫文統

曾任參將，善用兵，後征寇陣亡，查其子孫明季始

移居大樞，何得有明初祖墓于此，恐悞

吏部郎中海陽唐伯元墓 在小墮隍石狗鄉

國朝贈昭勇將軍國學生羅基蒙墓 在龍上村

贈光祿大夫鄉賢吳廷符墓 在關上凹下

江寧府鎮叅將吳標墓 在橫坑社新嶺下山

舉人吳啟晉墓 在橫坑大埔坪

黃岡協副將吳啟鎮墓 在布心社粗石坑

瓊州總兵官吳啟爵墓 在布心社湯背山

虎頭門副將吳啟相墓 在橫坑社逕尾

贈文林郎人埔李衍白墓 在神砂鄉

贈脩職郎知縣揭陽李衍泌墓 在長埔尾天梓山

贈光祿大夫丁賢拔墓 在湯坑三門凹路面上

贈中議大夫張石岡墓 在逕心堡林家屋後嶺

贈中議大夫張紹榕墓 在逕心堡赤嶺鄉

贈光祿大夫吳邦表墓 在松林社

贈光祿大夫吳偉墓 在松林社獎坑

贈修職郎張起龍墓 在逕心堡

贈文林郎吳琦瑞墓 在松林社

贈文林郎吳廷瑄墓 在璜坑田背鄉

文林郎廣甯縣知縣吳瀛達墓 在璜坑田背鄉

文林郎分宜縣知縣吳志孔墓 在環清堡獅子巖

贈中憲大夫馬平縣知縣吳亦材墓 在大陣坑

驍騎將軍湖廣德安協鎮府鄒瑞墓 在大埔古野

歷任揭陽饒平大埔叅將鄉賢楊貞墓 在大埔尾

記名御史禮部祠祭司郎中吳世驥墓 在新窰嶺

封文林郎國學張權達墓 在璜坑社大陣坑

叙選縣主簿張承立墓 在大陣坑

文林郎舉人譚廷儁墓 在鉛山湖洋窩

兵寇

陳遂綽號吊眼豐政都人元至正十六年據揭陽城
僭稱陳定王後敗入揭邑黃岐山石穴死土人指
爲陳吊嶺今吳六奇之母塚右側是其舊宅址

蘇繼相於嘉靖十三年據藍田之黃寨號天一大王
三十七年乘倭寇攻揭與劉興策吳平等相煽作
亂總兵郭成松討平之

鍾凌委糾黨葉澳婆陳蠟梨等崇正三年掠大埔縣
弓洲湖寮等鄉又掠揭陽縣藍霖諸村鄉翰林郭

之奇捐募壯士躬先救禦知縣馮元颺統官鄉兵
逐至盛田之上陽入長樂界克之四年葉澳婆又
合張文斌據馬頭大田等處後爲閩僞平國公鄭
芝龍誘致殺之

張文斌豐改賊據蠟燭寨肆掠海揭埔三邑旣撫復
叛崇正五年制府王業浩檄總兵鄧懋官討之破
其寨斌遁揭陽縣知縣陳鼎新叅將夏之木鄉都
司黃夢選追至石子礮山鳧洞大破之獲賊師劉
奇秀文斌逆人松光洞爲海陽知縣江愈敏擒獲

送軍門伏誅

金鼎光原名鄭心台豐政都人易姓名爲盜首鍾凌
秀謀主三省勒兵不獲崇正五年揭陽知縣陳開
新偵擒之

劉公顯石坑賊首順治二年統九軍賊總聚藍霖二
都以叛九軍者曾銓馬麟馬殿馬登傅達邱瑞黃
甲呂忠呂玉又以潘俊爲東軍陳雲任爲南軍陳
汝英爲北軍陳侃如爲西軍溫韜魯爲都軍吳元
爲大將會懋昭爲二將其餘賊首以數百計僭僞

號曰後漢大昇元年閩僞都督陳豹至揚名爲救
援實通賊黨招九軍爲義男授以僞都督官據城
掠鄉勢益猖獗三年大兵至潮賊隨衆投誠總督
佟養甲提督李成棟帶各賊隨征赦前罪授以職
銜賊黨始棄揚城歸山肆行不改五年復擁衆犯
府城敗回新亨乃逆閩僞定國公鄭鴻逵至揭城
倚以爲主焚劫各處鄉寨六年總鎮郝尚久大戮
之於梅岡得志五年始有此敗八年總鎮班志富
攻殺公顯及馬麟傳達傳首至縣民快之餘黨據

鄭厝倉洪厝寨許厝寨賊更名曰鴛鴦寨郝班二
鎮會兵勦之圍守百有餘日餓死幾半賊巢毀平
十一年饒鎮吳六奇復大敗之餘孽始盡

呂龍綽號破碗公與趙榮爲八鄉盜首康熙十三年
勢漸猖獗聚衆千餘與海賊邱輝通二十年提鎮
遣遊擊程士鰲勦之程以計斬呂龍降趙榮餘衆
解散

武南公馮玉成馮阿六等賊康熙二十八年鳩黨鳳
凰山中劫掠近鄉饒民文殿佐殿餘兄弟統族勦

除之潮州知府石總鎮薛申報制府給以千總劄
付併十一邑總捕牌巡守地方隨同官兵勦賊餘

黨悉平

豐順縣志卷之八

知豐順縣事禹航葛曙生洲父墓

藝文志

文 詩

古太師陳詩以觀民風志有藝文卽採風遺意固一
邑之人情土俗時事物變所由傳也前明羅銓部有
才名於時今存瞻六堂詩而諸作絕少則邑先達之
著作散佚不傳概可想見少師吳順恪以武功顯讀
其忠孝堂集招撫等篇忼爽直切深達事機惜此外

之不多觀也邑屬山巖奇峭林谷深阻幽泉怪石不可殫悉設移之都會其發爲文章者當不止此然而單詞片語採風者勿棄錄之以備後覽焉作藝文志

文

勅建加贈少師兼太子太師廣東饒平總兵官左都督謚
順恪吳六奇碑文

稽古建業驅策羣力不吝爵賞以勸有功昭示後世
用傳不朽所以勵忠蓋甚備也爾吳六奇識時知命
率衆來歸秉義懷忠宣力戎伍至於郝尚久叛踞潮
州爾能奮勇勦滅賊寇蒞任巖疆厥有勤勞忽聞長
逝甚悼朕懷特賜謚曰順恪勒諸貞珉光及泉壤國
典臣誼庶其昭垂母戮哉

皇朝通志

卷之二

康熙伍年玖月初柒日立

御製諭祭吳少師文

惟康熙六年七月十四日

皇帝遣廣東布政司堂上官

諭祭故加贈少師兼太子太師廣東饒平總兵官左都督謚順恪吳六奇之靈曰鞠躬盡瘁臣子之芳踪卹死報勤國家之盛典爾吳六奇性行端良才能稱職識時慕化率衆來歸方冀遐齡忽焉奄逝朕甚悼焉特頒祭葬以慰幽魂嗚呼寵錫重壚庶享匪躬之報名垂信史聿昭不朽之榮爾如有知尚其歆享

皇朝集三

卷之六

三

三
皇朝集
卷之六

PDG

光緒九年十二月

日

皇帝諭祭原任福建巡撫丁日昌之靈曰鞠躬盡瘁臣
子之芳蹤賜卹報勤國家之盛典爾丁日昌性行
純良才能稱職方冀遐齡忽聞長逝朕用悼焉特
頒祭葬以慰幽魂嗚呼寵錫重墟庶沐匪躬之報
名垂青史聿昭不朽之榮爾如有知尚克歆享

皇川集

卷之二

三

皇川集
卷之二
三

PDG

戮鱷魚文

宋 陳堯佐

乙亥歲予於潮州建昌黎先生祠堂作招韓詞載鱷魚事以旌之後又圖其魚爲之贊凡好事者卽以授之俾天下之人知韓之道不爲妄也明年夏郡之境上地曰萬江村曰硫磺張氏子年始十六與其母濯於江渚倏忽鱷魚尾去其母號之弗能救泊中流則食之無餘予聞而傷之且謂天子聖武王澤昭洽刑不僭賞不濫海內海外罔不率俾昆虫草木裕如也鱷魚何悖焉而肆毒任虐之如是是不可不爲之思也命縣邑李公詔郡吏楊勛拏小舟操巨

網馳往捕之歲謂予曰彼不可捕也穴深淵游駭浪非人力之所能加也予則不然復之曰方今普天率土靡不臣妾山川陰陽之神奉天子威命晦明風雨弗敢逾也鱷魚恃遠與險毒茲物律殺人者死今魚食人也又何如焉昔昌黎文公投之以文則引而避是則鱷之有知也若之何而逐之姑行焉必有主之者矣苟不能及予當請於帝躬與鱷魚決二吏既往卽以予言告之是日乃投網輒止伏不能舉由是左右前後力者凡百夫曳之以出緘其吻械其足檻以巨舟順流而至闔郡聞之悉曰是必妄也安有

食人之魚形越數丈而能獲之者焉既見之則駭而喜且
曰生於世有百歲者矣凡上下水中或見其隆伏髣髴之
狀雖相遠百步尚不取抗今二吏捕之猶拾芥焉實今古
之所未聞也向非公之義洽於民公之令嚴於吏自誠而
不欺也又安能殲巨害平大怨宣王者之威刑焉予始憚
之終得之又意韓愈逐之於前小子戮之於後不爲過也
既而鳴鼓召吏告之以罪誅其首而烹之辭曰水之怪則
曰惡兮魚之悍則曰鱷兮二者之異不可度兮張氏之子
年方弱兮尼而食之胡爲虐兮焚焚母氏俾何說兮予實

命吏顏斯作兮害而弗去道將索兮夙夜思之哀民瘼兮
赴赴二吏行思恪兮矯矯巨尾迎而搏兮獲而獻之俾人
樂兮鳴鼓召衆春而訢兮而今而後津其廓兮

瞻六堂詩序

明陳際泰

陳子於有韻之言本無所諳然從衆中讀之謬相然贊譬之陸羽不識字坐石上讀書效人口動而已前序天中石郎詩亦爲此語石郎大貽笑之以爲陳子之直白如此也陳子在浮梁舟中晤汪函朗函朗爲汪伯玉大司馬從子素不習時義而善古文辭得予制舉業大嗟賞予刻怪卿不習此何以獨賞此然以別友文使之讀則已不解爲何語矣世之習舉子業者以陳子之文不可句而汪所不解者乃在彼不在此彼非以時文讀陳子之書以古文讀陳

子之書也由此言之陳子不諳有韻之言至如羅子貞卿之詩則固諳之矣讀之政如讀古人名作古遠澹宕而秀傑之氣往往引人着勝地味之經年未必可盡也然乍接之時一睇而見之洪纖高下雖不習者皆能名其處此爲天材絕優非復一流之材之所可幾者也陳子所不能諳者雖坐不習然亦世人之爲詩有以使之然詩如貞卿而陳子猶貽人云效人口動而已夫非媒而誕陳子亦不爲也貞卿年少制義外凡有雜著皆可名家此詩固已見虎

一文矣

瞻六堂詩引

吳本泰

於制科帖括之外別出一枝而燈傳無盡者唯詩詩者清
微窅渺之氣激越以鳴者也熱場濃趣中焉得有詩以真
詩與真能詩人處熱場濃趣中憂憂乎其不相入矣年友
正卿妙年早達游刃吏事余十駕弗及而襟情蕭遠頗似
之余每見其戟髯抵掌如滕元發扁舟破浪而來軒然聳
出至讀其詩如九臯獨唳深林孤芳異香幽響都不着人
間澤穢笠澤翁評山谷帖謂不應携在長安逆旅中亦非
貴人席帽金絡馬傳呼入省時所觀余於正卿詩亦云

奏陳言疏

國朝
吳六奇

奏爲遵

旨陳言事順治拾貳年正月拾玖日欽奉

上諭文官自督撫以下知府以上武官自提督總兵以下副將以上管轄之內職掌事宜俱着詳切直陳無隱以資採
用欽此又於順治拾貳年叁月初叁日欽奉

上諭吏部等衙門凡有敷陳必實切

國家之大政確指兵民之利害方許進奏毋得浮泛雷同妄
行瀆奏欽此欽遵伏念臣廣東潮州人也濱海愚弁不敢

言天下事惟就事言事直陳今日海濱戰守之急務實切
國家之大政者如揭陽克復之後臣卽陳善後之策已蒙督
臣李率泰批行不敢復瀆

天聽矣惟是海逆鄭成功未卽一旦撲滅蓋踞海澄廈門銅
山等處爲鳥窠而以澎湖浯州金門南澳等處爲退步諸
地皆在海中或週圍百里數十里有山有田有人所居者
皆食賊之食官賊之官其黨類滋蔓恃有大船沿海劫掠
上至江南温台下至潮惠高雷等處結艚揚帆去來莫測
爲今之計必於沿海地方凡賊船所到之處各設重兵守

禦以絕賊劫糧之路必於福興漳泉潮揭等處附近賊窠之所製造船隻招募慣熟水道之人有家眷爲質者使之操舟戰守旣備賊中之內亂自生然後乘風破浪犁庭掃穴彼烏合之賊無不追踪逐北矣若船取於他州使船非本地之人則港門水道不熟必悞大事此萬萬不可者且置船之策不惟今日剿賊急用卽鄭逆撲滅之後尚慮海賊時時竊發亦必有備乃可無患如先年海賊遠不具述近如袁八老之後卽有桂竹老又有李魁奇劉香老等寇爲患不絕彼時沿海遊寨尚有官兵又有瞭哨兵船卽如

南澳先年設副總兵一員內有廣營福營又有防倭一營
今爲僞候陳豹所踞則今日置船招募以圖撲滅復此疆
土不可不亟爲綢繆也然造船之見人言所必同者而臣
所言置船須得其地用船須得其人乃治海急務萬不可
無此人此船者蒞蕘之言倘有可採伏乞

皇上勅議施行

招撫南澳題疏

題爲恭報南澳僞鎮率衆投誠兵民棄澳盡歸以仰慰

上懷事竊惟南澳一島原屬廣東潮州饒平境上與閩之廈門銅山久爲鄭逆盤踞窠穴康熙二年五月臣奉

上旨會勦無功兢兢待罪乃多方用心以圖必得至本年十一月初四日據臣標署守備管中軍遊擊事鄒瑞稟稱本月初二日據署守備管中軍守備事李青稟報有南澳僞鎮杜輝遣長髮差官林星初一夜從馬頭山登岸潛至汛內前來見青稱欲見臣有議大事之舉事干緊急機會崙

差林恩護送林星到臣隨喚林星面見繳杜輝上鎮海將軍王國光小劄一摺據稱杜輝願以南澳投誠立功等情時將軍臣王國光安輯部臣華善同

丙差往省西巡臣乃令臣標隨征都司歐亮効用官陳忠林

恩帶林星赴見安輯部臣陳一炳鎮海副都統臣吳天壽

臣段應舉會議給牌齋與杜輝印信文書於初六日早由

黃岡直至南澳面見杜輝仍給牌一張付與歐亮與輯部

差官吳必興駕船泊於橫山伺接消息刻限回報去後初

九日據歐亮稟稱初八日杜輝又差林星同効用官陳忠

林恩回來口稱欲與臣面會有誓壹封交陳忠等投上宛
同輯部差官帶林星見輯部兩副都統及潮州鎮道府館
於公議堂會議約十一日前去相會等情臣於十一日會
同安輯部臣陳一副都統臣吳天壽臣段應舉齊到黃
岡俟至十三日據瞭望兵望見南澳有大船五隻前來又
據大城所千總張祐馳馬來報稱杜輝親到要與臣相會
臣卽時同安輯部臣副都統臣前去途間遇澳差林星稟
稱各要單騎不用多人等語臣見杜輝心尚猶豫立撥部
劉叅將管大城所守備寧吳漢中軍守備李青先上杜輝

之船以安其心杜輝亦帶親隨百餘人登岸至馬頭山時副都統臣吳天壽帶正白旗噶叭叶李章京副都統臣段應舉帶鑲藍旗李代子單騎前去仍撥趙固山大朱甲喇各官帶八旗官兵同臣下中軍遊擊鄒瑞部劄都司僉書李焜隨征戎旗守備張魁蔡鳳陳龍千總朱樑張祐各帶官兵劄營橫山砲臺及在馬頭高山背後防護臣則帶部劄都司僉書曾蘭同安輯部臣陳一炳副都統臣吳大壽臣段應舉筆帖式臣江維祥單騎至馬頭山下相會據杜輝口說鄭錦雖敗銅山尚要整理火船燒紅窆夾板思復

金門廈門有裨調輝輝見鄭家之人骨肉自殘願以南澳
獻地爲功非有兵馬所逼卽有兵馬輝亦能當一面等語
時安輯部臣兩副都統臣諭以利害臣勸之再三乃要臣
等給示差官前去南澳張掛立令兵民削髮約十六日繳
偽勅印先送家眷過黃岡容輝收拾在後帶兵民棄澳全
來又稱官兵有五千大船肆拾隻中船百餘隻民有二十
萬何以安插等語至申時彼此起身而回然後吳漢李青
俱各回來十四日臣與安輯部臣兩副都統臣卽給示各
送袍帽靴帶全差歐亮等齎送前去并監督兵民削髮去

後十八日據歐亮稟稱亮十五夜到澳見杜輝十六日掛
示兵民剃頭立要渡海因十六十七兩日大風難渡今杜
輝先遣長子杜國琛帶僞印關防牌劄并杜輝胞弟與僞
坐營中軍家眷先到黃岡杜輝欲將澳民渡盡然後將家
眷并各將兵丁家口盡上大船欲載往揭陽縣內居住等
情到臣臣即同安輯部臣陳一炳副都統臣吳天壽臣段
應舉江華帖式趙固山大朱甲喇并八旗官兵同臣下中
軍游擊鄒瑞等各將領齊到橫山劄營其長子杜國琛年
一十四歲同僞叅軍錢青陳珍齋僞蕩胡將軍銀印一

顆僞牌劄五十五張當公帳房隨交安輯部臣陳一炳收訖其子并各家眷臣卽備用民夫搬進黃岡城內着千總朱樑劉勝張祐將各將領房屋及兵房搬空與住此日來到兵民男婦已有千餘二十一日臣接杜輝手書內稱二十日將輝家眷及將領兵眷載入揭陽安插其士民眷口亦令隨船載入黃岡其澳城民房或存或燬乞迅委官料理等情并與輯部副都統諸臣各書一封是日安輯部臣卽令江筆帖式潮州府知府臣宋徵璧前往揭陽縣預撥房屋其澳城去留臣就近呈請平藩將軍督提諸臣會議

聖廟志卷之八
卷之八
裁奪去後二十三日據歐亮自南澳回來稟稱亮二十一
日奉差同輯部副都統各差官一員蒙交袍帽靴十副齎
往南澳要杜輝前來剃髮以便疏

報等因亮遵依前去值狂風大作坐船桅斷舵失艙破入水
飄至南澳後汐地方潮水閣淺方得登岸到澳而杜輝已
於二十夜開船去揭陽矣等情臣同時面副都統臣吳天
壽說據揭陽砲臺水師遊擊李培基報稱杜輝有家眷船
四隻兵船三十隻俱入揭陽港內等情二十九日接潮
州府咨呈內稱同筆帖式江親到揭陽撥出房屋五百餘

問不足又撥出東南門內二街民房并大頭目衙門四十
餘所俱已齊備又知府自捐糧米五百石概家伙等物俟
應安插具報在案同日又據歐亮稟稱杜輝于二十八日
親帶大小將領到安輯部臣衙門遵

制剃髮訖等情查先渡過偽將楊世炯等二十餘名臣各給
袍帽靴帶馬匹各將領家口共一千七百餘口臣撥屋給
米安插在黃岡城內居住渡過民間婦女一萬餘口每日
臣給米三升五升不等聽其四處居住俱經塘報平藩將
軍督提在案其杜輝所帶官兵家口船隻軍器開列造冊

呈送平藩將軍督提輯部諸臣題

報外以二十載踞澳之逆寇大師未曾歷境而杜輝一旦統
衆輸誠各携家屬及兵民眷口棄澳盡歸

朝廷之德化仰祈

皇上崇爵鼓勵來人然此乃仰賴

皇上齊天之洪福而平南王臣尚可喜鎮海將軍臣王國光
協鎮將軍臣沈永忠督臣盧崇峻撫臣盧興祖提臣楊遇
明之密諭招徠潮州鎮臣黃應傑安輯部臣華善夙籌方
畧與部臣陳一炳筆帖式臣江維祥宣布

皇仁副都統臣吳天壽臣段應舉單騎不避危險之力也臣
雖竭盡心力派屋撥船給發袍帽靴帶馬匹猪酒糧米不
惜已私以報

朝廷萬一分所當然何敢言功惟臣下標員如隨征都司歐
亮渡海四次捨命涉險如部劄叅將管大城所守備事吳
漢署守備管中軍守備事李青身先虎口如署守備管中
軍遊擊事鄒瑞董統勤勞千總劉勝朱樑張祐部劄都司
僉書李焜曾蘭王籌隨征都司陳利守備張魁蔡鳳陳龍
林馥効用官陳忠林恩等靡不竭力奔馳共圖報効而紆

皇上海顧之憂也緣係恭報南澳僞鎮投誠情形字多逾格
伏乞

睿鑒恩宥施行

再報招撫疏

題爲再報僞鎮率衆投誠祈

睿鑒事案照僞將軍鄭夢蛟等率衆投誠業經彙

報外康熙三年二月二十四日有僞前隨征都督僉事陳六
言自銅山駕船一隻前來繳僞關防一顆僞牌一張隨行
兵丁一十九名家眷二十七口康熙三年三月初四日有
僞都督毛興僞副將毛玉陳勝林臯陳好李祐林宗等據
稱三月初一日自銅山與僞伯洪旭黃廷欲送鄭錦去臺
灣一同開船方得駕船五隻帶到兵丁三百五十五名家

卷四百七十七口繳偽耀武將軍方印一顆偽關防六顆
偽牌二十三張前來投誠康熙三年三月十一日有偽將
郭勝蔡福據稱由廈門港駕船一隻帶到兵丁一百五十
一名家眷二十八口繳偽關防二顆偽牌二張前來投誠
康熙三年三月十三日有偽都督張堯天偽將杜進林亮
張東據稱同洪旭黃廷送鄭錦至金門駕船三隻兵丁七
十七名家眷五十八口繳偽關防五顆偽牌十張前來投
誠各等情到臣臣逐一驗明各給袍帽靴帶通共給過緞
袍一十四領布袍二十一領帽三十五頂靴三十五雙計

帶到兵丁眷屬共一千一百八十五名口臣各給食米菜
銀暫行安插解赴鎮海將軍臣王國光安輯部臣華善臣
陳一炳驗明遵

刺髮通報平藩協鎮將軍督撫提鎮諸臣在案今照銅山
逆賊俱已削髮登岸止有鄭錦洪旭黃廷雖潛遁海外難
逃福建靖藩總督兩臣之勝算銅山逆城現福建靖藩總
督兩臣親統大師進勦平燬全海無寇臣汎守邊海招引
投誠實叨福建靖藩總督搗窠之功廣東平藩將軍督撫
提督輯部副都統鎮道府館縣諸臣德威之力也緣照自

康熙二年十一月南澳僞鎮杜輝吳陞投誠起至康熙三年三月僞鎮張堯天等投誠止前後總計招過僞將軍僞鎮將共一百八十七員兵丁四千三百五十四名眷屬三千六百九十二口渡過百姓男婦三萬餘口駕來大小戰船九十七隻臣逐一驗明造冊繳赴鎮海將軍臣王國光安輯部臣華善臣陳一炳查照存案外至於應請各僞鎮僞將職銜鼓勵優異之

典及編氓安插歸農與調撥入伍充兵之例平藩將軍督撫提督輯部諸臣自在公

疏無容臣贅也臣前後給過袍帽靴馬食米菜銀少稱臣分
罔敢開報惟是臣之標下前

疏開列有名將領始終竭勞不敢少怠至饒平知縣劉鴻業
捐米五百石協心料理提督臣差隨征守備厲逢祥能與
投誠官兵周旋安慰宣布當事諸臣愛待之心功實不少
自此海不揚波邊烽無警誠我

皇上一統無疆之福萬年有道之長也緣係再報投誠事理
爲此具本專差齋捧謹題

豊川県志

卷之六

資
子
附
學

PDG

題請別調疏

題爲海疆奏平饒鎮應裁披陳愚悃仰乞

睿鑒事竊臣粵之潮人也爲因海寇披猖屢犯潮疆
先帝鑒臣微勞愚忠

賜臣勅印

特命鎮守潮之饒平地方以備勦禦臣受事至今拾有壹載
鞠躬盡瘁罔敢有遺餘力茲海上逆寇如廈門銅山浯嶼
等處皆一切犁掃而南澳全島業已來歸卽碣石蘇利昔
恩抗

命自干

天討亦以伏誅瀕海之地靡不蕩平內安外攘永紆

朝廷南顧則饒平加設之鎮應可議裁者况臣乃潮人不可
久守潮土向因邊疆未靖所欲言而不敢言者今幸地方
無事可以披陳愚悃以仰

天眷臣之任內叨蒙

皇恩加臣三次官銜兩次賞賚策授招撫又蒙記功紀錄受
恩最深圖報宜切以臣有餘之力當報罔極之

恩伏乞

皇上將臣調任別省饒平地方併歸潮鎮使人地得當經制
有定

朝廷官人之典歸於畫一可爲天下後世鑒法成憲臣復得
竭犬馬之力馳驅於外以盡捐糜報

國之忱也爲此具本專差守備蔡鳳親齎謹題

皇
川
舟
云

云
云
云
云

招周黃洪三鎮書

闔海諸公雄居島上以懷舊主之恩而守不臣之節其矢志孤忠不佞仰之久矣矧以麾下之英風高誼而不厘一方彼美之思者每悵邊疆遙隔聲氣未通且以向者同舟將士尚爾一心志在擊楫言不投機故未敢致尺一於麾下也茲者麾下共事之人內而家庭骨肉外稱干城腹心者皆已次第來歸身膺

清朝爵祿之榮將棄帥主如孤注矣况廈門金門旣已失守南澳鎮將復統衆歸潮此亦苦海無邊回頭是岸之一日

也乃麾下之意尚猶遲疑未能自決者或以舟師不忍遽
離閩土非所樂居則東粵十州善地惟在所擇若惠然肯
來山河帶礪固無疆惟休也粵之藩督將軍靡不引領以
待麾下豈特我二三同事之翹企已哉去就之機惟麾下
早自裁決焉

招杜吳二鎮書

今日四海一家向背之勢不待明者而後決乃二三豪傑尚猶依戀島上徘徊觀望者不過因前諸重鎮未忍舍舟登陸遲疑未決耳茲者鷺門鄭黃周陳諸親翁已決計來歸鄭親翁此月初八躬率舟師進入泉港約 藩督諸上臺十五抵泉十八薙髮不佞探報已確此正豪傑乘時各就功名之會也况鷺門諸親翁投誠於閩爵土固自有限恐未得人人而尊顯之若我粵當事日虛祿位以待且不靳以五鼎請之於

朝如忠勇侯陳親翁已膺

寵命繼此非兩台臺其誰也况日者將軍提督正爲南澳之役而來旦暮可抵界上兩台臺若幡然改圖惠然至止則將軍提督之欣然起敬尤爲百倍安有不極力汲引與藩督會題以遂台臺之大願者此中終始之事皆不佞一力擔承決無誤萬勿復再徘徊坐失事機以負不佞披瀝相告之誠是所望也倘荷慨諾卽惠好音併遣的人過我定議臨楮翹企不盡

招周提督書

初六日敝標回來述親翁之意初七日接貴員及台函知親翁心無不誠慮無不周矣及讀至昂藏自許天下事不做則已做則必以誠心許人纖毫無僞云云是以弟更爲親翁進焉兩國相爭求其必得而後甘心兩人相好必得其合而後遂意此一時之人情亦千古之確理也親翁今日許人者功名事業不在胸中惟許人以相見未免憂慮不前在親翁旗鼓相當之後不得不慮然弟居間知

朝廷德意當事真心決無失信之理又爲親翁不必慮者在

此一見已見之後地方由我功名由我有不由我者有弟居閒之人在焉但相見之難難在於疑今弟願以二子爲質又願標員護子爲質親翁慷慨親身登岸盛甲官兵或千或百旗鼓執事擁道前列漢官威儀直走府城見當事者先明忠義而後改頭換面則昂藏丈夫之所爲豈不異乎人之所爲乎貴標統鎮將俱在船惟親翁一人偕弟同往而弟二子在焉又有爲質釋疑之心此行光明正大理直氣壯在乎受降如受敵者亦見親翁經權常變威武不能屈也已見之後然後論地方功名之事豈出前人之右

三
前差恐未盡悉今再加差敝員謝輝亮齊來共達我意
稍有背心大神共譴倘允弟言仰祈賜覆

上藩督將軍揭

爲乞採末議題留道官以固海邦鎖鑰事切照潮州巡道
一官爲邊海封疆所繫最重凡地方之吏治民風寇賊奸
宄以及衙蠹豪橫悉賴振綱肅紀執法彈壓以內鞏金湯
而外靖山海蓋緣督撫憲臺越在廣肇去潮不啻千里卽
惠州守道亦千里而遙雖節制之權無遠弗屆而封疆緩
急請命維艱非得風憲衙門駐茲海國上以奉宣憲令下
以懾服人心則封疆不無叵測之虞此自古以來因地設
官至意也茲職閱邸報見嶺東巡道一員及南韶羅定嶺

西海北共五道概在議裁奉有

勅下督撫確議歸併之

旨竊謂他道皆在內地潮道獨在邊陲似應分別議留者職
身在地方爲地方起見不能默默故敢僭陳末議仰祈憲
臺俯察蒞蕘倘屬可採伏乞 題留俾海邦重地得固鎖
鑰 社稷生靈益永賴無疆矣

祭羅吏部夫人文

維坤儀之嶽降兮粹質娟娟珠潤榕水兮玉種藍田挺金
枝于名苑兮輝寶婺千星躔美媿河洲之淑兮蘭儀肅穆
芳傳閨閣之秀兮蕙問昭宣嬪姻翁而作配兮相夫子以
惟虔方髫年而桂折兮甫弱冠而臚傳名高斗北兮身近
日邊文貴京洛之紙兮政握天官之銓賴幽贊于閭內兮
斯升華于帝前乃滄桑之忽變兮棄軒冕以逃禪翁旣蘿
衣而薜帶兮漱流枕石靈亦耽蔬而絕綺兮燕處翛然看
佳兌之六翮兮將高翔于九天喜蘭玉之濟濟兮復瓜瓞

之綿綿邈家慶之駢集兮由母德之獨賢既歌蘋藻鷄鳴
之什兮載誦麟趾樛木之篇徽音足嗣乎千古兮眉壽當
齊乎百年何瑤池之促駕兮遂鸞馭以蹕蹕嗟茵臭之云
香兮望琰光而弗輝忽聞訃而心惻兮摛蕪誅而涕漣誼
關婚媾之戚兮忱托楮帛之幾佇

綸褒之寵錫兮慰慈懷于九泉靈有知而不寐兮共來格乎
几筵

饒鎮順恪吳公墓誌銘

楊句瑛

余蚤歲當明季之末則已聞粵之潮郡有葛翁吳少師公其人者慷慨有大節惟誠下士能以除暴救時爲地方所倚重者若而年余心甚儀之迨辛卯冬奉

璽按粵則復聞公以前排印宮銜挈一方土宇以上我朝而且効力征勦屢建異績

天子加悅公之忠誠勞勩

恩典滉優易曰在師三錫何以加焉今日者臺灣餘孽尚煩掃淨勢必以三省會勦公方將豎偉烈於海表建鴻名於

麟圖以仰答我

皇上寵異勳勞之至意乃積瘁臥疴大星告殞

天子動容嗟嗟優卹備至凡我東南人士無不推爲鞠躬盡
瘁死而後已者其吳公之謂矣日公之子總戎君千里馳
函謂余實按粵目擊公之忠悃與馳驅建功之狀甚悉今
秋將奉魄以藏焉其能無一言以永貞珉余不敏誼無所
辭三按狀公諱六奇字鑑伯葛如其別號也先代以延陵
派分閩汀復創居於潮之湯田鄉高曾以來隱德具盛至
公之尊人贈公尤能承詩書之傳而燕翼之公生而負異

讀書穎敏胸有襟畧不屑爲割旦落落者等蓋當少年
而人咸知其有匡世之器矣迨及壯歲丁明末紛擾之際
潮郡大盜迭起滋蔓難圖公發憤爲鄉閭計偕其弟叅戎
君廣集精銳厲師以向殲逆討叛遂爲一時長城當事者
因昇公以豐順之任前後討平亂首如鍾林秀葉濶婆張
文斌林參寰彭士炳劉良機等皆其所計擒而誅鋤之者
也滄桑告變澄寇黃海如九軍劉公顯及江龍等譁張於
潮郡而陷揭陽陷大埔破程鄉以及三河者在在見告公
糾合熊羆提義勇之衆以搗之立解郡城之圍復三河大

史記卷一百一十五
卷之八
捕盡殲程平九軍之賊於焉舉錦江上游數百里地寓兵於農設團練以訓習鄉衆地方晏然以其時

本朝大兵未至人情思亂設非公綏靖而豫防之幾何不桑麻而陸沉家室而塗炭也哉戊子歲

大兵既至

兩藩宣布

德威公遂領人衆傾心歸附而爲

王前驅進征削平之舉遠年竭蹶靡懈矣潮將郝尚久據潮以叛

靖藩統師致討公爲潮疆協總督精兵數萬前行人人
効死用命無不一當百諸凡糗糧芻茭之運火藥炮器之
需罔不備周用佐一鼓恢克之力城下之日渠魁旣殲其
脅從者力爲請命所存活士民不可計數繼而湯坑藍霖
九軍餘黨復嘯聚負固大爲潮郡貽患公則自統師直搗
其穴破馬頭山寨而盡掃之潮疆旣平余時負斧于粵會
撫軍以密疏上其事蓋時亦有投誠在粵者握兵自恣密
疏之發一以彰公之勞復將以懲諸弁之縱也

世祖章皇帝嘉公忠勤懋著屢建大勳

特賜饒平之履畀以

專勅方印俾嚴鎮守而援剿之權則無分疆界公受事未幾
逆艘大舉入寇連陷揭陽澄普三邑公疾提官鄉兵會

兩藩諸鎮之師戮力恢剿枕戈疆場者八閱月乃克奏膚
三城既復卽逋寇之橫據黃岡者亦已誘而就執爰遣碑
將汎守俾片帆不敢窺犯焉惟是海島餘魂憑海爲患公
奉

旨造船會勦廈門之役立治數十巨艦又募習水師將士以
行年來所捐累數萬金不計也鷺島旣克復奉

詒往諭南澳公宣揚

天子威命於是識時者幡然輸誠恐後舉全澳之將士黎庶
及銅陵諸嶼聞風向化梯帆而踵至者其麗不億公悉給
瞻糈以寧幹止厥費亦復不貲繼而又有木窖之賊處大
埔平和之間公往勦擒渠底定更無有跳梁草澤間者而
山海胥告救寧矣至公之自固厥圉也築饒平城垣建饒
平大埔學宮及郡學之明倫堂士類嘖嘖又修建黃岡城
築西林營寨頻年經營拮据次第告成所捐各數千金古
稱公爾忘私國爾忘家者公何歎焉公蒙

眷命之隆三晉官銜兩膺

欽賚一品

榮封上及四代

恩蔭隆典下逮後人

朝廷之所以待勳勞者焜燿一時公素以忠孝自勉又歷荷
寵錫隕越是懼緣奉

旨會議封疆之事益夙夜綢繆罔懈雖至勞瘁之積繁劇必
親及沉疴日甚度不能起乃自草遺疏暨具啟事誠可謂
克盡疆場大臣之誼者矣若夫公生平至性莫大于孝以

友于兄弟其祇事二人也夔夔養志備極承歡歿而廬墳
思慕無日不嗟咏呶蛄之篇者殆終身焉其於弟也怡怡
之愛日取策功揚名致身竭力之事以相勵勉推而至睦
族施予必隆又復誘勸子弟朝夕考課以期振家聲而至
待友下賢則爲篤管鮑之交厚金石之信其於文士尤深
愛慕適館授餐如曾君日省陳君本一游君定海饒君寵
偉皆拔黌序以次掇科名者其他所品藻造就尤未易更
僕數故景慕風聲過都越邑而至者無不謂吳公實肝鬲
我且能生我也又推而鄉黨之排難卹貧日有厚誼遐邇

爲傾心焉公賦性溫恭臨事敬慎待物以誠遇下以恩綜
理之勤自朝至日中晷不遑暇食者數十年迨公餘則好
與紳儒及諸門人稽古論文諮諏時務至疾革而調將領
誠子弟惟諄諄然以忠孝爲囑嗚呼若公者真天地之完
人又不徒以智勇大將爲名者耳公旣以遺疏上

聞

天子重加憫念贈少師特進榮祿大夫

賜謚順恪遣官祭葬欽奉

御製碑文又破例

待與以饒疆重地兵馬夙練

勅總戎君統轄嗣守先職仲子啟爵承

恩禁掖卹忠之典未有盛於斯時者也公尊人贈公諱廷符
以公貴

誥贈光祿大夫左都督如子官太母胡氏

誥封一品太夫人公兄弟二人公居長弟標分守鎮江叅將
公生于明萬歷丁未年七月十二日寅時卒於

大清康熙乙巳年五月初三日辰時享年五十有九舉丈夫
子十有一後蓋未有艾云今奉

勅造瑩擇大埔縣清遠都之湖寮鄉龍爲帽山之秀穴負壬
揖丙欽依

御賜一品典式營造以六年七月十四日安厝焉爰爲之銘
銘曰

勃萃者山鬱蒼蒼者林忠孝大德山高水深幼負才畧匡濟
宅心梓里干城式靖蝸蟻傾心歸命

寵錫榮昌

天子曰都匪予特揚矢志報

國護我粵東粵東悉寧累積戰功枕戈夙夜盡瘁厥躬聿

殲巨寇復搗鯨居鱣艤備飭鷺島坵墟肅將

威德遐暢無餘彤弓斯貺

錫命慇懃焜燿寰宇竭蹙彌殷致身後已

卹典軼羣嗟公之德如圭如璧嗟公之功銅柱竹帛潮疆永
賴燕貽流澤煌煌

御製華袞萬年鬼神呵護馬鬣雲天爰卜熾昌衍慶其延

資
子
附
學

PDG

忠孝堂集序

洪圖光

今海內以文人自負者大約芳洲杜若沅沚澧蘭或泠然可誦不過騷人逸士之章卽蜃海鯨波倏忽傾瀉作者氣吞雲夢讀者亦驚若漢河而性情不可問文章亦未可傳耳蓋古今大文人卽古今大英雄未有不具忠孝之性者也昔李青蓮供奉翰林題詩鳳凰臺上杜錦里袞職軍儲堯封禹貢固感時憂事者之作而忠孝之氣自負者若何至歐文忠力砥狂瀾韓侍御克乎鱷浪使非以大文人大英雄氣概其能驚風雨泣鬼神震盪古今天地間耶順

格公吳老先生少慷慨負氣好擊劍善射博通孫吳兵法
兼事舉子業適天下喪亂赤眉銅馬相繼騷先生謂文
夫當立功疆場封侯食邑豈能作咕嗶語倅厠一官迎人
色笑爲耶爰投筆去遂叅戎伍歷軍功以上將軍節制潮
郡是時金甌未固盧循仙芝之輩出沒無常先生力捍禦
之其功已繪麟臺不容更贅乃其性好詩書卽百萬蝥弧
中未嘗釋卷蓋潮郡濱大海之南風土鬱雜且烽煙初熄
鱸堂講帳旣馬鳴嘶泮水芹宮刺荆蕪塞先生以潮風被
昌黎遺化方將建學明倫申安國之教規講伊川之性命

迺令鬻序坵墟文風於何振耶爰出俸錢下郡邑大修孔子廟一時堂皇魏煥車服禮器粵人士以時習禮於其中先生又或登坐堂上進諸生與語道學辨古今事宜惟以忠君孝親爲重潮之士氣丕振咸先生爲倡導焉先生又素慕平原爲人朱履紛踏四方從遊者倒時仲宣之屣時罄疏廣之金或迎秋月而坐共元規或佩春風而樽開文舉應酬之暇又乘藍輿小憇山寺對黃面瞿曇談釋迦佛法先生以大英雄具大文人丰骨宜其倜儻自如爲當世人傑也哉予時奉

命出宰程邑每道過其處左右紅帔握刀佩弓立迎道左窈
行細柳營中赫赫軍威不寒而慄及入帳圖書滿座翰墨
風清直似偕青黎老人登天祿閣偶語酒酣耳熱時先生
間出所爲文命予披閱夫以先生勛高宇宙卽在儒將風
流亦第飲酒娛賓投壺歌雅博一樂事耳而二十年來興
資建學重道崇儒悉以濂溪晦菴諸先生爲法有時耑征
奉

命必詣廟告期而奏凱旋師又入泮獻馘昔王文成講學龍
溪立決不庭爲弁髦倫紀者戒先生之功首重庠序非卽

以忠孝訓世歟至若

奏疏條議關切

國家利病其愷切不讓陸賈益足以光史冊垂奕世者哉
今先生往矣度其精誠固宜環護宮墻與諸先儒共襄文
治而遺編具在令子文源昆仲雄才博學竊善讀書知先
公之文有關君父大義爰命梓人亟登梨棗是先生之文
章傳而性情與共傳殆又以大英雄見聖賢身爲世說法
者矣

豊川郡三六

名ノスヲ

忠孝堂文集乞言引

吳敬豐

嘗聞爲人子者父沒而不忍讀父之書爲其手澤存也若夫志事所寓見諸手作則必取先人之遺篇而卒讀之且輯爲一書以貽來世此又人子事也豐不孝追惟先君順恪公少治經生業才識天授迥出文人當芸經董帷時每一操觚卽超然自異不屑爲腐儒文字及慷慨投筆所期遠大則不復以鉛槧爲事矣然身在封疆二十餘年讀書擗管未曾一日或輟是以著作之積至盈篋笥大都以立德立功之志而爲立言凡所爲文皆獨抒靈心發乎至性

而一本乎生平之所學非忠蓋之下悃不敢以封事上

君王非安攘之碩畫不敢以條議獻當事非建樹之成功不敢以夸言勒碑碣故一切敷奏紀事以及祝頌祭告之章莫不歷其誠而既其實去其諛而芟其華至於裁緘披悻拈韻寫懷亦復真誠樸雅而不以彙繪爲工總期力追古人足訓後嗣固將與竹帛瓊珉同垂有永也不孝向以功齡奉先君命肄業家山不能盡得賸記茲既嗣守先服視事師中始從曩牘悉搜遺稿而誦法焉先君之志事固概見於此矣雖繼述未能而表章難已爰錄其謀篇之大者

得捌拾叁首敬集成卷帙鐫之梨棗將畀諸孫子且與海
內共見之尚冀縉紳先生丹黃訂正加以弁言賜之華衮
斯先君手澤得與燕許大筆並傳於不朽而不孝之子職
亦庶乎藉以少盡皆仁人錫類之教也不匱之恩敢不永
言百世哉

曹山寶林寺記

鄭耕

豐順西南三十里許有曹山山形低小而奇峰怪石古壑
幽泉靡不畢具其地靜以深廓乎有容元時建剎寶林歷
今年遠鞠爲茂草康熙癸巳上人守白見而挂瓢焉長源
吳君爲之充拓得山若干畝重建佛寺塑佛像而潛修其
中山上有潭旣潔且冽樹石陰翳如峨眉積雪經夏不消
守白名之曰初有下復有潭四相離而遞續其聲潺潺瀉
乎寺之左右冷人心意堂前水流屈曲圍繞引入茶灶之
旁清澈而甘名曰一線泉寺中有鐘僉云飛來居人誌之

大興峽山寺相類寺左遠望有峰尖聳雲霄嵐霧淨凝晨
青夕紫不減舒州景况擬曰擲錫峰右石或三或五羅列
門側如禮拜狀則曰聞經石小溪自山入村植桃其上落
葉抽枝天容水影禽鳥之嘯吟烟雲之淡蕩則惟諸佛受
之而守白有之至若日色在天風光在野塵想遙飛虛空
寂淨見與不見情與無情得入斯門類皆瞻仰守白優游
獨處耕石鋤雲開經示偈洵足樂也山中多藥不種而生
有病者服之即瘳人病有盡我藥無窮寺外田禾出無量
米作無遮會香遍十方及於法界聞之得飽蓋不待琉璃

波瓌碑磔碼礪之屬一寶林矣忘何地無山何山無寺何
寺無境何境無人成之者天得之者人境自境也人還自
人人境之中因有是記

皇清

名之ノ

四

募修鳳凰山太平寺引

吳啟鐘

地有名山必有勝刹以湖人談湖勝則鳳凰山其最著者
層巒疊翠靄烟棲雲景難筆罄昔年先君蒞饒巡行觀其
山川佳勝買山建寺名之曰太平蓋指我

朝定明季之亂除寇安民自此太平之義也召僧住守祝國庇
民二十餘年於斯矣歲月既深棟宇傾頽僧照吾者懼勝
蹟之下修有墜先人之盛意愾然謀於余而新之余不才
棄書學劍奉

天子命守濱海斯夕所孳孳者增雉堞嚴斤楬黽勉職司保守

疆圉未遑他務惟斯寺之建也戡禍亂興太平成久安長治之洪基特若斯名以昭示來茲倬後之人頌名思義知功德之隆感慕於無已則於

國家不無小補何敢聽其廢墜第力獨成難倘荷同心慨然樂助則名山重輝勝刹再煥咸拭目以觀太平矣

鎮璫姪永思圖小影贊

羅松標

彼何人斯鸞停鶴峙天官派孫封閭支裔生平襟期瀟灑
樂只今則冠帶加身肅容備禮捧盤獻盃鞠躬謹爾是胡
不爲解衣盤礴徜徉自喜乃莊爾容慎汝止其心蓋曰我
親如在優游杖履事生事存終身永矢我將以薦其時食
者貽後人作個樣子

聖朝果志

卷之ノ

三

遊豐溪記

葛亮祖

浙江人

環豐城皆溪也夾流於萬山之間爲一邑勝概共發源有二一自縣南豐田嶂蜿蜒而東復旋折而西北一自縣西南言嶺諸山盤曲而西亦會合於西北紆迴奔注過下湯出產溪入於陷隍之大河蓋幾二百里云溪多石骨峻岫布列舸艇難行豐民每以鮮舟楫而多負擔爲勞然灌溉者于斯綆汲者于斯有自然之美利世享而未之知也城西數十武溪有沙渚約六七畝上爲墟市以一四七爲期民間日用飲食於是乎在肩摩駢集四方群赴而貿易焉

墟下卽邑人所稱湯田也周廣畝許怪石星羅若蹲獅若
立鵠若游魚之聚泳臥虎之馴伏中有溫泉宛然列棗而
炊者一二十坎或同沸釜或如噴雪清和而薄霧氤氳微
風而輕烟繚繞霜晨雪夕莫之或異凡士民之朝而沐暮
而浴以澆以濯者咸就給焉且其泉能療諸疾有利無害
斯誠取之無盡藏用之無窮期山川之靈異造物之特奇
者也夫豐甯明季爲群盜淵藪士女不遑寧處遑問流泉
我

朝定鼎邑人吳少師起而廓清之

國家愷澤覃敷大化翔洽百年於茲猶虞海揭嘉大之偏隅
漸摩禾遍割爲新邑設官建治以永保斯民今者山高可
仰泉清可汲豐之人得於暇日遨遊於溪光雲影之間其
可不知所自哉余每因稽理工程之餘徘徊溪上萬山疊
翠掩映清流顧而樂之又嘗尋寶寺之桃玩龍山之月訪
太陽古榕而不能數數至也若夫韓策之雲銀瓶之雪淨
水之鐘揭嶺之泉存諸想像而未嘗一至其地然則二載
以來余所爲且暮優游而忘倦者非此清溪白石有以豁
旅情而助逸興也耶旣以自快而并爲豐之居逢名勝而

生際熙皞者慶也因記其大畧以志不忘若此

新建安敦書院記

葛曙

邑令

士習者民風之倡學校者教化所資是以

天子自首善而外凡郡邑莫不建學而大小吏推廣作人至意復增義學慎選師儒由來尚矣豐順潮之新造邑也潮自唐時韓昌黎爲刺史舉趙德爲師韓公以聖賢之道倡化趙子卽以公之教教其民而習俗翕然不變延及於今潮郡人文甲于東粵豐之民僻處山谷見聞稍陋不無樸僿之虞然向固嘗被化於昌黎者也且我

皇上德教覃敷無遠不屆特開新邑肇立學宮凡所以訓誨而

牖迪之者無一不備則澤以詩書文以禮樂非守土是責而誰責哉余不敏承乏茲邑竊見

大憲殷殷圖治首重教民粵秀端溪兩書院延四方碩學爲之掌教廣羅英秀肄業其中四時考課至詳且密潮之韓山書院亦體此意以樂育莫不爭自濯磨郁乎彬彬念我豐人離省郡遼遠可不近爲措置以承流宣化哉初抵任一切工程嚴迫未遑他及歲試見童子來赴者千六百有奇雖敏鈍異材咸欣欣有向風慕道志小子有造進而教之藉於師儒之砥礪亟矣爰與邑之紳士謀建書院而

難其地一日登安敦嶺縈青繚白陂陔平衍前俯豐溪溪
上古榕數樹圍抱殷茂不知何年代物游魚飛鳥熙熙然
遨遊於上下乃嘆風塵俗吏終日案牘向之艱於擇地者
今乃於斯乎得之也遂捐俸爲紳士倡構書院其上於乙
丑冬經始于丙寅春落成卽名曰安敦欲其顧名思義也
特事芳草創膏火尚虛後之君子以漸擴充諒有同心由
是選擇名儒勤加鼓勵庶向風慕道之徒盡去其樸僿上
接昌黎之傳以副

聖天子暨 各憲作人至意以爲邦家光豈非豐之幸而余之

大願也夫因爲之記

溫泉記

葛曙 邑令

湯田之名由溫泉得也出豐城西北數十武可望而卽其泉似有神炊終古長沸于于焉虛往實歸居民賴之稍遠爲墟場交易而退成就盥濯會莫之禁夫待舉火者因人而熱何如泉之自然而熱者不言所利其利溥哉向使離城遼遠汲取實勞安能僕僕道里爲澣濯漑瀉用卽以爲神等諸棄壤耳物以適用貴泉之近城其亦有幸乎間嘗徐步往觀蓬蓬勃勃如釜上氣不可嚮邇下數坎氣漸平和因思假我數椽做浴沂故事致足樂者獨怪無先得我

心既而知溪漲水高常遭漂沒又未嘗不嘆所處之卑而
爲是泉惜且不聞中於膳飲豈以近溪而溪流清且潔歟
或謂疑有藥物然吾於茲泉獨有所取蓋泉而冷常也易
曰井冽寒泉詩曰爰有寒泉若夫溫春氣也陽氣俱蒸土
膏其動萬物發生豐爲新造邑倘藉此一脉溫和民物繁
滋形家所謂旺氣未必不從茲泉乘之第曰能除瘡痍特
其小補吾之爲豐望者俾一邑之疾痛咸消始賀斯泉之
神休無旣已不可不爲之記

改建普濟橋啟

知縣事 許炳

蓋聞孟子論國僑之政制重徒杠魯公傳山谷之詩動高
斷石事係濟人大爲民便責關守土切在官常惟以小而
易大價豈能廉况舍舊而圖新談真不易是則成億萬人
來往之功盛德固邀神貺而欲聚數千金蠲輸之款六力
尤賴衆擎也縣治之北有普濟橋焉附九十餘年之郭行
三十八社之人千巖齊拱地值龍頭二水合流溪來燕尾
礎是層磚尚耐撞春於濤浪梁爲散木怎當剝蝕于雨風
杠則懸崖欲墜莫望久長圯則比戶重脩徒勞糜費以通

邑之要途爲累年之苦事舊費難仍我意亦欲其改作葺
賢有見衆謀畢協乎僉同歲乙未七月初三日有邑紳士
吳任齋等僉議改建石橋呈並請印簿序文爲闔邑勸本
屬予懷慮費繁而不敢輕發洵爲公事喜誼美而卽予准
行但恐巖深路遠購石則苦且移山更虞岸濶波寬架梁
則難以縮地亘類虹長工胡能省運經嶺險費且不貲欲
巍巍之有成必多多而益善捐廉以倡首敢云兩袖惟風
好善有同心定卜揮金如土惟願人皆踴躍戶盡捐題所
過者化募與僧同不約而來妙有神助富者陶朱資本豐

而不靳嘉惠才如李白力雖薄而各贊好言積少便可爲
多山由覆簣因此還能及彼腋竟成裘黃金在握何愁山
高水長白石能飛易如天造地設財果如雲之集功卽不
日而成海不難超人稱便山還益峙歲歲沾恩記多金
而題柱姓名先同日月之光併贈匾以旌門福祿更裕雲
初之發用修短引敢告同懷伏望樂輸克成美舉謹啟

皇川景三

卷之六

新刊
和學
附

PDG

詩

飛泉嶺

宋 熹

梯雲石磔羊腸遶轉壑飛泉碧玉斜一路風烟春淡薄數
聲鷄犬埜人家

題瘦牛嶺

黃公度

日嘆年來爲食謀扶攜百指過南州時平四野皆青草此
地何曾見瘦牛

前題

楊萬里

行遍天涯意未休循州過了又梅州平生不慣乘肥馬者

去須教遇瘦牛

遊溫泉

明張翹

十里青郊路看山興未窮
乳泉溫石火茆屋貯春風
野老追隨久康衢笑語同
武陵幽絕處只在小溪中

溜隍夜宿

郭子章

產水驛前洄溜隍路已開
海雲隨浪捲竹月破窓來
猿鶴時相狎鱷鯨不用猜
秋聲飄嶺樹歸夢遶鄉臺

漫題

吳殿邦

家在飛泉玉簡峯
草亭經日對杉松
晴嵐秋壑無人到
惟

有風篁亂石淙

葛布舟中風雨

何仕冢

世路多艱涉孤帆黑夜開濛濛蘆荻岸漂泊水天涯苦海
從心渡驚波拂面來自憐形影弔誰識濟川才

迫山寇宿上陽同馮明府聯句

郭之奇

試劍雲初集

郭之奇

投戈日未傾食漿明俗厚

馮元鷹
袞

帶引風清塢遂回春氣郭村鷄促夜聲愁聞五更角馮不

盡壯悲情

郭

人日遊七娘灘值雨

羅萬傑

去歲山中逢人日今年人日仍登山經邱自足情兼具尋
壑偏宜靜與閒雨映疎籬花的皪煙生野徑石爛斑坐聽
僧梵歸來晚屐齒衝泥越濕還

元日值雨同雪樵上人作

愁值上元雨空山靜掩扉茗烟輕冉冉香縷細霏霏窺牖
月光薄照龕燈影微祇應禪榻上夢與白雲歸

山居禱詩

萬山深處一閒人手葺蓬茅老此身淡粥盈壺壘滿鉢家
風不改舊清貧

其二

嵯峨石筍連雲栽，
樵徑無人任野苔。
最愛東風明月夜，
深斜入雙扉來。

其三

灌畦日暮荷鋤歸，
滿目蓬蒿夕照微。
黃葉乍衝鳥語落，
白雲時繞磬聲飛。

其四

冷落柴扉晚不扃，
爨烟遙映夕嵐青。
芒鞋轉入茅岡去，
折得梅花插膽瓶。

其五

半鈎斜月掛巖屏香篆初殘睡正醒橫按一枝無孔笛峯

頭吹與石人聽

其六

吟成半偈剔殘缸突兀睡魔未肯降楸一爐香一炷卧
聽微雨打寒窓

偶題

生計巖前樹素交雲外山愁來天地老醉去古今閒

其二

樹老幽人屋雲深野衲家門垂彭澤柳圃接邵陵瓜

感遇

青青礪底松倒懸蒼崖壁歲蕤含宿露獨立無人側上有
烏鵲棲下有驚湍激念茲霜雪深况復暑寒積勁質久難
靡孤根諒不易所嗟匠石稀一顧三歎息

齋中卽事

披書當對客庶以懲我短焚香當灌菜庶以止我嬾溪光
發幽獨柴扉涼氣滿微雨過竹色筍籜於茲澣亭陰樹影
攢塔暝鳥聲緩心靜有餘閒起候茶煙煖

除夕同明度上人逸老庵守歲

殘年抱病隱園中，潦倒幾忘歲月窮。
窻對木蘭花正白，爐添榾柮火初紅。
天寒乍覺香消霧，夜靜頻驚磬逐風。
閉戶跏趺少俗語，辛盤聊與山僧同。

賦湯泉一十六韻

國朝 鄭 濂

久厭塵市喧，山行愜心目。
蒼崖透孤嶠，長林翳深綠。
溪迴徑自轉，徐人小橋曲。
何處白雲起，離離佈前麓。
父老向我言，有泉在茲谷。
鬱若霞霧蒸，非炊煙自蠹。
其下若濺珠，其外堪盥浴。
其中若沸湯，大寒莫敢觸。
子聞爲驚疑，疾趨戒

僕憇思此泉下徘徊數往復天下多名泉無如此利俗
固有甘若醴冬月不堪掬亦有香若麝貧者非所欲溫泉
是處稱火候未俱足弗若此泉佳于焉似杼軸我甚欣此
泉酌之將滿腹

龍祖寺

麥天縱

不遊龍祖寺安識洞中奇伏石多驚虎逢僧忽訝師入雲
依五色掬水味三危支遁愛山切應留借一枝

小隴墀

黃華

連山不可極斷處見人家野廟依喬木瓜屨帶遠沙竹圍

千畝綠鴛破一溪霞何必秦人谷偏誇兩岸花

秋日遊藍定庵

羅國珍

逐鳥尋僧去寒隨客路深香依嵐裏磬徹水中音疎圃
半生意平蕪一片心閒來秋日話霽色滿江陰

落漢鳴泉

藍田削壁見飛泉隱隱晴虹百丈懸朱子石函留洞宇秦
皇古戍靜烽煙無邊珠玉因風洒不盡琴箏鎮日傳最喜
源頭多勝槩於今流水滯前川

灑泉

七娘灑山下

羅萬善

一灣徹底清萬點如煎沸不火自然溫春冬騰煖氣我聞
燒地古神湯世傳伏石有硫磺沂流曾經狂士浴驪山舉
石幸君王茲泉產向窮山裏牧豎樵夫日至止濯足潑水
戲歸時猿猱來飲樽水涯古泉今泉溫無二此泉彼泉用
之異白礬空作雲霧蒸起源得地方爲貴

登飛泉嶺訪朱夫子遺蹟

黎偉光

五嶺東南障飛泉號揭陽輿形通粵險戍壘入秦荒路恍
天台似僊疑鶴嶠藏捫蘿綠鳥道理策遶羊腸古木盤千
曲幽巖漱百芳我來尋篆跡磨石認靈光

題揭陽嶺

方國才

五嶺南州舊有名飛泉一臂更峻嶒天懸翠壁連雲起路
近青霄傍日行故壘已荒征戍地殘碑常載紀遊情我來
躡屐高峰上懷古歌餘感慨生

藍田山居寄友

陳海春

藍田山南南山麓茅葦數家連烟竹白雲秋曉不歸山清
泉盤磴出谿谷自苦山深住無鄰山堂午夢驚猿鹿平生
喜爲詩酒歡今我何以慰幽獨雲水感君心迹素寒霜念
我鬢鬢秃青燈相對聽槭槭明月何時談昔夙一枕桐聲

令到帷半夜心逐南飛鵠

望牛山釣臺

羅基恒

石畔望牛處士家釣竿曾掛夕陽斜
不將邱壑易軒冕留取高風伴落霞

上巳後一日重遊七娘灘

羅紹哲

重到灘邊去良遊豈易常風前人跡
靜雨後泉聲涼山竹添朝綠野花
隔宿香石頭記坐處昨日嘗飛觴

曹山寶林寺

吳啟晉

野客漫行肅寄前老僧隨喜覺殷然
臨淵潛出聽經鯉履

逕遙聞說法仙月央禪林山水秀雲橫梵宇地天連重遊
此景知何日淡看黃花度小年

前題

林作棟

曲水回流靜室前潺湲入耳轉蕭然晨鐘罷後聞啼鳥暮
鼓殘時有嘯仙石勢低昂同起伏峯巒續斷總相連上方
自是無塵近面壁何須待九年

遊初有澗

釋真樸

清景闕幽崖寞寞不可扣羃羃蒼松雲千古迷昏晝烟局
朝已啟竹石生左右一徑入蒙龍幽泉道寒澗迺窮空潭

陰林蔦席莓繡濛濛疊崩濤蕭蕭風雨闌下矚旣澄空日
光射潛竇清見歸柯鳥靜落板藤狄回環遠峰攢百靈何
時守則是混沌天開闢有先後三秋瘴癘鄉茲遊迺奇造
不知炎伏間誰能私枕漱

寶林寺六景 飛來鐘

釋性曉

曾聞大治出胞胎驀地洪音震雷喚醒定巾霜夜夢却
疑獅子復飛來

初有潭

何年潭水翳林間今有清光見此山一任風來波不起潭

其川身三
心可似老僧閒

一線泉

泉與曹溪一樣深
紆迴一線出幽林
世人不解清清意
拋却源頭向外尋

桃花溪

清閒未許住深山
手種桃花溪幾灣
回顧落花紅片片
不隨流水到人間

聞經石

無論晨鐘午磬時
堂前惟恐聽經遲
世間那有痴如石
佳

在深山已不痴

擲錫峯

曹山萬仞翠巖從再進竿頭路可通
昔日隱峯何處去空留一錫白雲中

東門城樓玩月

吳之駿

水輪初上最宜人影徹東樓分外新
葦屋冷涵如在水碧欄高立若無鄰
風過翠竹偏生韻烟散蒼松別有神
最愛山城清夜裏玉壺誰與倚秋旻

太陽宮古榕

大樹當時不次功，偏留此地聳青葱。
重枝疊幹天然景，錯節盤根造化工。
入夏陰翳能蔽日，凌晨蒼翠欲乘風。
鄉人處處陳牲醴，土鼓頻敲祝歲豐。

龍山遠眺

曲折層巒古路幽，扶筇直上豁雙眸。
蒼茫遠樹平如障，寥落孤村小若舟。
四面松風聲淅淅，一灣潭水影悠悠。
地靈莫謂無人物，寧戚當年困飯牛。

銀瓶霽雪

張大光

雪霽銀瓶淨，清光播遠天。
瓊花凝素皓，白晝籠輕烟。
萬里

星河淡千山皓月圓一峯登眺處不讓玉堂仙

五羅策禱雨

峩峩顯策自天開嶽立層霄靜不回老幹數支雄海嶠團
雲幾處護崇臺神威不許商羊舞大力能教旱魃摧應是
天心憐瘠土故令斥鹵盡滋培

南山寺聞鐘聲

竹搖清影瘦孤岑古寺蒼涼一望深滿座曇花空俗諦半
簾明月印禪心浮生癡夢憑誰喚幾點疎鐘出遠林何事
景陽樓下立始稱人世有知音

世世集 卷之八
三十一
佛身悉觀矣

吳凱先

誰云鷗鳥始忘機
水底潛鱗詎不如
赤子固應皆佛子
木魚何弗感潭魚
聞經自赴龍華約
聽講還分貝葉餘
最愛懸崖高處立
會心多處一躊躇

上陽爲藍田勝地
其俗渾穆近古
將修舊廬
若焉作愛上陽二首

羅松樵

我愛上陽好人烟
簇舊墟蒼山圍井甸
碧水抱田廬
春暖樹盈岫
秋陰雲拂畝
古菴餘老木
釣石傍清渠
閒靜從茲始
鷺摩日以除
假錢來卜宅
結伴樂樵漁

我愛上陽好醇風近古初比隣無異姓歷世有同居
麻桑
授春服稻梁供歲儲饌因老者設酒待客來潛少女能勤
紡丁男解讀書美哉唐魏俗可以化龕疎

過逸老菴

明銓部庸菴
伯歸隱處

夕陽停過棹覓徑到僧家蛙噪一池水風搖幾樹鴉晴嵐
當座翠野竹拂堦斜見說晚香好重來就桂花

宿店前

土墻隣獨樹結宇倚南坡山向門前起泉流厨下過村童
知識少行客旅情多人夜峯頭月清光滿澗阿

秋日過猴子窠

乾隆丙辰鄉科
子不赴秋闈

嵐深峻嶺鎖重阿，秋日閒過逸思多。
野店倚崖明夕照，晨裝歷磴拂烟蘿。
數年逐隊徒勞耳，此際匡居奈嬾何。
自古力田勝射策，山靈招我樂婆娑。

八月十五日晡同諸君子登陂下巢和葛卧南先生

原韻

徐

塾

浙江人

何須九日始登高，爲愛青山不憚勞。
細草平陂臨絕壁，疎松夾澗響晴濤。
心儀謝傅風流劇，頭白吳儂逸興豪。
秋色平分當此夕，一輪早喜映綈袍。

豐溪春漲

柴致和

浙江入

春郊雨足水溶溶
碧漲前溪澗幾重
人在抱山堂上立
黍苗到處有膏濃

龍山秋月

碧天無際月輪高
獨上龍山逸興豪
咫尺廣寒宮可接
五雲開處響仙璈

揭嶺飛泉

何處源頭活水來
珠噴蛟舞到山隈
吳綾百丈懸危壁
不許并州快剪裁

銀瓶霽雪

誰把銀瓶換玉龍
瑩然冰雪靜雲封
凌空獨插層巒裏
知是瑤臺第幾重

淨水遠鐘

數椽高踞萬峯巔
寂寂空山不計年
一自鐘飛來絕頂
祇今人說口頭禪

古榕夕照

離奇天矯欲摩空
疑探扶桑到海東
山色漸暝村社靜
一

微斜掛夕陽紅

古寺桃溪

沿溪何必定桃源灼灼飛英靜不喧
老衲坐枯林畔石相看一笑已忘言

韓叡雲封

一峯高聳巖層霄不盡烟雲護半腰
似爲名賢留勝蹟空山千古識高標

古榕夕照

陳

浩

浙江人

近城喜得古榕坪天遣雷分棟宇成

舊傳榕爲雷分

山色遠凝千

嶂紫溪光斜映一灣清鳴和谷應
枝間鳥暑却涼生葉底

研對景長吟歸向晚披衣不覺夕陽迎

淨水遠鐘

山嶽靈時鐘亦靈我聞在昔有奇因一灣如鑒塵何染無

翼能飛運若神

舊傳寺鐘
白遠飛來

響徹中宵清俗慮音傳空谷達

高旻年來客路多塵夢欲向禪關拂拭新

豐溪春漲

一溪春水遶城流四野奔趨潤綠疇雨洗飛花紅躍浪風
飄舞絮白翻洲層層峭壁波中見渺渺間鷗物外遊堪作
當年濠濮想心胸盪却幾多愁

龍山秋月

徑入龍山象外幽，遙瞻古寺白雲秋。
燈寒丈室僧初定，鳥亂棲林客晚留。
露重枝頭千葉落，光涵嶺上一輪浮。
莫言於此興猶淺，試作東山着屐遊。

古寺桃溪

若爲祇林集異珍，溪桃爛熳倍生春。
水流花放增天趣，梵唄鐘聲遠俗囂。
擲錫峯頭清欲絕，聞經石上淨無塵。
飛英莫向人間去，怕惹漁郎又問津。

峯石寺中

韓策雲封

韓公去後策稱韓高進諸峯百尺竿嶺徑崎嶇行不斷烟
雲變化幻無端縹緲成錦繡天孫舞裁作文章山斗觀豈是
無心閒出岫乘時爲雨盡龍蟠

銀瓶霽雪

峻嶺無勞斲削成望中寒雪倍分明凌空高插琅玕樹蔭
地周遭雲母屏天爲巖壘增玉壘人從海嶠拾瓊英陰霾
散盡光彌潔照徹瑤峰萬丈清

揭嶺飛泉

昔賢會此駐征鑣爲嘆羊腸曲遶勞

朱子有飛泉嶺詩

峭壁春迴

巫峽浪晴溪秋散
廣陵濤渠成不俟
西郊雨派遠分流
南
畝膏邑自更新
山自古幾回極目興猶豪

古榕夕照

朱嘉禾

浙江人

秋郊何處覓芳菲
老幹千年性不違
遊客興幽閒徙倚暮
鴉知倦半歸飛
小橋流水環行陌
遠岫晴嵐帶夕暉
莫惜歸遲重展眺
牛羊來下掩柴扉

豐溪春漲

草長平沙水漲溪
風翻碧浪遠山齊
沿崖汗漫幾吞浦
觸石迴流欲撼堤
滿郭烟光迷鷺影
一川湍響亂鶯啼
春郊

五言集卷之八
名之八
之八
PDG

正值深耕候歸步平疇看犢犁

癸亥臘八豐順山行

葛亮祖

浙江人

鷄唱行人發風寒路絕踪溪雲籠曉日山黛鎖層松涉澗
流聲細登高嶺勢重斜陽開晚景蒼翠滿前峰

豐邑卽事

百里封疆建置新萬山深處關孤城心勞作堵經營久望
切移風案牘清鞭朴不煩官署冷倉箱有獲室家盈浴沂
舊事多真樂閒訪溫泉遣我情

八月十五日暮偕友登此山下嶼

秋光滿野勸登高興至攀援不憚勞歷歷煙林平若薺重
重雲岫湧如濤跋山筋力衰猶健對景情懷老益豪皓魄
欲升歸未得清風習習拂征袍

言嶺關落成

雄關當嶺勢從龍扼要東西設險同鳥道千盤穿絕頂螺
峰萬疊繞晴空工興農隙畊無害守固岩疆事有終半載
經營成可樂且凭禪榻聽松風

豐溪溫泉

溪曲繞城闌泉流淑氣呈炎蒸非在暑鼎沸不聞聲盪滌

塵容淨驅除病體輕群情安故習誰識化工宏

豐順山行

葛

輿

浙江人

行盡羊腸道崎嶇跬步逢兩山如踞虎一徑儼蟠龍澗水
飛危壁松濤起遠峯計程方百里層折幾千重

豐溪

雨足郊原潤溪流一派橫水高洲漸沒磯激浪難二芳草
相連碧浮鷗逐隊輕春來多逸興倚杖遠含情

揭嶺

五嶺皆天險竒觀揭最宜古傳秦卒戍人誦胸翁詞嵐氣

猶還爾泉珠舞且垂幽遐堪避世欲出意先迷

夜行山中

葛 暗 邑 令

傍崖茅屋雨三楹深入層山不見人犖确崎嶇行未盡一
鉤新月挂前津

巖迴樹影森排戟石激溪聲響股雷臥犬不驚行跡斷無
人知有長官來

漫山蟲語送秋聲嵐氣相兼夜氣清欲向此間稱吏隱自
懸五斗負躬耕

看山不費買山錢屈曲籃輿趣獨便敢羨取砂勾漏好千

嚴深處飽清泉

過言嶺關大雷雨

霹靂動空谷風號萬壑間
泉聲怒危石雨勢倒層山
避濕鷄棲木衝泥客度關
此中有清味與僕莫言艱

山村

荒村臨斷岬一徑入雲端
野犬迎人吠蠻童逐隊看
小溪隨嶺曲高樹挾風寒
可作居道想山深意象寬

山行見茶花

南落空山裏無言對朔風
清溪爲照影脉脉素心同

舟次烏石塘

殘霞川上動暝色滿前山何處清歌發漁舟唱晚還

產溪曉發

高峯初上日霜冷一溪烟密篠開幽徑層陂結小屋趁墟人起早爭渡語喧傳自得宦遊趣誰言此地偏

山中夜行口號

深巖月黑怪鳥啼風搜石穴聲長嘶倚岸老樹屹森立下臨百尺潺湲溪僕夫足繭不能進千山萬山方端倪我行顧此三嘆息惟土養物功莫齊磊磊頑石將焉用山如有

靈還自詆安得五丁擘巨掌削平峻嶺成町畦春和雨足
僅布穀草淺泥深牛健犁山靈顧我應大笑活此一方窮
蒸黎

十二月高山見雪桃花盛開詩以紀異

嶺外年光異物華寒威淑氣一時加高峰積雪初開霽夾
嶺天桃已放花玉女曉乘丹鳳翼瓊樓晴起赤城霞此中
消息憑誰證付與閑吟手八叉

和柴履安新庵觀插原韻

時余已解豐順任

湖遊訪梵宮春滿綠畦中野色遠山翠泉聲帶石淙深畊

良足舉勸相竟何功住久今成別還期話歲豐

自鄒返豐留謝唐元登兼別同事諸公卽用來韻

南風一夜達墮隍回首知交情自芳采及葑菲扶弱植相
期膠漆薄時粧淋漓別酒春生柳霖霖甘霖野秀棟撫字
有心思共濟片帆何事榜人忙

昌黎遺澤在江濱仰止依然萬仞青學製一方慚草創濫
竽兩載辱山靈群公高義勞相助半世虛名笑不經珍重
離亭頻握手醇醪飲我醉難醒

山斗重來鎮列城承流隨地布仁聲鱗波春靜朝曦麗鳳

嶺氛消暑靄橫九邑同風和自洽三年報最政皆成迂疎
念我毫無補不獨臨岐感別情

何處重尋勾漏砂偶來巖邑暫栖家辛勤作堵無虛日寂
寞空山未見花愧子歌詩棠蔽芾繫人懷思柳天斜分襟
料有冰心質爲耿清溪水一涯

落落高情海上霞期余後會未全賒重吟揭嶺千峯月共
撥山城萬樹花勝賞他年懷繾綣離心此日托幽遐一江
春水留人住漫汲深清獨煮茶

將去豐順留贈江子上明府

萬壑千巖裹窮簷藉雨膏三農仍罄室兩載愧操刀何幸
循良代群占撫字勞都人應寄語報我樂名郊

由粵至潮路經建橋寄興

惠潮嘉道
魯 超

林巒四面翠光融路入平原似掌中千頃繡分田上下雙
流鏡隔水西東樓臺深處堪留月烟火濃時不散風應是
坤靈饒結構至今佳氣鬱葱葱

豐溪春漲

豐順八景

欽賜舉人

彭景雲

環城豐水日悠悠三月桃花浪打頭芳草綠波相駘宕
掩映畫橋烟艇自夷猶怒濤偶觸驚鼇抃積雨初晴快鴨浮

一作

豐頁象

續

卷之二 詩

七言 七

空

一作

濶文瀾誰得似乘風安穩到瀛洲

龍山秋月

縣城龍祖山名

月到人間留不住龍山月到倍相親地緣得勝無遮碍節

爲經秋淨霧塵放大光明增慧業教通眼目悟前因

淨名經六

通 曰天眼通
二日天耳通

擡頭不俟當頭棒空地焉能着色身

古榕夕照

蔚然相望大江中夕照蒼茫萬古同水抱蘊風清影瘦鴉

翻落葉暮煙空

蘇詩鴉翻楓
葉夕陽動

四圍老幹週遮碧一抹殘霞

烟灼紅共仰五朝神物在行人解問大陽宮

淨水遠鐘

仲坑山淨水寺

初地飛來不等閑蒲牢八百越

一作動

溪山音沉三界廻旋

久響徹千峯隱約還洞口白雲相往復門前流水自潺潺
騷人乍聽知何處策杖尋幽灣又灣

韓巢籠雲

邑西山名

凌霄巒巒五雲盤霖雨蒼生共望韓

每天欲雨必雲籠此山鄉人嘗占驗甚應

衡嶽能開今復聚斗山長仰古來看織成錦繡憑天巧幻
出文章屬大觀萬變不須圖世態好扶初日上團圞

銀瓶霽雪

豐貞係七

續

卷之八

詩

三

天公玉戲忽回頭，遣却銀瓶夜不收。
誰把挈來盛白雪，世還轉欲悟黃流。
風搖素影山河冷，月動寒光天地秋。
擬上玉皇千萬壽，叮嚀富媪合藏修。

古寺溪桃

世間春老芳菲盡，古剎桃開春滿枝。
倒影近烘潭一作波鏡，暖落紅多傍石梁。
歌溪流屈曲無人覺，花信迴環有蝶知。
最喜得山兼得水，名藍棲儘相宜。

揭嶺飛泉

土名礫下泉飛如瀑布

揭嶺寒流百丈懸，飛珠濺玉下藍田。
探源翻訝虹蟠洞，一作

澗落漢真如練繫天暴雨雷霆驚地底人晴琴筑瀉山巔

我來未免頻回首秦世荒屯宋世賢

山爲秦守五嶺之一宋朱熹公題落漢鳴

泉四字今莫跡其所在

關上嶺懷古二首

彭景雲

半壁風煙菽葦秋出關每每重回頭三方狼虎萃淵藪

初

葉漢婆張文斌鄭心台等分據大田馬頭及蠟燭寨等處時出劫掠居民

百二殺函蹠上游自

作將軍開府地始消

天子庶民憂

自吳葛如將軍開府此地極力剪除諸賊

始盡長城萬里今安在豐水豐山是故邱

當年鐵礮壓城隈一卒當關萬卒回柝擊黃昏橫風雨鼓

鳴白晝走霆雷九軍跋扈紆籌策

順治初九軍賊劉公顯等屢欲叩關輒止五

姊梟雄枉費才

崇正十六年漳寇余五姊寇陷陸叅將裴兆綿爲其所敗以路險不能進遂遁何

事突教張殿虎竟如天上有飛來

康熙間潘賊張殿虎白晝突入劫掠無敢敵者

平髮逆搜逸宿紫荆洞留別

嶺南巡道吳贊誠累遷巡撫

亂山行盡見桃源斗室蕭然絕市喧嵐帶晴烟青入畫溪

環茂樹綠當門情怡圖史新知擴歲稔桑麻古處敦愧我

風塵倦戎馬雪鴻一夕爪留痕

豐溪春漲

豐順八景

邑令

王承鑿

湖北人

溪水抱城流山河幾萬秋雨添泉倒峽石沒漲平洲溢岸

連田澤照波盪市樓氣盈歸大海萬壑有源頭

龍山秋月

月出滿天霜龍山試一望舉頭低桂影洗眼淨雲光峭絕
瓊樓界空明梵宇堂廣寒咫尺近秋興與飛揚

揭嶺飛泉

揭嶺幾千重泉飛懸碧峯珠噴穿怪石玉碎打枯松天上
何從潑巖頭到底衝匣中仙掌擎放出白如龍

銀瓶霽雪

銀瓶近城山名

萬古矗銀瓶凌空雪蓋青晴巒失蒼翠薄霰望瓏玲天近

接瑤島門當樹玉屏梅花如可插對我喜杯停

淨水遠鐘

深山何處聲鐘在水中鳴波澈音傳谷風遙地隔城飛來
歷寺古響到落潭清靜聽溪邊立晚林烟度橫

古榕夕照

神物盤錯古還添夕照烘殘霞移影遠野火鍊形空葉密
團成蓋根蟠倒結叢蒼茫吞落日氣象想鴻濛

古寺桃溪

寺古不知年桃溪別有天無言契妙諦流水悟仙緣津問

源頭杏花開佛頂圓春風拈一笑福地隔塵烟

韓巢雲封

勝蹟尋韓巢雲封不露顏文章隱變態山斗仰賢關鱸遁
濤堆筆龍潛霧鎖髮竒踪天愛護望入有無間

湯泉

離城里許在普濟橋下

王承鋈

豐溪隔岸熱飛烟湯沸騰騰出幾泉石竅焮通磺性烈波
心翻聚乳花圓川原遠訝燎原起活水誰將活火煎俯瞰
澄清難一掬待看流出盥巾前

溪邊石窟燄縱橫活聚源頭幾坎清泉達火然烹在鼎氣

蒸雲起沸如羹神炊自效無冬夏民利端資近市城木吏
豈甘炎熱附囊收詩料記嘉名

普濟橋

溪分左右匯流城橋駕飛虹一水橫三月柳晴鋪絮過

三月

到任首
巡此橋

七星潭浴瀉濤鳴

橋築七眼水門
恰合七星橋

石臺鴈齒波涵

影屋接魚鱗市有聲

橋頭
卽市

兩岸誕登真普濟孝廉化洽變

風清

魁星樓

樓在鵬湖書院中

英才濟濟萃膠庠樓對魁星盛氣昌千嶂烟霞輝鳥草雙

溪襟帶煥鴻章朱衣點筆文司命黃甲題名斗射光此日
雲梯登一望西園翰墨撲懷香

鵬湖破賊歌

時在咸豐四年
甲寅七月

廩貢 鄒清華

鎮日喧闐謀弭盜鼙鼓夔夔盜且到盜魁姓古擬黃巾身
穿紅袍戴胡帽驚動城中文武員焚香頂祝叩皇天靈神
默降顛爾衆

城內關帝顯靈
禱求皆響應

道茲小醜何能焉中夜雷雨

欲傾壁千尺浪花擊賊額張礮礮聲轟倏忽殲羣逆

賊因水漲

不能渡橋軍民奮力
攻擊擒斬羣逆殆盡普濟橋連血刃紅文峯塔跨溪流赤
雙螺口張姓團勇截賊
歸路首尾夾擊賊大破東路瀾漫賊復來東關有門賊欲

開那知仙洞三鄉鼓

仙洞鄉上中下三村皆奮勇攻擊賊潰

遁霹靂從天賊胆

摧須臾四面凱歌起一朝渠魁撲滅矣壯士論功歸長官

壯士團勇擒斬賊首甚多論功犒賞均由官局獎給官說威靈神所使吁嗟乎巨逆

湮大義伸莫道無神自有神君不見八公山下秦軍哭萬

道疑兵皆草木

續修豐順縣志經理纂修銜名光緒十年

賜進士出身署豐順縣利川許普濟重纂

敕授文林郎署豐順縣筱珊王承盞重修

總纂

副貢生吳鵬舉軒

廩貢生鄒清華閩秋

歲貢生楊金聲韻石

增生吳永瀾小瀛

分纂

恩貢生張楷式巷

附貢生張仲宣松溪

附貢生王楷吉藹臣

歲貢生陳林皋蘭軒

廩

生陳期昌

香九

廩

生朱文灝

紹程

採訪

歲貢生洪鳴威

丹墀

歲貢生蔡言颺

慎之

附貢生彭揚清

鏡河

監

生吳世爵

晉卿

廩

生詹史

青亭

附

生張嘉樹

海珊

六品街譚淵源

宿海

六品街吳定權

衡石

州同街吳世猷

嘉圃

武

舉羅國材

輔臣

守

備吳

全

壁林